

羣聖流芳

第三冊



羣聖流芳

第三冊

輔仁
北平
公教書局

NAZARETH 1921

天主降生壹千九百二十一年

香港主教師准

香港納匝肋靜院活版

羣聖流芳第三冊七月目錄

一日聖貼禮顯修

二日聖母往顧聖婦依撒伯

三日聖伯樂瑟削聖瑪爾弟尼亞諾致命

四日聖賴孟多顯修

五日聖厄瓦略鐸德隱修

六日聖婦我德肋瓦致命

七日聖伯辣多致命

八日聖婦依撒伯國后

九日聖女亞納多里亞致命



見四張

見六張

見九張

見十一張

見十五張

見二十張

見三十三張

見三十六張

十日聖婦斐理西大同七子致命

見三張

十一日聖必約教宗第一位致命

見三二張

十二日聖若望掛白爾顯修

見三四張

十三日聖亞納格肋多教宗致命

見三七張

十四日聖文都辣聖師

見三九張

十五日聖恩理格總王

見四二張

十六日聖母聖衣

見四六張

十七日聖亞肋叔隱修

見四九張

十八日聖加彌祿肋里斯顯修

見五三張

十九日聖文增爵傳教會首

見五十六張

二十日聖熱羅尼莫厄米連顯修

見六二張

二十一日聖味多爾致命

見六四張

二十二日聖女瑪利亞瑪達肋納

見六七張

二十三日聖亞波理納主教致命

見七張

二十四日聖女基理斯弟納致命

見七四張

二十五日聖長雅各伯宗徒

見七七張

二十六日聖婦安納聖母之母

見八二張

二十七日聖龐大良致命

見八三張

二十八日聖納撒略聖瑟爾瑟致命

見八七張

二十九日聖女瑪爾大童身

見八九張

三十日聖亞伯東聖生能昆仲致命

見九十二張

三十一日聖依納爵立耶穌會

見九十四張

羣聖流芳第三冊八月目錄

一日聖伯多祿宗徒鐵鍊

見九十九張

二日聖斯德望教宗致命

見一百零二張

三日尋獲聖斯德望聖屍

見一百零三張

四日聖多明我顯修

見一百零六張

五日建立聖母雪地殿

見一百一十張

六日耶穌發顯聖容

見一百一十三張

七日聖多納多主教致命

見一百一十四張

八日聖西理亞歌聖納爾各聖瑟瑪辣多致命

見一百二十七張

九日聖羅瑪諾致命

見一百三十張

十日聖老楞佐致命

見一百三十二張

十一日聖女蘇撒納童身致命

見一百三十七張

十二日聖女嘉辣童身

見一百四十張

十三日聖禧波里多致命

見一百三十四張

十四日聖歐瑟伯鐸德致命

見一百三十六張

十五日聖母蒙召升天

見一百三十六張

十六日聖亞進多顯修

見一百三十二張

十七日聖羅閣隱修

見一百三十五張

十八日聖后赫肋納守節

見一百四十六張

十九日聖類思主教

見一百五十二張

二十日聖伯爾納多隱修聖師

見一百五十五張

二十一日聖婦若翰納守節

見一百六十張

二十二日聖性福良幼童致命

見一百六十三張

二十三日聖斐理伯伯尼弟顯修

見一百六十五張

二十四日聖巴爾多祿茂宗徒

見一百六十九張

二十五日聖類斯國王

見一百七十三張

二十六日聖熱搦斯致命

見一百七十七張

二十七日聖若瑟加納桑顯修

見一百八十一張

二十八日聖奧斯定主教聖師

見一百八十三張

二十九日聖若翰洗者致命

見一百八十七張

三十日聖女羅撒童身

見一百九十一張

三十一日聖賴孟多諾納多顯修

見一百九十三張

羣聖流芳第三冊九月目錄

一日聖額日弟阿顯修

見一百九十九張

二日聖斯德望國王

見二百零二張

三日聖女瑟辣斐亞聖婦撒俾納致命

見二百零六張

四日聖瑪瑟祿主教聖瓦肋利亞諾致命

見二百零九張

五日聖老楞佐儒斯弟尼亞儀主教

見二百一十二張

六日聖弘伯多顯修

見三百二十五張

七日聖女助喜納童貞致命

見三百二十七張

八日聖母聖誕

見三百三十張

九日聖多羅德阿聖我爾我尼致命

見三百三十三張

十日聖尼各老多耶定顯修

見三百三十五張

十一日聖伯樂德聖夏新多聖女歐日尼亞致命

見三百三十六張

十二日聖基童貧人

見三百三十七張

十三日聖亞瑪多苦修

見三百三十三張

十四日十字聖架之榮

見三百三十六張

十五日聖尼各默德致命

見三百四十一張

十六日聖閣肋里教宗聖西貝盎主教致命

見二百四十二張

十七日聖方濟各印五傷

見二百四十六張

十八日聖多瑪斯由味辣諾瓦主教

見二百四十六張

十九日聖讓魯亞略主教致命

見二百五十二張

二十日聖歐大覺與妻子致命

見二百五十五張

二十一日聖瑪竇宗徒兼聖史

見二百五十九張

二十二日聖貌理爵等致命

見二百六十二張

二十三日聖李律士教宗聖女德加辣童身致命

見二百六十六張

二十四日聖母立贖虜會

見二百六十九張

二十五日聖斐爾明主教致命

見二百七十一張

二十六日聖女儒斯弟納童身聖西彼廉致命

見二百七十四張

二十七日聖葛斯默聖達彌盎昆仲致命

見二百七十六張

二十八日聖文思老國王致命

見二百七十九張

二十九日聖彌額爾總領天神及諸天神


見二百八十三張


三十日聖熱羅尼莫顯修聖師

見二百八十六張

羣聖流芳

十一





羣聖流芳 第七月

◎ 一日聖貼禮顯修

聖貼禮是法國之鄉農。其父以耕種爲業。不安本分。常與匪人交遊。惟母稍知婦道。善於教育。幼命攻書。長爲受室。但聖人已決志守貞。因強順其親而婚配。行婚禮後。私向新婦告以衷情。豈知新婦轉生招惡招嫌之思想。時出怨言。聖人覩此情況。稟明主教。主教命向新婦說明。獻身於天主。後來必蒙天主賞賜大榮大福。聖人遵命而行。天主開明新婦。卽同意願。各守貞修。時聖勒彌正當主教之任。聖人聞名往謁。聖勒彌留伊讀書。勉修諸德。聖人努力讀書。不數年。已成畢業。授以鐸德之神權。聖人甚想在僻地隱修。造小屋於深山。居此一年。遂出山遊歷鄉莊。引人歸正。一心專以救父之缺點爲首

務。後來父與岳父俱入聖人之修院。從此聲名四佈。又能多顯聖蹟。適本國王有目疾之患。諸醫無效。請聖人入都。聖人伏地求主。求畢。用聖油畫十字於眼。卽時目痊。國王加恩優待。所賜禮物甚多。聖人概辭不受。仍回先住之山院。患病來求者。無一不沾其恩。過數年。公主病重垂危。特請聖勒彌入都。因患病難往。轉派聖人爲代表。行至中途。公主已經去世。王卽欽命官僚沿路趨迎。止其前進。聖人云。我有主教之命。必要到京。旣至。在公主之柩前。跪求天主許久。命開其棺。將聖油傅於五官。公主卽開目。曰。因聖貼禮功勞。天主賞我復活。國王國后及宗室侍臣。見此偉大聖蹟。廣揚天主光榮。感頌聖人大德。全國社會人士。無不仰慕愛之。聖人卽因身病。還救靈魂。引人改過。導人愛主。未幾。仍回舊院。又過數年。預知終期已近。備行臨終禮典。安然瞑

目而逝。時天主降生後五百三十三年。國王聞聖人去世。親率大臣。臨喪敬禮。三位主教經營殯葬。顯有無數聖蹟。表揚聖人之盛德奇功。

宜行之德 效法天神

天神管顧罪人。亦如善人一樣。管顧貧賤之人。亦如富貴人一樣。爲何我們不如此愛人。反爲較論貧富卑賤。分明善惡智愚。有輕重之待遇。有禮貌之不同。有親疎之辨別。並不像天神的態度。一視同仁。如何得有天神之潔淨平和。當知罪人亦是天主所生。與汝同類。各種的人。都是一樣。爲何不行博愛。爲何不盡心顧之。欲知待人之道。如天神之待汝。便稱愛至仁全。故聖奧斯定曰。天主降世成人。惟望俗人爲天神。

當務之求 爲亡者

祝文 天主以爾聖貼禮。每年瞻禮。樂我等。懇祈爾。吾既慶厥誕日。幸師厥功勳。爲爾子吾主耶穌基斯督。亞孟。

◎ 二日聖母往顧聖婦依撒伯

聖母既受天主降孕。靜隱數日。感謝主恩。因憶天神所言。方知表姐依撒伯之孕。遂同若瑟。急往山中一城。乃猶太國所屬之地點。時依撒伯雖孕。尙自秘密。未有知者。聖母不憚四百餘里之遙。不畏崎嶇跋涉之勞。而往顧之。至門。行禮道賀問安。依撒伯聞言。忽覺胎子。自腹中踴躍。又獲聖神寵照。知天主降孕於聖母有日矣。是時愉快非常。而大聲呼頌曰。女中爾爲贊美。爾胎子耶穌。併爲贊美。荷蒙吾主之母光臨眷顧。我何幸於此哉。聞爾問候之聲。一入吾耳。我孩卽喜躍於懷中焉。大哉因爾之信德峻極。而獲幸福。天主所

告爾之事。必將成驗。其寶諾焉。聖母哈此譽頌。更加謙恭。口約成章。告謝天主曰。吾魂現今弘主兮。云。祝畢。依撒伯恭迎入內。同居三月。乃辭歸。今日之瞻禮。大而且異。其餘之瞻禮。或獨吾主。或獨聖母。或獨一二位聖人。今日共包吾主聖母。及聖若翰與二親聖人之瞻禮。可見其大而且所異者也。今日吾主首顯於世。首興救世赦罪之工。世人始知其貴其能。謂之吾主瞻禮。今日世人起點知聖母之高位。起點傳揚天主聖母之尊貴。謂之聖母瞻禮。今日若翰聖嬰。免原罪之污。受聖寵之潔。謂之若翰瞻禮。今日二親。多受鴻恩。聖神滿被其靈。謂之二親之瞻禮也。

宜行之德 顧問親友

此瞻禮。乃聖母訓誨吾人慰候之禮也。其禮維何。以仁愛。以恭敬。二者。乃慰

候之本。故聖母入依撒伯之室。先以仁愛撫慰之。繼以恭敬拜候之。汝若顧
慰親友。當以聖母爲表。除仁愛恭敬之外。非虛卽僞。不能有功。果能以此往
顧病人。往慰窮人。提醒愚人。勸化陷溺之人。其效甚速。但不可因跋涉之勞。
不肯毅然前往。或不得已而強行之。亦無情願樂從之志。非爲愛人也。

當務之求 爲讚揚天主

祝文 伏望天主。佑我心志清潔。遠棄世俗之煩囂。惟伏仁禮。應酬暫世。庶
使詣於常樂。爲吾主耶穌基督。亞孟。

◎三日聖伯樂瑟削聖瑪爾弟尼亞諾致命

聖伯多祿宗徒。旣罰妖人西滿王。卽遣官拘捕。與聖保祿宗徒同禁於監。守
兵內有二人。一名伯樂瑟削。一名瑪爾弟尼亞諾。見宗徒之聖蹟。就有信教。

觀念。且蒙天主默佑。向宗徒云。我們奉差看守。已九月有餘。大抵政府事務繁多。無人提議。不妨隨便出監。今所求者。我二人情願歸正棄邪。領洗入教。二宗徒云。因見我們所行的聖蹟。要奉我們所傳之教。若果能信天主降生。受苦受難各等緊要之務。你們亦能仰邀聖寵。顯蹟化人。是時同在目前者。俱一齊跪求領洗。而二聖更爲懇切。然爲何遲滯不行。因監禁犯人之處。在石山上。監中又無水存留。出監取水甚難故也。於是聖伯多祿憐念二聖志切情真。卽於石上。輕輕一擊。清水竟隨擊處。源源而來。從當日至今。取之不竭。其時以此妙水付洗者。共四十餘人。官提二聖問曰。我聞汝奉了外國的教。不遵王法。背叛原奉之神。是何道理。該當急速改圖。二聖答云。從前不知真假。悞聽人言。今明知天地萬物。只有一個大主宰。信之必得永福。背之必

受永殃。所以無煩再問。寧遭萬死。不能改我奉事天主之心。雖有酷刑。不能奪我棄絕異端之志。官知無效。命掌嘴敲牙。逼令跪拜邪神。二聖反對不從。高談與官辯論。官大怒。先用夾棍。後用燒紅鐵版。赤身受烙。二聖視之如飴。朗誦聖經以謝主恩。在旁有一教友。大聲安慰云。耶穌之人。不怕世間苦難。不久可得永遠無窮之賞。刑役曰。若肯遵依國法。就息此苦災。全生保命。二聖曰。你們不知苦之樂。故出此言。請任憑加苦。汝苦愈加。我樂愈甚。何懼之有。正在用刑之間。官之左目忽盲。暫命收監。越三日。官竟負魔而死。伊子妄奏聖人謀殺其父。王命近臣。將二聖斬決。時天主降生後六十六年。

宜行之德 隨主聖佑

無太陽。不能行世上之路。無聖佑。不能行天國之路。若得聖佑而不行。又何

異於日出已高。猶安眠未醒之人。有何用處。或今日熱心。而明日怠惰。如樹受春生之氣。必然綠葉青枝。若不續以夏秋之氣。豈能開花結菓。汝有一日之熱心。而無明日之接續。非卽無花無菓之樹耶。辜負天主聖佑。必然受罰。如樹有枝葉而不結實。必砍爲薪。不使徒沾雨陽之滋膏也。

當務之求 爲犯罪改悔者

祝文 天主。以爾聖伯樂瑟削。及聖瑪爾弟尼亞諾。致命之光榮。我等依賴聖恩。得厥護衛。懇祈爾。俾我等。仰瞻遺表。追隨恐後。望其欣然轉達於吾主之前。爲爾子耶穌基督。亞孟。

◎四日聖賴孟多顯修

聖賴孟多是法國多羅撒府人。自幼端莊古風。不與羣兒同戲。方在孩時。卽

能誦習天主聖經。熱心敬主。及讀書時。早有守貞之愿。又恐不能滿意。勉從父母之命。隨俗成婚。越數年。其妻病故。遂定方針。不復再娶。圖修克己潔身之德。苦服嚴齋。父母去世後。遺產甚豐。聖人只留養口之資。餘皆周濟貧病之人。且建一大院以居之。因地而收利息。生生不窮。現在患疾之貧人。俱有倚賴。後來亦能永久。卽此一事。足見聖人有守有爲而布置咸宜也。聖人常居院內。晝夜殷勤勞動。飲食醫藥之類。必要親身管顧。苦者慰之。患者引之。忿怒驕矜者勸解之。在院服役之人。無不盡心竭力。以全形神之工。現於外者。如此周詳謹密。藏於中者。更加日新又新。蒙特授以鐸德之權。旣登神品。愈增神工。事主事人。終於此院。時天主降生後一千一百五十九年。

宜行之德 讀善書

不該看無益之書。因其內容必有害處。且悞光陰。又助邪魔引誘。念經是你與天主說話。看聖教書。是天主與你說話。可知利益無窮。汝雖不識字。不明文法。書雖好。亦無所用。惟良心發現。是頭等好書。無人不識。無人不明。若不肯識明。卽不肯改過。因此心理之書上。自然寫明所犯之罪。輕重利害。瞭然無疑。宜早痛改以滅之。不然。汝必同此心理之書。燒於永火之中。悔無及矣。

當務之求 爲冷淡者

祝文 天主。以爾聖賴孟多。每年瞻禮。樂我等。懇祈爾。吾旣慶厥誕日。幸師厥功勩。爲爾子吾主耶穌基督。亞孟。

◎五日聖厄瓦略鐸德隱修

聖厄瓦略。是法國人。性質純良。懷施博愛。甫十餘歲。所行之事。卽超越於老

成之輩。救人苦難。勸人改過。助人德行。大感人心。致被化者不少。主教聞此盛名。望其襄助。至二十五歲。陞爲鐸德。受權之後。倍切慇懃。因不能完滿愛主之願。遂隱入深山。以齋以默。以苦以祈。無一知者。在此數年。因有數處。未聞聖教。出山勸化。從此德名漸著。往來者甚多。因嫌舊居太窄。是以擴充。廣闊。尊卑窮病之人。無不招待周旋。同眠同食。同坐同言。如此愛人。尙招憎惡。有主教之差委二人。見其招待人甚多。飲食甚豐。卽向主教。謊說聖人貪饕。室如酒肆。大壞隱修之規。主教卽差原人拘訊。二人復至。只云主教召汝有緊要之言。聖人云。汝二人奉差之故。我俱知道。明早同去。黎明工課俱畢。又請二人飲食。二人怒責如此早餐。非合隱修之規。聖人默受不言。與請一行路者食畢。向差云。攜此乾糧。途中可用。令乘騎者先行。我卽隨後。未及二十

里。二差口渴腹饑。一人昏倒。不能前進。所攜乾糧。尋求不獲。無奈坐臥道旁等候。聖人既至。婉言曉諭云。如此斷絕愛人之德。故天主特恩提醒你們。言畢。聖人求主可憐。平地內特發水泉。又給以乾糧。二人猛然悔悟。向主教前自告其過。主教疑爲聖人買囑。著所屬法官嚴審。路經聖堂。聖人進入。求主施恩保全。後至衙署。脫去外衣。掛於太陽所射日光之點。光本空虛無而能有。竟如衣架。端然安置不動。官反疑爲邪術。叱云。你想哄我。難道不遵修規之人。天主還賞你聖蹟麼。聖人曰。天主無所不知。我與邪魔並無干涉。我行事。自然是天主之特恩。當知德行。非獨專以苦難。但苦難之德。猶比不及仁愛救人之德。遇有貧窮者。不得不竭力以周濟之。語未畢。適有人抱一新生三日之兒。覓人乳哺。官曰。汝行或從天主。或從魔鬼而來。無從徵信。汝能

命此孩明說父母之名。我就信汝之行從天主而來。聖人悵然不樂。曰。我乃大罪人。安敢行此聖蹟。倘此孩說出父母之名。有傷汝之體面。官命一定要說。不然。卽是邪術哄人。聖人仰天浩歎。命孩說明父母之名。其孩以手指官曰。這就是生我之父母。名拂辣。謂亞官自慚愧。求聖人代祈天主寬赦。聖人云。汝若早在神父之前。直言告解。何有今日揭破此事。若有真心痛悔。必蒙天主寬赦。我替汝痛悔七年。以補贖之。此官真心悔改。後亦登入聖品。自此聖人聲名大著。人人倍加敬愛。本國王欲舉爲主教。聖人求主。加一大病。身發壯熱。如炙如焚。七年始退。王仍欲舉之。聖人云。不久就是我去世之期。惟求吾王恩命。派二鐸德。助我善終。領受聖體。終油畢。氣絕升天。時天主降生後六百年有奇。王率羣臣。臨喪敬禮。聖蹟甚多。

宜行之德 信德

人有大信之德。必能移山平海。治病驅魔。復活死人。甘心苦難。必能隨吾主耶穌。與諸聖人之表。若輕世上之富貴榮華。必勉行天堂之路。斷絕地獄之根。汝今信德如何。一個天堂。一個地獄。每日念經。都說我信我信。恐怕是隨口之言。未必真心實信。若信。爲何不隨吾主。與諸聖人之表。而勉進於德歟。

當務之求 爲聖教廣揚

祝文 天主。以爾聖厄瓦略。每年瞻禮。樂我等。懇祈爾。吾旣慶厥誕日。幸師厥功勳。爲爾子吾主耶穌基督。亞孟。

⊙六日聖婦我德肋瓦致命

合二姓之好。而成婚配。理宜相愛終身。然反目如仇者甚多。旣受祕跡神恩

之後。惟在各人之善用與不善用耳。不善用者。暫愛必變爲永仇。善用者。暫仇竟變爲永愛。若有辜負天主玉成之恩者。何不讀聖婦之傳而自鑒焉。聖婦我德肋瓦。原係世家。母族更稱豪華。儀容端美。秉性善良。熱愛天主聖母之神工。與衆不同。求娶者甚多。其父母不允。獨允一鄰邦富貴之人。豈知丈夫之性。竟與聖婦相反。此卽天主玉成聖婦之恩。增其艱苦。顯其忍德。可作後世爲夫爲婦者之模範也。他自成婚之後。聖婦事姑最孝。御下最慈。敬禮丈夫。極其謹慎。奈何仇以滅愛。怨以滅和。夫之毒恨。日深一日。姑更猛烈。如火加油。挑撥惡感。每責其子。子不自安。常出他往。聖婦每早聽彌撒。行默想後。卽辦理家務。教訓家人。勤作女工。救濟貧病。姑見如此。反以良善轉爲惡孽。謊誥其子。夫將聖婦。交與家僕。限定每日。只給麪餅少許。凉水一餅。不許

過此定數。此僕素畏主人之嚴。不但遵命無違。而且助紂爲虐。所送餅水。如餵犬之態度。聖婦明知出身世宦。不應受此欺凌。然深信苦難。就是真福。無論甚麼苦難。皆有天主之命。不但並無怨尤。還要喜歡樂受。所以餅水雖少。尚留一半以濟貧窮。每每觀念婚配的人。得蒙隱修之苦。朝夕誦經。感謝主恩。以丈夫之詈罵爲好音。以責懲爲教訓。以怨聲爲憐愛。在彼母子之意。醞釀惡感甚深。欲制其死命。以洩己忿恨。又恐女家挾仇報復。故作此緩圖之計。悞料聖婦自幼席豐筵厚。決不能長受艱難。久延生命。及見聖婦久受如故。復將限定之餅水減少一半。聖婦又深信養身必賴主恩。仍分一半濟貧。本家雖爲仇敵。而親戚鄰居。莫不敬之愛之。聖婦見其毒恨有加無已。恐因一人而兩家遭害。遂聽親鄰之勸。潛回本國。父母見之。卽同訴明主教。主教

當堂解決。命其與夫同回。相勸嗣後和好。其夫口是心非。仍復如前苦之。聖婦知有不能保全之勢。即將生命獻於天主。自信此行。可得升天之幸福。旁人。有代爲理論者。俱辭謝之。彼母子。見威逼不能速死。又惱恨外人誇揚此婦。密囑二僕陰謀殺之。又欲掩人耳目。使人共知此死。與夫無干。其夫進房。假意叙了許多和好之言。遂乘騎遠去。聖婦在房跪禱。二僕進房。以繩縊死。拋入魚池內。俟身冷無熱。擡回於臥榻。如睡熟一般。閉門而出。俟天明後。不見開門。原僕照常入看。卽大聲出戶。逢人報死。鄰里羣來觀看。頸上顯明縊痕。都忖度是其夫之主謀。天主欲顯聖婦之德。縊死之原地。變成白玉。常發大光。魚池之水。能除百病。墓上沾恩者甚多。時天主降生後一千零七十三年。聖婦升天後。其夫續娶。產生一女。胎目失明。無法醫救。洗以魚池之水。忽

然光明全美。夫見此恩。悔懼交集。遂離俗苦修。老姑亦反心追悔。似此遷移態度。皆聖婦之忍德所致也。世之爲夫婦者。遇有艱難。果能行事不亂。甘心樂受。不獨自己成聖升天。雖頑且惡。亦能變爲純良。倘因片言不合。各人蓄怨懷私。是將天主所賜作聖之基。而自棄之耳。

宜行之德 聖憂聖愁

爲世俗事。不該憂愁。因此能亂心志。傷肉身。滅德行。爲別人憂。難而又難。爲自己憂。苦中加苦。如何纔得不憂不愁。該知憂愁。若從自己而來。宜忍耐煩。必能補過自新。若從天主聖意而來。宜安心順受。以望天主慈恩。地獄雖勝於火山。亦當不得聖憂聖愁之淚。竟能完全撲滅其火也。

當務之求 爲婦人苦難

祝文 天主爾德能靈異之中。不棄弱女輩。賜致命者榮勝。懇祈吾等。慶爾聖婦我德肋瓦誕日。因其遺表。躋爾臺前。爲爾子耶穌基督。亞孟。

●七日聖伯辣多致命

聖伯辣多是希臘國人。幼年父母俱亡。惟願以身心服事天主。遂將祖遺產業。施濟貧窮之家。當時聖會不寧。藉以救援之力。教中增其篤守。教外感化亦多。本欲待時而出。奈何道大莫容。首被拘拿到官。問是何人。聖人答云。我是恭敬天主之人。從幼服事天主耶穌。極親之極愛之。情願失去生命。萬萬不肯失去耶穌。官命鞭笞。周身皮破血流。聖人甘心樂受。忻然喜形於色。官甚奇之。丟監候審。至七個月有餘。官復提訊。令遍施各種酷刑。諭云。若肯順從君命。敬拜國神。我將姪女許汝爲妻。此女本家富而且貴。成此婚姻。無求

不得。聖人答云。皆因不知我本來事業的基礎。故出此言。若要背逆我主耶穌之愛。豈獨名門閨秀。不能動我之心。卽許我普天下萬國。亦不能奪我恭敬耶穌之志願。官大怒。命將預備之鐵牀。用大火燒紅。使聖人赤身臥於其上。聖人安然在火牀講道。勸化旁人。略云。此火不算火。若不認天主。不守聖規者。必下地獄。設以此火比地獄之火。斷不能及萬分之一。在火牀歷有個半時辰之久。身上並無燒痕。且有奇香撲鼻。皆聞芬芳之氣。旁人睹此神奇。一致深信聖人所敬者。果是萬物之大主。官之口語已弱。因無理由辨論之價值。見聖人詞嚴義正。忿恨愈加。離座厲聲。命將二鐵球燒至透紅。放於聖人心胸之上。聖人口鼻。立時俱出火氣。還勸旁人棄邪承認真主。官怒更增。各樣酷刑。遍施無效。終以斬首洩恨。時天主降生後三百零三年。

宜行之德 敬德

天主造天地萬物。皆是爲人。造人特爲恭敬天主。但恭敬之法。必宜事事小心。如誦經禱默。正是對天主說話。敢不兢兢業業。肅躬莊嚴。朝臣覲君。苟有差遲。罪不免誅。尊君之禮。尙且慎重周詳。何況天主臺前。更當如何敬謹。

富務之求 爲同鄉親友

祝文 懇祈全能天主。吾敬憶爾聖伯辣多。致命者誕日。賴其轉達。使吾剛健於爾名之愛。爲爾子耶穌基督。亞孟。

● 八日聖婦依撒伯國后

聖婦依撒伯。是西班牙國王亞納翁之女。乃翁加里國聖婦依撒伯之甥女也。說見於十一月十九日。他領洗時。用姨母之名名之。聖女質美性良。大超

越於諸孩。至八歲時。卽開明悟。熱心敬主。薄食粗衣。謹言慎行。虔切誦經。憐恤貧人。甚於慈父慈母愛子之心。有財不積。隨手樂施。雖生長國王之家。總不優游逸豫。遣興消閒。希圖快意。惟從事克己。嚴齋甚勤。每主日必守數次大齋。因其德行不凡。男女各界咸稱頌之。聞於鄰國。故求婚者甚多。父許字於葡國王之太子。名弟阿尼削。于歸之後。神工齋克。比前倍增。尊榮富貴。毫不介意。朝內婦女莫不敬其善表。一日有窮疾人來求哀矜於管事者。不但分文不與。反用棍擊傷其一手。聖婦聞此暴吝。立卽將其革除。又取膏藥貼於傷處。聖婦遂以回春手段。畫一聖號於上。其人原患痲瘋。次日瘋疾與傷全愈無痕。又一日。聖婦爲散窮人。裙中携帶金銀甚多。偶遇國王。問所携何物。答云。玫瑰花。王命開視之。果是玫瑰花。鮮美異常。奇香馥郁。因此聖蹟。王

甚敬之。但嫌其克己太嚴。濟貧無度。聖婦不因其憎惡而減退神工。仍然積極進行。亦不傷夫妻之恩愛。且倍加恭敬。以全爲婦之道焉。侍前有一熱心教友。聖婦委其管理施濟之財政部員。同事之官僚甚嫉妒之。此人惟忍耐而已。王信奸臣之讒言。遂設計畫處死其人。卽召城外燒窰廠之長入內廷。密諭云。明早使一人到汝處。問王所命之事可行否。汝不必回言。卽將此人拿入窰中燒死。不可遲延。窰長奉命而去。次早王將國后所委之財政部員。命往此窰。問王所命之事可行否。其人行至中途。遇一聖堂。聞有鈴聲。卽進堂聽彌撒。連聽三臺。爲時已久。王擬其必定燒死。卽命妄證之奸臣。往窰偵探。其人至窰。問云。王所命之事可行否。窰長見所言相合。急拿他拋入窰中燒死。先遣之財政部員。後至窰問之。窰長答云。已遵行矣。於是回朝復命。王

見部員安然無恙。驚疑良久。問曰。爲何遲延許久。答云。父親臨終遺命。凡遇彌撒。不得有悞。因聽了三臺。是以耽擱多時。王旣知奸臣燒死。部員保全。皆由上主救善罰惡。有以致之也。從此改過。愈敬其后。未幾王崩。聖婦悲哀至極。然仰承主命。不敢過節。惟求天主。早賜升天。喪事已畢。克己之工。更密更嚴。每於夜中。必整衣而起。誦經五六刻。至早。連聽彌撒三臺。午後至晚。非散給哀矜。卽顧理貧病。若有餘時。誦經默禱。刻無閒暇。歷久不衰。死而後已。自知終期將至。卽預備告解。領聖體終油。領畢。去世升天。年六十五歲。時天主降生後一千三百三十六年。

宜行之德 不靠世福

富貴財物。難得亦難守。縱使能得能守。不但不能稱眞福。還有能消壞眞福。

又不能解憂增壽。併不能添汝學問。成汝人品。免汝些微之病。倘有不測。憂患頻生。因之而亡家喪國者多矣。不能保全父母妻兒性命者亦多矣。人有熱心向主者。彼亦能擾亂之。人有小心守誠者。彼亦能引誘之。雖非魔鬼。實相幫魔鬼之黨援。雖非地獄。實直走地獄之捷徑。雖然如此。若善用之。必能轉禍爲福。

當務之求 爲生產者

祝文 至仁至慈天主。以爾聖依撒伯國后。最善最良之德。化傲抗而爲友愛。變頑梗以法仁賢。伏求吾主。賴其轉達。俾我等。生前共和於今世。死後同慶於天堂。爲我等主耶穌基督。亞孟。

●九日聖女亞納多里亞致命

聖女亞納多里亞。是意大利亞國人。悲觀聖教時。遭毒害。懷有犧牲致命之願。常常誦經祈禱。求得此恩。勤行各樣善功。適值地方官之子。負魔甚重。口中常說亞納多里亞爲何燒我。聞者俱不能解此說。父將其子。送往各廟。求神驅逐。並無效力。迨回家時。路經聖女所居不遠。負魔者卽離開跟隨之人。解其鐵鍊。奔至聖女前。大聲喊曰。就是你每日誦經燒我。聖女端然不動。只吹一口氣。諭云。我命你邪魔出去。獨留此人與我。魔卽遵諭遠離。父母見子回家。問其退魔緣由。知是聖女大恩。多備金銀。踵門叩謝。聖女不受。只云。該散此金銀與窮人。你們領洗入教。以免後來永苦。及是時。求救之病人紛至踏來。聖女俱痊愈之。惟云。該信仰天主。奉耶穌之教。而救靈魂也。邪黨見信從者日多。嫉妬愈深。奏明總王。王卽委官。勒令強拜邪神。聖女反對不從。重

鞭笞責。責後向邪法人云。我與汝空房一間。汝招許多的大蛇。齧死此女。我有重賞。邪法人曰。何必多蛇。一條足矣。聖女入房。通夜誦經。邪法人招一最兇最大之蛇。自信必然將其噬死。豈知此蛇伏於屋隅。顫慄不前。次早。邪法人開房欲進。蛇竟騰空直上。反盤繞其頸中。死在呼吸之間。向聖女喊救。聖女親手持蛇下地。囑令遠遁。不可害人。蛇卽俯首遵命而去。此邪法人名瑪爾索。樂觀聖女之行。竟將邪神邪法概行毀棄。誠心恭敬天主。事聞於官。拘瑪爾索。酷刑重責。強命從邪。因其至死不移。法場斬決。又因聖女爲首。故用利劍刺之。從其左肋穿透右肋。延至次日。斬首而終。時天主降生後二百五十三年。

宜行之德 慎交善友

隨善表比隨善言更易。所以要做善人。須交善友。欲識其人。先視其友。友善者。其人必善。友惡者。其人亦惡。且惡人常以行惡爲榮。反以行善爲恥者。深可悲矣。當知世人。難有全德。惟取其所有之德而隨之。聖安當以此而行。遂成聖人。此人有謙遜。彼人有仁愛。此人能克己。彼人能勸化。若一一擇其善者而從之。豈不是聖人麼。蜜蜂採花。亦擇各花之精細而成甘飴。採德之法。何獨不然。

當務之求 爲開導友人

祝文 天主。爾德能靈異之中。不棄弱女輩。賜致命者榮勝。懇祈我等。慶爾聖女亞納多里亞致命童女誕日。因其遺表。躋爾臺前。爲爾子吾主耶穌基督。督亞孟。

●十日聖婦斐理西大同七子致命

聖婦斐理西大是羅瑪世家之女。出嫁於名族。生七子而寡。以一身而兼父師之責任。善爲教育。諸子德才並美。親鄉甚器重之。時值國君迷於異端。惡黨借勢陰謀。屢聞七子鼓吹聖教。奏請下令拘拿到官。母子八人。盡被鎖禁。次日先提聖婦。勒令改變。聖婦曰。巧言固不能欺我之明。嚴刑亦不能奪我之志。天主在上。豈畏邪魔之奸狡耶。官責云。汝將入墓之年。死不足惜。眼前七子。亦可忍心不顧耶。答云。兒輩若貪生背正。是爲真死。地獄永殃。決不能免。倘能爲義而遭窘難。常生天國。何樂如之。又過一日。將母子一齊提訊。官先諭聖婦曰。諸子青年才幹。必能顯親揚名。何故引之從異教。以喪其身。非愚昧。卽豺狼也。答云。此言似是而非。若爲有限之肉身。必害永遠之靈魂。慈

心何在。遂轉目而視諸子曰。兒輩。此時該快些。以心目仰望吾主。主必慈顏鑒觀爾心。率諸神聖。候爾升天。毋懼虐刑。毋遭魔計。吾雖已老。不望吾兒供養。亦不願吾兒殯葬。惟願吾兒致命獻主。官怒其言。掌嘴辱之。次以善言先誘長子。堅持不從。用刑威嚇。其餘數弟。或勸或懲。俱不能動搖。無計可施。重鞭收監。王命斬之。以免脅從。官將七子斬於聖婦目前。又監禁聖婦四個月有餘。抱定不撓不屈之主義。最後延頸受刑而終。時天主降生後一百六十四年。

宜行之德 樂受世苦

耶穌降世。無苦不受。特爲救贖全球兆民。汝爲自己。難道受不得麼。惡人受苦。終不免地獄。汝欲升天。豈有不受一點苦麼。世苦人人不免。獨汝個人想

免麼。惟有情願爲主而受。暫苦必變爲永樂。汝若不願受。亦無法可逃。恐更增其苦。在世受苦。猶爲不足。還有無窮之永苦。但可惜所受之苦。惟在一個願字之別。將來賞罰若是之懸殊也夫。

當務之求 爲苦難者

祝文 伏望吾主。使吾兢兢不間。敬憶爾聖婦斐理西大等致命之榮勝。吾力弗克以合。宜誠心崇敬。祈爾時時將吾恪恭微忱。爲爾子耶穌基督督。亞孟

⊙ 十一日聖必約教宗第一位致命

聖必約是意大利亞國人。但其行實未詳歷史。惟知教宗聖衣任議致命後。公舉聖人卽位。時值教中多難。聖人救援信輩。眷顧窘危。助其篤信。不遺餘力。情願犧牲爲主之證。行之既久。未經拿獲。奈國禁稍息。而裂教又興。聖人

照例取消其名於教冊。於是仇恨愈深。論異端雖毒。只能害人之肉身。而靈魂有益。然裂教之害。兼能陷人之身靈。故聖人對於此派。更注意防禦焉。聖人所定聖祭之旨。凡鐸德做彌撒時。傾一滴聖血於地者。罰守大齋四十日。若傾在祭臺之上。則補贖有輕重之別。祭臺上有白布三層。若染一層。則守大齋三個。或染三層。則守二十日之定齋。若傾於地。將土起之。傾於布。或剪或洗之。傾於木版。則諒勢刮削。後將此布及土與木。用火煨之。并將所洗之水。灌於淨處。此宗聖典。至今一千七百餘年以來。猶遵守不違。聖人德全功備。畢竟拘拿到官。遂斬首致命升天。時天主降生後一百六十七年。

宜行之德 不恃虛榮

世俗之事。非虛卽妄。如親友之愛。實屬荒唐。本來如膠似漆。忽然變愛爲仇。

誼重情深。忽然變恩爲怨。又勿恃虛名美譽之流傳。因人之好惡。反覆無常。衆口可以鑠金。是非何難顛倒。更不該靠強健聰明之本體。因人之力量。容易盛衰。一場小病。便減精神。轉眼韶華。便成老弱。惟專心倚靠全能天主。纔能不變不改。今汝之靠望者是誰。

當務之求 爲防禦裂教

祝文 全能天主。垂盼吾劣。爲本行重任屈壓。賴爾聖必約致命兼教宗轉達。得厥護翼。爲爾子吾主耶穌基督督。亞孟。

● 十二日聖若望掛白爾顯修

聖若望掛白爾。是意大利亞國人。父居武臣。子習其藝。聖人雖自幼敬主。因道理未明。其兄與同僚結怨。致爲同僚殺害。此時若望掛白爾。無意愛仇。惟

從父命。希圖報復。一日適與兇仇。迎頭相逢於狹路。卽拔劍欲擊之。兇仇慌忙無措。下馬哀求云。請看吾主苦難分上。饒我殘生。若望掛白爾。一聞耶穌苦難之言。竟手軟心慈。收劍稱謝曰。前仇盡釋。自今携手和好如初。轉身而行。非常神樂。步入聖堂。向苦像前誦經獻主。仰見苦像。點首數次。明顯愛仇之德。蒙主大爲嘉之。此像迄今猶寶存焉。聖人得此特恩。立志離家。託身修院。父不贊成。往院追回。聖人迫切跪求。力言世福皆虛。事主修身。人之本分。如此善言忠告。其父忽然動心。允諾而去。入院不久。大顯德名。如謙恭良善。克己苦身。熱心之處。無人可比。如默想誦經。守齋勸化。服役之事。無疵可尋。一年後。欲再加嚴密之工。與一同志之修士。潛入深山。遇二隱者。互相勉勵。居不久。慕名來學者漸多。故設院以居之。不加粉飾。惟蔽風雨而已。在此神

修之團。公舉其爲院長。義不容辭。勉強任事。酌定嚴規。請教宗命。此規程大行於別方。聖人憐貧之心。達於極點。有求必與。常盡其所存以施之。從無拒絕一人。糧食往往罄盡。忽有源源接濟。從無缺少一餐。一少年欲歸修院。至聖人前總告解。將二大罪。隱諱不言。聖人蒙主默示。指明責之。彼始懼悔。教宗第九位聖良。聞名往顧。猝然無備。近有一池。人人知其並無鱗介。聖人命人下網。竟捕得二大魚以充餽饌。年七十四歲。預知終期。全領聖事而終。時天主降生後一千零七十三年。歿後。公行亡者禮儀。衆聞空中奏樂。至葬而後止。墓前顯聖蹟甚多。

宜行之德 愛仇

主耶穌云。汝不恕仇。主不恕汝。主在十字架。上時。尙求聖父赦己仇人之罪。

汝若隨此聖言聖表。不論何罪。主必寬恕。難道我們敢不寬恕別人麼。誰敢藐視主訓。而不隨聖表者。必罹永殃。惟知愛親戚朋友。人人俱能之。雖愛亦何功。惟有愛仇之愛。非真心敬主者不能。其愛莫大乎是焉。

當務之求 爲仇人

祝文 天主。以爾聖若望掛白爾。每年瞻禮。樂我等。懇祈爾。吾旣慶厥誕日。幸師厥功勩。爲爾子吾主耶穌基督。亞孟。

✪ 十三日聖亞納格肋多教宗致命

聖亞納格肋多是希臘國人。秉質聰明。端方謹慎。聖伯多祿宗徒傳教之時。沾恩領洗。從副祭而陞鐸德。勸化之人甚多。教宗聖格肋孟德崩駕後。衆共推尊聖人卽位。時值教中大難。憑陵。受致命者難以勝數。然奉教人愈殺愈

盛。如種子然。一種入地。傳生千百。聖人明知爲天主特恩。卽位後。粗衣薄食。勵志精勤。以堅固衆心。奮興神勇爲首務。命奉教人。凡聽彌撒。必領聖體。以加靈魂之力。不預備者。不許入堂。又擇定一潔地。以葬致命聖屍。本國政府。以勵行非法之手段。欲滅公教。爲義而捐軀者。紛紛繼續不絕。聖人目擊時艱。勸勉不遺餘力。惡黨知聖人是教化之領袖。而謀殺之。時天主降生後一百一十年在位九年。

宜行之德 樂想耶穌苦難

汝旣知謙遜爲美德。爲何不學耶穌之謙遜。耶穌在十字架上。不提天主的尊榮。連人類的臉面。都完全去盡。夾於兩盜中。赤身露體。如同宰割之犧牲。且異口同聲。惡言恥笑。這樣的卑污輕賤。負屈受冤。誰能比擬。數日以前。何

等尊榮敬愛。一旦卑賤忽加。更有特別之辱。皆爲去汝之驕忿。滅汝之虛臉面。增汝之謙德耳。

當務之求 爲在教人常存熱愛

祝文 全能天主。垂盼吾劣。爲本行重任屈壓。賴爾聖亞納格肋多致命兼教皇轉達。得厥護翼。爲爾子吾主耶穌基督督亞孟。

✪ 十四日聖文都辣聖師

聖文都辣。是意大利亞國之富家。至四歲時。一病幾亡。羣醫罔效。父無救法。母惟許愿。求五傷方濟各聖人。代求天主。留此生命。長成之後。必獻入聖人修會。正在危急之間。立時不藥而愈。從此用心撫育。教以熱心敬主。至讀書之年。智慧出羣。性又沉靜。加以好觀經史。故歷時未久。博學過人。然每日神

工必遵母訓。按時規課。不肯因章句而或疎也。年二十一。欲成母愿。求進聖方濟各會後。一心專向天主。其舉動與世俗之人。大有天壤之別。老師每言文都辣。好像未曾染過元祖之罪。因其謙和遜讓。克己卑躬。出自性成。不加勉強也。遇卑賤苦勞。則喜出望外。聞稱揚美譽。若利刃刺心。善則歸人。過則歸己。從不肯直言自己的好處。故人皆敬之如聖如師。然不敢當面稱呼。惟有私心讚之而已。聖人每因耶穌苦難。聖母立於十字架旁。追述此時之光景。發出精妙之言論。至今奉爲典訓焉。愛人之愛。過於他愛。明知挾仇懷忿之人。猶喜勸化而服役之。默想神工。尊高無比。皆從耶穌苦像而來。所以珠淚常流。痛由中發。恭敬聖母。更爲特別。院長見其聰名超等。命往法國京都大學校攻書考試。與聖多瑪斯相遇。極爲同意。交換智識。同榜成進士。亦同

年升天。聖人甫三十二歲。在本會中。內德外才。俱推第一。至三十五歲。卽爲會中之長。事務雖繁。經理只覺其從容。倘有餘暇。卽著書立論。多瑪斯聖人曾問云。汝學從何而來。聖人手捧苦像答云。凡有一點學問。皆從此而來。我不過代爲抄錄而已。其心甚想全球之人。無一不信公教。故多差本會鐸德。凡有聲教未通之處。莫不航海梯山。間關前進。時教宗陞聖人爲紅衣宰相。固辭不獲。差往呂底隆府。頒發教事。小病數日而終。時天主降生後一千二百七十四年。

宜行之德 熱切看耶穌苦像

聖文都辣。是耶穌苦像之門徒。一生著書的學問。皆從此而出。天主愛人。看苦像而極其至。我們該以愛還愛。想此受苦受難之像。爲誰而受。注目存心。

不問不違。則驕奢未有不除。真謙未有不保全者。汝不但無有受苦之心。還用了許多方法。爲遠離苦難。若離不開。還生了許多抱怨之心。把天主所賞之苦。爲補救靈魂之神藥。反認爲禍。爲凶。爲冤枉。是也不是。汝試言之。

當務之求 爲聖方濟各會

祝文 天主爾使聖文都辣。爲民永福之司。懇祈爾。伊在世旣爲吾教師。在天幸爲吾主保。爲爾子吾主耶穌基督。亞孟。

⊙十五日聖恩理格總王

聖恩理格。是德國巴王之太子。初爲儲君時。自幼受洗於主教聖阿爾方阿之手。稍長。卽受業於主教之門。及主教去世。聖人年已二十四歲。聖阿爾方阿顯容面諭云。過了六。此聲甫畢。形影寂然。聖人輾轉尋思。莫非過了六日。

是我終世之期。此六日內。時時預備。不比尋常。及期。竟平安無恙。又想或是六個月。亦未可定。每日精勤。不容少懈。六月已完。仍無變故。復思此言。斷無不應之理。必係六年始驗。遂奮勉精修。日新又新。滿望身清靈潔。可享主恩。此六年內。直造聖人之域。甫滿六年。至到七年首日。列國君王諸侯。公立聖人爲總王。纔知道過了六之深意。知有主命。不敢推辭。登極之後。內修政事。外攘夷狄。擁護教宗。維持公教。統率臣民。守規敬主。以盡爲君之本分。極其慎重周詳。且大婚後。同志守貞。弟謀作亂。聖人更加以友愛待之。越數年。忽病。醫家認爲石淋之症。百藥無效。求聖本篤轉免。一夜。夢見本篤聖人。將陰囊內大石取出。交與聖人。醒後果然石在手中。病亦痊愈。卽趨羅瑪府聖母堂誦經時。耶穌親臨堂內。聖老楞佐。聖文南爵。分列兩旁。聖母與十二宗徒。

及無數聖人。四圍環繞。一天神奉耶穌命。到聖人前。諭曰。天主用此大恩賞你。爲你童貞。爲你愛德之心。後聞翁加里亞國。屬在鄰封。異端過半。聖人將一熱心之妹。嫁與該王斯德望爲后。同心協力。鼓吹公教。通國臣民。莫不欽崇天主。詳見九月二日。聖人年已五十二歲。天主默示終期。遂請其后至臥榻前。乃執王后手曰。承汝許我爲后。一同恭敬耶穌。今汝仍是童貞。此王后。卽聖婦古尼貢是也。叅看三月三日。言畢。瞑目而崩。時天主降生後一千零二十四年。升天後。聖蹟甚多。人人信服。有一人頓生疑惑。瞬息之間。兩眼俱盲。此人素敬聖阿爾方阿。卽跪哀求。聖阿爾方阿顯示曰。汝災乃疑恩理格。聖人聖蹟所致。速向聖人謝罪求饒。可得痊愈。其人卽痛悔求恕。眼遂復明。教宗已查明其行實。定入聖品。適有一大主教。獨言此行尙早。該察明再議。

言出。便成雙瞽。明知天主顯罰。在衆人前宣布自錯。極言贊揚聖人。以補妄言之罪。天主賜之眼光如初。

宜行之德 忍耐

心內的憂愁。是頭一件不平之根。遇患難則難當。遇痛苦則難受。凡默想工夫。難得滋味。各樣神工。難得齊全。雖然如此。心內不該紊亂。難道你的憂愁。還比得耶穌的憂愁麼。若因此而間斷神工。以憂愁對待憂愁。而不肯以忍耐對待憂愁。非徒無益而反有害。若能以忍耐心等待憂愁。則所作之神工。遇憂愁而更力。雖無聖味。亦有功勞。汝爲何不強志以成之。

當務之求 爲冷淡者

祝文 吾主天主。以爾聖恩理格。在世爲總王。升天爲至聖。我今求主。俾我

等脫離世幻。棄絕虛榮。仰瞻先王先聖之儀型。長愧有守有爲之不力。惟期潔淨以全貞。同享永安於天國。亞孟。

●十六日聖母聖衣

聖母聖衣瞻禮。始於天主降生後。約一千二百年間。聖母親授聖西滿斯鐸格。命其轉諭環球人士。又許寵愛帶聖衣。及守定規者。不但護佑其在今世。而且拯救其在煉獄。每逢瞻禮七。特降慰其靈魂。而早登天域。其不守定規者。難望此恩之賞。論聖衣所顯之聖蹟甚多。罄竹難書。茲略陳其一二。明眼者觀之。可以類推焉。是時法國有一類斯賢王。恭敬聖母最誠最切。因逆徒叛亂。御駕督兵出戰。有一軍人爲炮彈所擊。聖衣阻之不能進。亦無傷痛。賢王見此聖蹟。卽求領聖衣。終身佩帶。屢次行軍敵陣。毫無被傷。有數千兵士

見之。俱爭領聖衣。至死不移。又西班牙國。有一巨室之女。名加大利納。身染癱瘓。不能活動。領聖衣後。癱瘓忽愈。行動如初。又有一人被傷。血湧如泉。勢甚危急。無生之望。醫藥不應。全家誦禱無效。時有貞修女。勸病者入聖衣會。甫領聖衣。忽然血止病痊。又有一善義之人。恭敬聖母。少有能及之者。忽染瘟疫。垂危將死。其妻將他聖衣。放在瘟瘡之旁。跪求聖母。痊夫瘟病。經未畢。病者卽啟目發言。其妻喜樂非常。勸夫同求。蒙聖母大恩。瘟疫退而瘡亦愈。種種聖蹟。何能歷數。凡欲領聖衣者。當正其心志。非爲圖體面虛榮。特爲增德立功。更熱切尊敬聖母。學其善表。多蒙諸恩也。其規條恩赦。詳見恩赦略說。斯會之大行於世也。乃聖衣會神修之士。熱心而鼓吹之。自猶太國加默爾山。傳遍於太西諸國。有數位主教。未達其情。或奏明教宗。欲取消之。本會

修團。哀求聖母扶佑。聖母遂顯於教宗和羅略。諭云。斯會斯人。吾甚寵愛之。命爾頒示天下。不可有違。今萬國盛行。咸敬奉之焉。

宜行之德 尊敬聖母

聖母生前之德。死後之福。超絕諸品神聖。而位高乎其上。則我們之尊敬聖母。亦宜加於諸品之上。誠爲至當。且聖母之恩。澤及於全球之人。極大極繁。無時不著。無方不到。無倫不沾。太陽之照。霜露之墜。不足以比喻。我們果能愛之敬之。則無不可望。無恩不可求也。

當務之求 爲會內之人

祝文 罪人某。到天主台前。真心定志。進聖衣會。盡力守規。望求聖母轉達天主。特賜護佑。能保神安。在世行善。克勝三仇。至臨終時。靈魂得脫煉獄之

苦。早享永福。亞孟。

◎十七日聖亞肋叔隱修

聖亞肋叔是羅馬國宦家之子。父名歐福。母名亞嘉。富而無嗣。求主最切。既生聖人。用心教育。文學道學。莫不精通。及長。聘娶成婚。親朋宴會。是夜婚禮方畢。聖人亟欲保全棄俗守貞之素志。卽將戒指一對。絲帶一條。送與新婦。曰。留此以爲後來之證。至於我之志向。我之行事。今時未可說知。異日自然明白。遂辭退往別房。求主加佑。以玉成之。隨帶盤費些少。微服出門。航海東渡。至亞細亞葉得色城。更衣討食。匍匐聖殿前。或街市閭巷中。求人施濟。自用有餘。轉濟別人。如此十七年。如同一日。家人去國訪尋。雖逢面亦難認識。其真相。聖人且向家人求濟。因其容貌語言皆變。明知是家人。亦不避之也。

十七年後。一主教默想中。聖母諭云。此乞食少年。惟見其貧。誰知其德。從此
 聲名甚著。聖人視爲隱害。遂航海他往。豈知中流風逆。飄然返至本國。聖人
 登岸入城。朝拜各聖堂。路過本家。卽踵門求乞。適父出門之際。遂從旁跪訴
 云。乞食窮人。無地可容一宿。求賜仁恩憐救。收我於閒房。敝屋中。飼我以殘
 湯剩飯。則感恩無已也。父憫其言。留居廊房。命人給食以度其生。聖人見闔
 家老幼。無一能認識者。明係主恩。不勝感激。從新增工策勵。屢受家丁之打
 罵。不怒而喜。目擊父母之榮華。妻室之賢淑。聖人理勝於情。毅然堅守。不爲
 動搖。如是者。又十七年。天主預示終期。聖人謹依主命。備寫一生。成婚辭婦。
 出門返家之來歷。手中謹執此紙而終。未終之前數日。教宗舉行彌撒。國王
 大臣俱集。空中忽大聲曰。爲我而服勞受苦者。我必迎之慰之。衆皆驚懼。稽

首求憐。頃刻之間。祭臺上大聲曰。爾等須速訪聖人。懇乞轉求。都中可獲平安。此聖某日某時升天。共聞此語。人人查訪。並無踪跡。至所定其升天之日。上下諸人。羣集聖堂。聖人之父歐福亦在其中。定時已至。卽發大聲曰。聖人現在歐福家。王向歐福曰。汝家懷寶而自迷耶。教宗國王親臨其家。歐福先疾趨而歸。一僕稟云。吾家無人可像。惟廊房中之乞兒。其舉動特別。莫非此人乎。歐福卽趨至此房。見聖人以衣遮面。啟衣視之。生氣雖絕。大發異光。美容如天神。手執之字。取之不釋。歐福速命人移屍於中庭。時教宗國王俱至。禮畢。教宗命聖人自釋手書。國王命侍臣高聲宣讀。所寫父母新婦。及自己姓名年歲。并戒指絲帶之密事。詳備無遺。歐福抱屍痛哭。母與新婦聞之。奔赴中庭觀看。其倉惶哀迫之情。涕泣呼號之苦。非言語所能形容者。教宗命

送聖屍於宗徒聖伯多祿殿中。因士民擁擠。爭先拜謁。無法前行。王命多人。將金銀擲地。欲緩其勢。豈知士民望恩心切。皆棄而不顧。其時近聖屍者。聳卽聽。啞卽言。病卽愈。經歷久時。始能擡聖屍入殿。七日之內。父母新婦。晝夜不離。叩拜之人。四方雲集。過七日後。擡葬於別堂。朝墓受恩者。至今不絕。時天主降生後四百零四年。

宜行之德 隨聖輕世

聖亞肋叔在富貴場中。居家十七年。甘受家僕之辱。爲安貧守潔。若苦志不堅。貞心不淨。安富尊榮之念。或些微搖動。只發一言。出於其口。何求不得。今汝無聖人之世福。爲何不學聖人之安貧守潔。聖人之世福。在眼前而不受。汝之世福。毫無影響。而妄求。相去甚隔天淵。研究其故。因汝心全在功名富

貴。不想天堂。不怕地獄。故耳戀戀不休。

當務之求 爲臨終者

祝文 天主。以爾聖亞肋叔。每年瞻禮。樂我等。懇祈爾。吾旣慶厥誕日。幸師厥功勳。爲爾子吾主耶穌基督督。亞孟。

⊙十八日聖加彌祿肋里斯顯修

聖加彌祿。是意大利亞國宦家。父爲武官。雙親奉教。年至六旬。獨患無嗣。因其禱誦最切。纔生聖人。父母俱早相繼而亡。聖人幼失庭訓。流俗數年。投身軍界。出陣戰敵。脚傷而歸。時年二十五歲。於聖母取潔瞻禮。在堂聽講。天主默啟其明司。忽然動心悔改。從此定志更新。嚴加補贖。絕俗離家。隱修於五傷聖方濟各之會。此會克苦。甚於他會。其時脚還未愈。長上命曰。天主聖意。

非斯會可入。聖人從命。遂往羅瑪病院。院長素聞聖人之善德。留爲幫助。正合聖人憐貧顧病之心。所以一切賤役。莫不悅樂而爲。或備藥食。或鋪臥所。或洗衣裳。不嫌其穢。療瘡治病。常跪於病人之前。以致恭敬。卽此可知其大德也。凡在臨終之人。聖人更注意扶助焉。年至三十二歲。深知救人靈魂。非有才學難以成功。於是力學不倦。未幾學成。蒙授鐸德之權。有一次祈禱時。耶穌苦像忽動。兩手竟從十字橫木而下。交攜聖人。命其組織一修道會。設立病院以顧病人。會內規程。不拘瘟病大症。皆同一體視之。聖斐理伯肋里。數次見聖人或其門弟。顧病送終時。有天神曉示。聲名從此益盛。公舉爲本會院長。因公務繁重。稍減神工。任事數年。告辭本職。仍充舊役。適遭飢荒瘟疫。勞苦倍常。天主準顯聖蹟。或充實倉庫。或變水爲酒爲油。又能識人心之

隱微。能預知未來之密事。治病除疾。不藥而愈。身因積勞累苦。惟存皮膚與骨而已。臥病五月。領聖體終油。而去世升天。年六十五歲。時天主降生後一千六百一十四年。

宜行之德 助人臨終

救人靈魂之大功。就是助臨終之緊急。因爲邪魔乘此時機。左懷虎踞。右欲鯨吞。病人勢在呼吸。加之身倦神昏。而能純意免過者。許多人哉。此時外面之牽連。內懷之恐懼。而心不被其擾亂者。亦多人哉。臨終人人俱有一次。必不能免。汝若盡力顧人之臨終。汝將終時。亦有人顧汝。若欲此時不亂不懼者。須善生可矣。

當務之求 爲顧護病者

祝文 天主以爾聖加彌祿。每年瞻禮。樂我等。懇祈爾。吾既慶厥誕日。幸師厥功勳。爲爾子吾主耶穌基督督。亞孟。

●十九日聖文增爵傳教會首

聖文增爵是法國人。父母居鄉務農。守分度日。原奉宗教。事主熱心。生有六子。聖人行三。自幼以牧爲業。父見其聰明。且敬主愛人。令其攻書。聖人資質純粹。穎悟超羣。四年之後。學力大進。有一富貴之家。延之爲師。教訓蒙童。聖人居此數年。更加勉力。內德外才。與日俱增。授爲鐸德。一日有事航海。途中忽被回賊虜去。賣與一背教人爲奴。家主逼令背教。聖人不獨不從。反以德以表化之。家主忽然感化。深悔前非。商同聖人。一齊逃返法國。在鄉村傳教。化導無數鄉民。人人熱心事主。有人見而稱曰。此地之人。盡是有形之天神。

鄰境之鐸德。皆仰其聖範。來問道理。釋疑團者不少。蓋聖人之程度優美。化能移俗。德可樹型。良有以也。有加斯德略之地。缺神父料理。主教選派聖人前往。聖人到此盡力勸勉。從前迷信異端者。得聖人提醒。咸歸正道。冷淡者。受聖人教訓。盡皆熱心。遇窮人必竭力哀矜。或代求富貴人哀矜。又提倡集資。成立一濟貧會。不使有一人受窮乏飢餓。適有一大臣。奉王命統轄通國罪囚。管制約束。責任甚重。此大臣久知聖人鴻才碩德。在國王前保舉聖人。協同辦理。聖人受此重託。日擊無數罪犯。流離困苦。不禁慈心大發。隨處周全。或用講勸。救其靈魂。或施衣食。養其肉身。憂者慰之。病者醫之。鎖鍊太重者。更易之。監牢污穢者。移置之。病貧囚犯兩個部分。皆仰望聖人眷顧。如赤子之望慈父母焉。聖人德化廣被。人皆悅服。有將田產房屋來獻聖人者。懇

求立會傳道化人。聖人俯順輿情。建造修院。創立一會。名爲傳教會。奏蒙教宗準允。定立章程。總以救人靈魂爲首務。會中鐸德公舉聖人爲院長。成立之後。聖人或親往各處傳教。或委派本會神父往各國傳教。計三十五年內。約有七百餘次之多。派人管理避靜神工。計每年赴本修院避靜者。八百餘人。定此傳教避靜之規。大有神效。凡匪類忤逆。遊間暴戾之人。一經本會神父料理。無不卽時悔改。奮志遷善。此皆統率以德。鼓舞有方之明驗也。聖人立一公學。專爲預備英才。選拔神品。學中規矩。誦經有時。默想有刻。講論道理。辯晰精微。起居食息。俱有定則。務令其先自明。後能以道化人。先自熱心。後能引人熱心。所以得爲神品班者。實繁有徒也。各處主教。見此學規甚善。多有取其法者。建立公學。請傳教會中神父經理。又立一仁愛貞女會。凡服

事病人。矜恤罪囚。教訓幼女。收養孤苦之男女嬰孩。皆係此會之本分。務期力行不倦。此會大行於各國。及巴黎京城。有一養濟院。亦有二萬五千人。聖人一生。濟困扶危。統計大略。共用過哀矜銀。三百八十四萬餘兩。國王久仰聖德。至患病臨危。務令聖人助其善終。王崩駕後。新君甚幼。太后臨朝。尊敬聖人。凡關於教中事體。必召其入內廷。與衆大臣公議。徵求意見。極爲融洽。凡有議論不合者。聖人必辯明而更正之。如此鴻猷碩畫。措置咸宜。又奉命選舉通國主教。必須上能輔君。下能治衆。主持教事。無少差錯者。方能勝任。聖人倚靠天主。秉公選擇。毫無偏私。所薦之人。盡皆稱職。是故朝野歡騰。共慶得人。太后更加敬信。無不言聽計從。聖人際此隆遇。正在得爲之時。凡有奏請。俱是光揚天主。救濟窮苦之事。從無一言及私。可見聖人愛主愛人之

心純一不雜也。聖人卒世行實。筆不勝書。此編略言其大概。俱見聖人之忍耐。良善謙遜。仁愛剛毅。賢智聰慧。萃諸德之全。集大成之緒。可謂本國之忠臣。教會之師範。窮人之慈母。後人之表率。年至八十五歲。去世升天。時天主降生後一千六百六十年。

宜行之德 效法耶穌

耶穌曰。予良善而心謙。聖人文增爵。實有踐行之符也。一生所爲。莫不良善心謙。雖令聞廣譽。聖人畏之如毒。避之如仇。卽偶遇之。甚於受人之謗誣者。人見聖人之德。奇妙非常。不覺驚訝而讚美之。聖人聞人之譽。奇怪非常。亦不覺驚訝而退避之。汝曾學聖人之效法耶穌麼。惟恐聞譽而喜。遇毀而怒。外飾卑遜之容。內藏倨傲之念。是自欺也。是益過也。

當務之求 爲傲慢自恃者

祝文 吾主天主。爾以傳教之德。堅固文增爵。爲勸窮人。光輝聖教品級。懇祈賜我敬其功績。法其美德。爲爾子耶穌基督督我等主。其偕爾偕聖神。均生均王世世。亞孟。

●二十日聖熱羅尼莫厄米連顯修

聖熱羅尼莫。是意大利亞國文里西府之人。論厄米連之名義。乃本國巨族之姓也。聖人自青年時。當軍界大員。領兵鎮守邊城。鄰國犯境。圍城攻擊。數月城陷。被敵俘虜。鎖禁於黑暗監內。入夜。聖母忽至。開其刑具。隨聖母出監。入一大城居之。聖人卽往聖母堂。感謝此恩。將所帶回之刑具。懸於聖母像側。以作表記。而不忘此大恩也。是後聖人。卽棄俗離家。變產濟貧。建立一院。

專爲收留失養之嬰孩。且善加培植。用心教育。期於後成。有二位才德俱全之人。其一將陞爲教宗者。巡至此城。見聖人奇勳。欣喜甚深。勸聖人立會在通國之城。廣設學校。聖人厭煩喜靜。故於鄉村之間。遍立小學。未幾。德名超著。就學如雲。聖人多委得力人員。往各方設立育嬰之堂。不獨救其肉身。而且救其靈魂。似此形靈併濟之德。真可謂盡善盡美矣。嘗於小滿後。收麥之時。正值農忙。聖人督率門弟。出院幫助他們。一面做工。一面施訓。遇爭鬪者。調和之。疾病者。醫治之。勞困者。慰救之。屢顯聖蹟。立除諸患。嗣將院務。託一有才德者管理。遂遁迹於近山一洞。嚴齋苦己。多醒少睡。以石爲枕。以地爲席。此間苦無水泉。聖人向石畫一聖號。水卽破石而出。涓涓不竭。且能治病。至今猶有效焉。聖人預知終期在卽。是時瘟疫盛行。死者無數。聖人盡力看

顧。親身負屍埋葬。遂染此疾。虔領祕跡而終。年五十六歲。時天主降生後一千五百三十年。

宜行之德 訓蒙

最大之功。就是設校訓蒙。何也。因能成聖成賢者。無不由茲而作始基。苟失其訓。則永遠大事。懵然不知。而求福無門。避罪無方。更不知何以當信當望。當愛當敬。怎能成聖升天。幼時若不求學。及至成立之年。恐不獨記含散去。時有衣食之奔波。俗務之紛紜。而能汲汲皇皇者。幾何人哉。惟有醉生夢死一世。長懷痛恨而已。哀哉。

當務之求 爲提倡教育

祝文 天主。以爾聖熱羅尼莫厄米連。每年瞻禮。樂我等。懇祈爾。吾旣慶厥

誕日。幸師厥功勳。爲爾子吾主耶穌基督。亞孟。

●二十一日聖味多爾致命

聖味多爾。是法國所屬瑪西里亞府人。溯其先祖。世爲顯宦。本一郡之名門。聖人自幼。專於武職。及長。以武力立功。見重於總王。迨因總王崇奉異端。凡不遵者。毒刑處死。聖人不但不遵。還用自己德威之力。堅固本方奉教之人。晝夜巡查。勸慰兼施。同僚奏參。被拿審究。聖人直言明認。併云。不奉此教者。斷不能救己。必受地獄無窮之苦。邪神爲萬惡之惡。情願受苦以拒絕之。天主爲萬恩之恩。情願受苦以欽崇之。斷不能懼苦以背天主。自甘罪惡。官命收監再議。越數日。復提嚴訊。百折不回。甘受重鞭。身無完膚。懸於十字架上。聖人視之如飴。高聲大呼曰。天主我等主。可憐我。準我所求。明明知道。人無

聖佑不能立功。求主須臾不離。此時不畏萬苦萬難。語畢。耶穌顯現。被釘十字架之像。呼曰。味多爾。不該害怕。自始至終。我不離爾。衆雖未瞻聖表。莫不共聞恩諭。官命收監。天神下降。痊愈其傷。大開監門。聖人出監。仍赴官明訴。曰。請你觀驗。我傷已痊。可見我敬之主。明是全能天主。總王命刑官盡心開導。官卽仰承上意。用世俗榮華福樂。婉轉誘之。若遵國命。陞汝大官。賞汝財物。益處甚多。聖人付之一笑。答曰。若能知道天主大恩。決不如此說也。世上榮光雖大。不過頃刻之間。並非真樂真福。如何比得天堂永樂。如何免得地獄永苦。官見不能挽回。仍收監候。至半夜時。天主賞賜聖人發顯大光。看守之衆兵。見之不勝驚駭。遂有奉教之觀念。就卽棄邪反正。官命一併拘之。聖人不顧自身之苦。惟勸新奉教之衆兵。不宜畏此嚴刑。外面愈堅。心中愈樂。

樂心一起。畏懼全無。今我祈求天主。容我稍緩須臾。眼見你們。先我而致命。吾願足矣。幸哉。衆兵同德同心。無不情願爲主而死。且滿聖人之願。一併受斬。衆兵致命後。官命擡一邪神像。至聖人前。勒令叩拜。聖人義怒勃發。卽舉足踢倒邪像。事聞於官。砍去聖人踢像之足。聖人舉足一伸。照常有足。可以自由行動。官見如此聖蹟。無法抵當。命斬首完結。時天主降生後三百零三年。臨刑時。天本晴明。忽然黑雲驟發。雷雹交加。明顯天主之威嚴。刑後。將聖屍拋入海中。不多時。聖屍自至海濱。教友敬收葬之。至今此海之濱。常顯聖蹟不絕。

宜行之德 盡心敬主

人多不行聖人之路。因自覺其難。故畏縮不前。此係錯用其畏心也。要做聖

人不在聰明。不費力量。惟肯甘受天主之愛。何難列入聖羣。人之所求博學。圖名慕利。歷盡艱險。不畏死亡。謀畫一生而不足。若做聖人則不然。只要汝肯與不肯。倘至今不肯。或終於不肯。何以升天乎。

當務之求 爲初進教者

祝文 伏祈全能天主。吾敬憶爾。聖味多爾致命者誕日。賴其轉達。加力於吾。愛慕爾名。爲爾子吾主耶穌基督。亞孟。

● 二十二日聖女瑪利亞瑪達肋納

聖女瑪利亞瑪達肋納。是猶太國世家之女。父母早亡。兄名辣匝祿。姐名瑪爾大。聖女本名瑪利亞。因生於瑪達肋納之地。遂增此名以別之。幼時失於教育。行動好於自由。不合閨女之箴。鄉黨咸斥其非。幸當天主耶穌降生救

世之時。聖婦聞風趨向。惟自愧穢名難掩。見主無門。遂乘耶穌赴伯大尼西滿之筵席。從主之足。後俯身於臺下。摸耶穌足。痛泣不止。淚淋聖足。持髮拭乾。唇吻接之。擦以香油。發表深悔。愛情之力。無不達至極點。耶穌慰云。爾罪悉免。安心回也。聖女從此去私絕誘。立志改遷。自定終身事主。犧牲金錢樂助。以行善功。凡聖徒所需日用之資。屢行供給。猶若以其家爲旅寓。聖女招待主之門徒。必躬行婢僕之役。乃兄辣匝祿病死。已經葬埋。耶穌一到。命開墳墓。應聲而活。聖婦伏地進香。致其虔敬。至耶穌受難時。聖女隨侍於山。並在十字架旁。悲觀至極。不怕危險。及殮葬時。又隨聖母於石墓之所。葬後。不惜重資。購買異香。以圖開墳復殮。第三日早。攜香油至墓。耶穌已先復活。得守墓天神之言。立即奔報宗徒。慈主升天之後。本城大起風潮。惡官圖滅聖

教。或殺或笞。或監或徒。將聖女一家。逐之海外。飄至法國瑪西里亞地方。士民恭迎敬禮。請其兄辣匝祿主持教權。瑪爾大建立修會。惟聖婦山居獨善。食惟菜蔬。飲惟清泉。眠於草。枕於石。常有天神降顧。歌詠悅樂其心。猶升雲表聽之。三十年後。預知終期。轉聞主教。期於是日。求領聖體。主教如期送至。見聖婦全身離地。合掌乘空向天。謹舉手以賦之。領聖體畢。卽去世升天。時有賢士。殮葬聖屍於此山。迄今虔誠趨謁者。所求必應。

宜行之德 真心悔過

聖女之罪既多。愛主之情亦多。蒙赦之罪也多。皆由多愛之力。遂發出痛悔之心。改過之心。卽斷絕私情世俗。淚下如雨。至耶穌受難時。聖婦不離左右。隨至加爾瓦略山。鞠躬在十字架之下。他之痛淚。與耶穌寶血同流。他之傷

心與天地萬物同情。當知發此大痛悔。大愛德。自己不能預備。求主開愚振弱。始能勉強而行。

當務之求 爲冷淡者

祝文 伏祈吾主。因爾允聖瑪利亞瑪達肋納之求。悔過自新。復活乃兄。今虔恭求爾。俾我等不陷罪污。寵恩復活。遠除俗引。獲享天堂。耶穌基督督。孟亞

●二十三日聖亞波理納主教致命

聖亞波理納。是羅馬國人。適聖伯多祿宗徒傳教。至安弟阿基亞府。聖人忠心誠服。受業爲徒。隨往羅馬京城。因其賢智非常。陞爲主教。委往拿文納府。住居武人之家。其子雙瞽。聖人畫十字以開其目。致感動其親朋之心。深知聖人所奉者。實爲造天地之真主。信從之人。四方雲集。有鄰婦病危待斃。其

夫是本國將軍。請往顧之。聖人以耶穌聖名。病卽立愈。於是夫婦親鄰。咸歸聖化。居此歷十二年。從遊者日衆。異端派嫉妬之。誣告於官。聖人詳陳教理。衆皆深服。惟惡黨恃強殘虐。將其驅溺於水中。教衆救出之。半年後。惡黨漸平。仍傳道如前。適有一富貴人啞。家有一女負魔。望見聖人。啞卽言。魔卽退。遵聽訓語。當時奉教者。數達五百之多。惡黨恃衆。又復擒拿。以火炭鋪地。令赤脚行之。杖笞殘酷。投於荒野。時因傷重。暫避牧童之家。然未肯片刻少安。廣集同人。量才使用。傳教鄰邦。一女已經入殮。聖人聞其父母痛哭。遂大發憐憫之心。舉手按棺。呼喚死女。應聲復活。全家驚喜。聖人頌美主恩。講明教中要理。羣信奉焉。復活之女。守貞卒世。不幸總王迷信異端。欲滅公教。差官拿究。重笞之後。憑空立架。縛臂於上。縛股於下。欲碎割之。聖人容色怡然。

惟有求主加恩忍受。併勉勵同志而已。官見毅勇不屈。將其全身殘剝。灌以滾油。命置於海邊破船。聽其飄沒。豈知殘剝灌油之刑役。反被立死於衆人之前。愈增暴官之怒。命以石擊碎聖人面門。斷餐絕飲。天神進食救之。數日後。強健如常。官仍用充發之計。船至中流。颶風陡發。多人盡溺。惟聖人與三徒二兵。幸見天主特恩提救。飄浮抵岸。係米西亞地方。抵步後。見一病人。遍身瘡毒。痛苦呻吟。聖人不等他開言。向彼畫一十字。諸瘡立愈。其人感恩受訓。過於尋常。繼往大納濟亞省中。此地原有魔像。能言吉凶。聖人到省。魔遂不言。衆特奉牲行禮。仍是一言不發。一日。忽大呼曰。爾輩何苦如此逼我。現有耶穌宗徒。伯多祿之門人。將我網縛。不許發言。他在此地。汝輩望我能言。是增我之苦也。衆聽甚明。遂遍訪聖人。反以治魔爲惡。強要替魔報仇。答之。

罵之。殘虐之。驅逐之。備嘗艱苦。已歷三年。終於退藏。遂回拿文納府。民衆服從如故。豈知邪黨奸謀。比前更盛。共相盟誓。不許容留。復聚徒拘拿。逼令跪拜邪像。聖人默求主佑。魔像自倒。化爲飛灰。惡黨忿極。送官究處。此官向有一子。生而暗啞。幸蒙聖人使之能言。今一見聖人。歡迎招待。候衆人散回。私縱放於山莊。又過四年。訓誨鄉人。夜以繼日。有疾患者。求之卽愈。邪黨聞之。復拿禁獄中。以俟國命。獄官原是教中之人。又釋放之。邪黨星夜追獲。殘傷將死。門人趨救。就近存留。聖人知終期迫近。盡心盡力。勸勉衆徒。言畢升天。時天主降生後七十五年。迄今朝墓者不絕。沾恩者甚多。

宜行之德 愛德

愛人者。平安愛之以言。患難愛之以力。安慰之餘。該竭力以救之。求主以佑。

之。果有如此愛人之心。每日必有望爾施愛之人。或是自己本家。或鄰居親友。若非鰥寡孤獨。就是疾病災傷。汝能爲天主。實心幫助。教其不知。補其不足。天主全能全善。至義至公。不獨不肯加爾之窮。還要記爾之功。免爾之罪罰也。既然如此。爲何不盡力愛人。

當務之求 爲亡者

祝文 天主。因爾至公至義。行善者。無不酬其永賞。我今幸逢聖亞波理納致命之聖日。因其功勳。躋爾臺前。得我等重罪之赦。可獲天上永安之所。爲爾子耶穌基督督。亞孟。

二十四日聖女基理斯弟納致命

聖女基理斯弟納。是意大利亞國弟樂府人。此城在大湖之內。後因水患棄

之。在昔榮華最盛之時。聖女之父。世爲公卿。家且豐富。其父現爲本府之官。但迷信異端。惡聞正道。獨聖女早蒙主佑。尊奉聖規。堅持固守。父不能奪。遇有窮人。將父所供金銀邪像。毀以濟之。父聞怒甚。重刑懲責。聖女欣然樂受。並不乞憐求恕。次日盡脫去聖女之衣。用鐵爬剝皮剝肉。聖女目睹遍身。並無完膚。血流滿地。深以自慶。父之暴怒愈增。造一鐵輪。縛聖女於上。輪下積火加油。燃火焚燒。使輪輾轉。當此急迫之時。天神奉天主之命。飛火燒死旁人甚多。餘受傷者逃命遠奔。只得暫行停歇。將其囚於黑監。天神下降。治其傷。賀其勇。且勉勵後功。僅越一日。父見諸傷全愈。更增惡感。繫以大石。沉於大湖浪中。天神送至岸上。父竟執迷不悟。又囚禁之。天主不容。父於是夜。無病暴亡。新官濟惡。用松香硫黃等物。盛於大鍋內。火焰威猛。將聖女投入。聖

女全無懼色。惟畫聖號。默誦聖經。身逾金石。毫無損傷。蠢爾蠻官。愈加爲讐。全不思想天主威嚴。竟將聖女削髮脫衣。解至邪廟。勒令叩拜。聖女甫入。邪像自傾於地。散爲土灰。惡官忿怒填胸。立時悶絕身亡。羣衆驚訝。棄邪歸正者。三千餘人。新官接篆。濟惡如前。網縛聖女。燒於火窰。歷五晝夜。全身完好。又囚於幽室。命異端人。放毒蛇吞噬。蛇竟俯伏不前。惟官殘忍性成。割去聖女之舌。然割舌後。仍能言語。乃高懸於竿上。四圍攢射之。竟至心穿骨透。聖女謝恩求主。氣絕而終。時天主降生後三百年。

宜行之德 求永益

益者有二。有暫時榮華富貴之益。有永遠真福無限之益。然求暫益者。百不能得一。求永益者。百不能失一。且謀暫益之人。難得靈魂永益。世上多數之

人。只爲想求暫益。如得子孫親友富貴之類。豈知益處少而速。損處多而長。惟有耶穌之榮福利益。能補助靈魂肉身。試觀疾病死亡。災傷困苦。無論何等之人。不能轉禍爲福。變死爲生。汝明知不能。而念念難忘。耶穌能永益汝之身靈。爲何置之腦後。

當務之求 爲婦女

祝文 天主。爾德能靈異之中。不棄弱女輩。賜致命者榮勝。懇祈我等。慶爾聖基理斯弟納致命童女誕日。因其遺表。躋爾臺前。爲爾子吾主耶穌基斯督。亞孟。

二十五日聖長雅各伯宗徒

聖雅各伯。乃聖若望之胞兄也。弟兄俱爲宗徒。大爲耶穌所賞識者。慈主起

點傳道之時。二人應命追隨。辭棄捕魚之業。因後來又有同名之宗徒。以先進之聖人。故稱其長以別之。迨耶穌在於大波爾山。發顯本榮之時。聖伯多祿與此弟兄二聖。皆在其中。可知三徒最得慈主之寵幸也。聖人精修不懈。克己惟勤。於耶穌升天後。傳教於耶露撒稜。漸及撒瑪理亞之邑。雖士民信從。而惹人仇恨。遂往西班牙國。甫至。卽勸化七人。分行各邑。歷久。人少信從。心竊慮之。是時聖母尙未升天。居猶太國。相隔甚遠。此處有一石柱。聖母忽立其上。在於聖人之前。又有一軍天神。唱經讚頌聖母。聖母呼名慰諭云。將來此地。欽崇我子母者甚多。宜早建聖堂。廣宣德意。言畢不見。聖人蒙此特恩。前憂盡釋。奉命而行。在此建造聖母石柱堂。世世有名於西洋。從此棄邪歸正者甚多。過數年。將回猶太國。告辭衆云。吾在此日久。何忍離別。因天主

之命。不敢不從。當知我來傳教。爾等遵依。皆天主之神恩。聖佑。並非我與爾之能也。爾等圖報主恩。必須推己及人。可免誤人之罪。歸後往見聖母。會晤同門。時勤講勸。有邪術人厄爾末日。擲受黨援之託。遣徒非肋多。入室潛圖。見聖人言行超羣。卽跪叩自陳。願入公教。其師慚忿。令魔拿回。非肋多果然身如網紉。聖人倚賴神權。卽將常用之手巾。命其執之。魔卽解退。彼卽求魔併縛聖人。魔無能力。反奉聖人之命。將他拿至聖人前。聖人卽使非肋多誦耶穌聖號。解其索。厄爾末日。擲見此神奇。盡毀其書咒邪術。傾心奉教。聖人特賜一杖。以防魔誘。惡黨所謀。不能達其目的。遂賄囑耶露撒稜之兵士。乘機肆害。聖人雖知。而不顧其犧牲。彼卽私行拘捕。打罵橫加。國君素本昏庸。事聞處斬。赴法場時。途遇一癱人求救。聖人口稱耶穌。癱人卽起。惡黨中有

若西亞見之。悔罪歸正。惡黨怒其反叛。亦奏聞一併斬決。時天主降生後四十四年。聖人之門徒。送葬於西班牙。後因荒亂之餘。聖墓失迷。越五百年。主特顯揚聖墓。夜發大光。倍日。士民爭趨叩之。不數年。國君建大堂。遷葬於堂內。災荒瘟疫。多蒙拯救。迴憶數百年前。海賊犯城。官軍失利。計窮泣禱。聖人顯示云。我保汝再戰必勝之。何懼焉。明早迎戰。大勝而還。至今有求必應。

宜行之德 勸化異端

勸人救人。個個都有本分。聖雅各伯宗徒。能勸化西班牙一國之大。汝不能勸化一鄉一邑之小麼。人雖不聽。汝之本分不缺。必蒙天主垂憐。若或勸化多人。係天主之光榮。惟滿心感謝主恩。不必認作己能。自然聖佑。日勝一日。但天主無所不知。汝若因勸化多人。便生驕傲。自逞才能。自誇功德。如此則

中害已深。

當務之求 爲聖教廣揚

祝文 伏望吾主。聖爾之民。護爾之臣。賴爾宗徒聖雅各伯。衛之翼之。以善行悅爾。以堅心事爾。爲爾子耶穌基督。偕爾偕聖神。爲一天主。均生均王。世世亞孟。

⊙二十六日聖婦安納聖母之母

聖婦安納。是古教亞隆之後。父名瑪丹。母名瑪利亞。此乃猶太國一派常用之名義。是故多有雷同者。聖婦之父母。生有四子。長者聖次雅各伯宗徒。次子聖達陡宗徒。三子聖西默翁。是耶露撒稜之主教。四子聖若瑟。又稱巴爾撒巴。選補逆徒如答斯位時。舉出二人中之一份子。聖婦之父母生有三女。

長亦名瑪利亞。初歸亞斐亞斐。歿後。改嫁與格肋阿法。卽大聖若瑟之兄。次名瑣伯。卽聖婦依撒伯之母。三卽聖婦安納。配于聖若亞敬。同事天主。內盡其誠。外盡其禮。爲主榮光。與人特別。室如聖堂。舍旅濟貧。常行不斷。窮人多有得其救者。但年力已衰。並無生育。惟守齋克己。節用哀矜。以待主命。如此立愿祈求。歷二十年。天主鑒其誠切。又合救世主的定期。特差天神明示曰。天主賜爾一女。爲萬世神人之大母。居未久。懷孕而生一女。卽未有天地之前。所預簡者。並無原罪。生後三歲。聖婦爲還前愿。攜獻主堂。獻後。同居納匝肋。不多年。無疾而終。年七十八歲。

宜行之德 正其所求

聖婦安納二十年切求不倦。爲繼後嗣。天主准其所求。竟蒙允賜而生聖母。

爲萬世神人之母皇。汝之所禱。恐事未必聖善。心未必誠切。時未必久常。乃一求不得。便怨天主不公。或疑天主無驗。如此之求。是求害也。非求益也。有益之求。莫如聖婦。至善。至誠。至久。以愛。以謙。以信。終能滿其所望。汝獨何心。正言正行。而不正其所求之言行。

當務之求 爲善人堅固

祝文 吾主天主。賜聖婦亞納。爲爾子耶穌童貞聖后之母。恭遇慶辰。俾我等起敬起畏。奉爲主保。望聖婦護之翼之。自當日迄今。迄於末世。愷澤無窮。亞孟。

◎二十七日聖龐大良致命

聖龐大良。是羅瑪國西里亞省人。父原迷信異端。惟母素崇正教。聖人幼時。

最遵母訓。不幸母亡甚早。未習真道。雖稍通文藝。惟好行醫。幸遇名賢黑木老。常論天主耶穌爲生死之大主。方是愈病之神丹。何必學醫。然他未能決志遵從。適路旁有一小兒被蛇毒死。此蛇尙在。聖人蒙天主默啟。向屍語云。賴天主耶穌聖號。命汝立時復活。並向蛇云。爾爲禍胎。應替兒裂死。言訖。死兒卽生。活蛇卽死。聖人喜懼交集。卽時遵規領洗。進德增功。日新月盛。一人病目。醫治不愈。訴苦於聖人。聖人手指其目。口稱耶穌聖號。立時痊愈。其人感激主恩。棄邪歸正。從此聲名洋溢。凡藥不能治之病者。求聖人稱耶穌聖號。無不立愈。是時國君殘害聖教。風聞士庶多信天主。禁止甚嚴。聖人恐衆心搖惑。晝夜巡行勸勉救之。事聞於王。先提瞽目復明之人審問。答云。龐大良口呼耶穌。舉手指目。吾目遂明。因知此能出於天主。其教必正必真。王大

怒立命斬決。聖人見仇害卽來。盡變其家業。濟貧贖虜。建院造堂。將完被捕。聖人將正邪來歷。辨別明晰。總不能取消王之偏性。聖人請王。覓一病危之人。由衆先求。國神不應。吾求天主。據此可定正邪。王如其請而行。滿朝見此效驗。官僚多有歸誠者。獨惡徒誣以妖術。請逐之。王命聖人敬國神而背天主。答云。捨正從邪。萬難如命。身可毀而志不可奪也。王勃然怒叱。聖人毫無畏容。遂縛之入大市。赤身懸於高竿。鐵爬剝其皮肉。火炬燒其傷處。聖人聲色自如。惟以心目求主。耶穌借黑木老之像顯現。安慰云。爾主爾師在此。不須驚慮。語畢不見。時繩索自開。火焰自熄。王愈怒。命設大鍋。將鉛鎔化。乘沸投之。聖人見耶穌同入。鉛冷而凝。王復忿極。墜以大石。沉之於海。耶穌舉手持之。履水登岸。王命投於獸場。耶穌先入。聖人叩謝曰。主在此。何畏焉。衆獸

猛而且飢。一見聖人。斂威跪伏。旁人咸頌之。王仍野蠻不服。盡殺諸獸以洩其忿。再造一輪。圍以利刀。縛聖人於輪。從高山轉下。以爲碎戮其身。豈知惡謀雖酷。難當天主之能。旋轉之時。斷索離輪。反傷刑役。又將聖人遍體毒笞。後命折肢斷首。焚骨滅形。役繫於樹。砍之。刀軟如蠟。刑役大驚。惶懼跪求。聖人代祈赦罪。空中有聲曰。主准爾求赦之。聖人屢受主恩。心甚難安。望主容彼傷殘。方能被斬而終。時天主降生後三百零五年。斬後無血。只流清乳。所繫之樹。忽生花菓。王令拔樹焚屍。役懼不行。教中人密葬之。遺恩不絕。

宜行之德 認己

罪人猶如瞽者。不能認識自己。不識天堂之福。不明地獄之苦。不見世俗之虛。不望德光之美。只顧貨財暫富。體面虛榮。肉身僞樂。聖奧斯定曰。主乎。光

照我明悟。使我認主。亦能認己。人若認得自己。則無善不興。無惡不避也。蓋認識自己者。能超過頭等博學。

當務之求 爲病人

祝文 伏祈全能天主。吾敬憶爾聖龐大良致命者誕日。賴其轉達。加力於吾。愛慕爾名。爲爾子耶穌基督。亞孟。

二十八日聖納撒略聖瑟爾瑟致命

聖納撒略之父。原是亞斐利加洲之人。當羅瑪軍界大員。母本意大利亞國舊家。旅居羅瑪而生聖人。聖盎波羅削主教曰。聖人之母。恭敬天主。具有盛德。聖人幼承母訓。信力最篤。乃受洗於教宗理諾之手。父母辭世後。遊學於意大利亞。途中勸人領洗。救患濟貧。沾恩者甚多。內有日納瓦城孀婦之子。

名瑟爾瑟。求聖人收留訓誨。領洗入教。共同行動。從法國往德國屬地傳教。顯聖蹟甚多。奈此方之人。怙惡不悛。二聖日在苦難中。竟被鎖拿。沉入於大水中。仰賴天主全能。行水如履平地。然其水災雖免。此方人士難領神恩。二聖不復再留。欲回意大利亞。行至米耶府。此城拿聖教更緊。二聖被拿審問。堅持不改。遂斬決升天。時天主降生後九十四年。

宜行之德 滅罪升天

升天必該無罪。若領洗後。有犯些微小過。或洗以痛告之淚。或齋尅而行各樣善功。俱能消除此等之罪。不然。必入煉獄煉淨。方能升天。大罪必下地獄。入不再出。無升天之可望。二處之苦皆同。生時必須速行痛告之路。則可安保無虞。

當務之求 爲罪人

祝文 天主。爾賜我等。敬憶爾致命者。聖納撒略。聖瑟爾瑟誕日。望爾彼居永福之域。使吾偕樂。爲爾子耶穌基督。亞孟。

二十九日聖女瑪爾大童身

聖女瑪爾大。兄妹三人。兄辣匝祿。妹瑪利亞。係猶太國分封名族之家。父母早亡。幸逢耶穌降生其地。同歸神化。耶穌常至其家。及兄病死四日。埋葬已完。耶穌駕臨。聖女歡迎之曰。主若在此。吾兄必不死也。但吾知爾求天主。必然允爾焉。耶穌答曰。爾兄將復活。聖女曰。我知世界窮盡。衆人復活時。吾兄必然復活。耶穌曰。子乃復活及生命者。凡信予的人。雖死猶將活。且凡生活而信予者。永不死也。爾信此乎。答曰。我固信爾爲基督。活天主子。而降世

者。耶穌往救之。開墓呼名卽活。兄妹三人感恩無已。迨耶穌升天後。惡黨怒其欽崇。抄沒家產。將三人押發朽爛船中。去其櫓舵桅帆。以速飄流沉溺。幸蒙慈主聖佑。護送至地中海。抵法國所屬瑪西里亞城。邑人見破舟泛海。羣聚而觀。遂有招留優待之者。旣而聞其講論。察其德修。歸化甚多。乃推舉辣匝祿主持教權。聖女另擇淨區爲修院。以居同志精修之女。忽有蟒蛇肆害。聖女求主。向蛇灑聖水。畫聖號。蛇卽裂死。聖女入院後。去私懲慾。受苦卑躬。更密更嚴。酒肉魚牲。概行斷絕。服不過單衣。食不過蔬水。一晝夜。百次叩頭謝主。久而彌篤。一年前。蒙主預示升天之期。卽賜年餘之病。使其精而煉之。終期前八日。聞天上佳音神樂。送其妹瑪利亞聖靈升天。至終之日。耶穌親召之。輝光滿室。聖女升天時。有近處一主教。正舉行彌撒。天神明告云。聖女

升天。當速往葬。以教禮。卽隨天神而至。辦理將完。耶穌親臨送葬。惟他聖未有得如此之寵恩也。迨後法國之君。患病將危。風聞聖女之功。乘輿趨赴。謁墓求恩。卽時全愈。四方士庶。接踵來朝。求福者。各得所求而去。

宜行之德 救己

靈魂之好。肉身之好。俱人生之要務。然肯救靈魂者。必肯兼救肉身。兩好俱得。且皆永遠。若然只救肉身。轉眼之間。兩好俱失。至於永遠。要知自己行爲好否。必須留心研究。人只有一次生死。不可妄想如辣匝祿之再生再死也。此時不救。限期卽至。雖然天主至大仁慈。平常不肯格外施恩。

當務之求 爲傳教者

祝文 救吾者天主。聽受吾禱。吾樂爾聖童女瑪爾大瞻禮。望以誠心得受

訓誨。爲爾子吾主耶穌基督。亞孟。

✪三十日聖亞伯東聖生能昆仲致命

聖亞伯東。聖生能。是伯爾西亞國貴族之子。世居門庭顯耀。二聖同胞同德。道貌禮容。言規行矩。更優於名家之上。時值總王侵奪多城。殘滅公教甚力。二聖正在所侵之地。周行勸勉。致命者收葬之。事聞於王。故被拿獲。王因二聖是上族之人。故優禮以待之。勸云。汝等不必多疑。若我敬之神。不是全能。我兵如何得勝。汝二人遵依敬拜。卽用爲輔政大臣。二聖答云。王敬之神。我國之王亦敬之。怎麼在貴國之兵只得全能。在我國之軍竟不全能。可知全能者。惟有天地萬物之大主。要彼敗卽敗。要此勝卽勝。萬事萬物。必由其權。我們恭敬者。惟此而已。萬不能再拜別的。王命拿至羅瑪。傳諭衆官云。此二

人是伯爾西亞大家之人。只要他肯拜我神。諸事聽其自由。二聖曰。我非正神不敬。所敬者。惟造天造地。降生救世之大主。王怒。收監候審。次日問官提訊云。汝今不必多言。或拜吾神。或不肯拜。片言可決。二聖直言不肯。卽重答鞭打。周身腐爛。取二獅四熊噬之。獅熊俱伏。敬惶悚。官曰。此邪法也。差人看守。暗中將二聖殺死於地。時天主降生後二百五十年。

宜行之德 敬愛天主

奉事世俗之人。旣爲邪魔之奴。定自己爲惡性之僕。沒一個不是卑賤。沒一個不亂良心。更不能得享眞福。所得者。不過犯罪暫時的銀錢。驕人頃刻的體面。就算是邪魔報人惡性之福。然爲此福費盡心機。受了多少艱難。尙且不可必保。爲此遭患難而死者。十居八九。惟敬愛天主者。福無不備。樂無不

極也。

當務之求 爲中國人

祝文 天主。爾賜我等敬憶爾聖致命者。聖亞伯東。聖生能誕日。望爾彼居永福之域。使吾偕樂。爲爾子耶穌基督。亞孟。

三十一日聖依納爵立耶穌會

聖依納爵是西班牙國人。世爲功臣。其父母有八男五女。聖人居幼。繼述武功。王器重之。初當侍衛。後因禦敵。兵鎮巖關。砲傷失守。爲敵所獲。敵嘉其勇。贈資放歸。因其傷重甚危。日久臥床無事。聊以觀書遣興。偶閱聖人行實。其心大爲感動。惟慮改圖不易。幸蒙聖母惠然降臨。囑其矢志精修。聖人卽跪伏決心。棄絕財色世榮。時間空中發聲。窻開屋震。顯其剛毅。愈後。託名出外。

向主教總告解。遁往僻處。穿換窮人之衣履。腰繫小瓢飲水。手持短棍助行。由小路入忙肋撒之孤窮院。乞糧淡食。惟日暮一餐。臥地枕磚。並無床褥。晝必跪禱七回。夜必鐵鞭三次。哀號流血。痛悔前非。一日入堂祈禱。心定神潛。氣絕如死。心中微動微溫。俟至八日。如熟睡回醒。衆皆知其密交天主。無不深敬慕之。主常顯示。助其不及。聖人欲辭美譽。避入巴爾責羅納城。赴堂瞻禮。一賢婦見聖人面發大光。告知其夫。優待敬之。未幾。至物納濟亞那。無門投宿。就臥於街。有富貴人夢中聞諭曰。汝何飽煖安眠。不想吾之修士。在外飢寒露宿。此人聞命。卽起開門。恭迎奉事。然不合聖人之謙心。潛奔渡海。後仍回巴爾責羅納城。一面從事嚴規。及至三十三歲。一面兼攻文學。以資講勸。適有一人自縊。聖人憐其永罰。求主復生悔改。果然應聲復活。至悔解後。

仍死。魔妒聖人德隆服衆。設計搖惑士民。或流言。或控訴。聖人奉爲立功消罪之奇緣。倍增修業。嘗想與同志數人。傳教遠方而未獲。移居法京。外交名士。內練性情。聖人本欲結友建功。乃擇智仁忠直之士共十人。同赴羅瑪。行將入城。獨於僻處。求主鑒憐俯允。耶穌顯慰。許其成功。入覲教皇。考明各士。果然才德超羣。准令協同立會。奉耶穌聖號爲名。規程內之宗旨。以絕財絕色絕意。爲進德修業。謝俗無私之首務。次以讀書窮理。廣聰明。通世務。爲傳教救人之大事。地不拘遠近。人不論文蠻。事不分難易。惟向主命而行。此會既經成立。諸友奉聖人爲長。終身聽命。聖人辭不能獲。以身以言。先衆而行。十餘年間。會士遍行薄海。化人不可勝數。聖人身居京都。居重馭輕。統應四方教務。童幼孤兒。設義學教之育之。貧孀修女。建大院養之存之。顧病慰憂。

決疑拯弱。調和衝突。排難解紛。濟困扶危等事。勤行不倦。天主鑒其創業垂統。德備功全。默示死期。無病而終。年六十五歲。時天主降生後一千五百五十六年。有一貞女在千里外。目送聖人升天。尙有教訓之語。外郡有負魔人。日夜不寧。供聖人像於內室。魔不敢入。仍在室外橫行。復請像於外。魔遂絕迹。埋葬之日。有病女望親聖屍。人衆不能前進。幸得聖人故衣。捧之卽愈。聖蹟甚多。不能殫述。

宜行之德 求天主榮光

成聖之基。先該痛悔補贖已過。次該效法耶穌行事。爲天主榮光。爲救人靈魂。聖人一生不辭辛苦。願普世無一罪人。願天主榮光顯於普世。汝今如何。每日念經。願顯天主聖名。眼見親朋犯罪。尙且漠不關懷。何有心於異域之

人似此徒託空言。不能效法聖人。還敢說效法耶穌麼。

當務之求 爲耶穌會

祝文 吾主天主。簡聖依納爵。增協堅陣之聖。而公教會。愈顯爾名之榮。懇
祈主。賜我藉其轉佑。遵行遺表。戰勝在世。論功於天。同享榮冕。偕聖父。偕聖
神。乃生乃王。世世亞孟。

羣聖流芳 第八月

◎ 一日聖伯多祿宗徒鐵鍊

耶穌升天之後。猶太國暴君黑落德。既殺宗徒聖長雅各伯。繼聞聖伯多祿宗徒爲公教之領袖。捕拿處決。鎖禁獄中。天主遣天神開監放出。遂避於安弟阿基亞城。所被拘之鐵鍊。聖會後來。用金寶嵌飾。珍藏於耶露撒稜城。至天主降生後。約四百五十年。有極西總王之后。名歐多西亞者。爲酌前愿。往耶露撒稜朝拜耶穌遺迹。因其聖德不凡。耶露撒稜主教。詳明此鐵鍊之始末。特爲增其虔切。故將此鐵鍊以送於后。既然領受。敬謝之餘。歡忻無已。后有一公主。爲羅馬總王之妃。卽將鐵鍊齎奉羅馬。令女陳明教宗。聖伯多祿宗徒。在羅馬致命時。繫十字架之鐵鍊。存於聖庫。教宗於是取出。與皇后所

獻之鐵鍊比論。兩根鐵鍊。忽然自成一根。並無微痕。見此聖蹟。莫不驚喜。尤加敬重。卽建堂敬奉之。從此常顯聖蹟不斷。凡負魔者。以此聖鍊。或加於頸。或繫於身。魔卽遠遁。又數百年後。總王阿董。至羅瑪朝覲教宗。隨侍一大臣。負魔而狂。自相齒噬。四肢俱傷。醫不可治。教宗將聖伯多祿宗徒之鐵鍊。加於大臣之頸。魔卽厲聲而出。大臣安然如故。聖蹟甚多。難以殫述。

宜行之德 信德

人之關係甚重者。莫過於永賞永罰。看汝之行事。好像無此信德。言語行動。無刻不與罪爲朋。旣然信有天主。難道犯罪時。還瞞得過天主麼。不死不滅的靈魂。不怕天主全能審判。永罰麼。非余分外多言忠告。因見汝所謀者。富貴。所愛者體面。所享者快樂。總不忖度光陰似箭。世俗難留。惟有靈魂永遠。

不滅。非賞卽罰。必居其一。若果有信德。不該求得此賞。求免此罰麼。現今可爲而不爲。欲待何時。

當務之求 爲廣揚聖教

祝文 天主。視爾宗徒聖伯多祿。因受鐵鍊。爲紀念日。懇祈爾。教會旣因彼始興。幸於凡事。遵守厥戒諭。爲我等主耶穌基督。亞孟。

● 二日聖斯德望教宗致命

聖斯德望。是意大利亞國羅瑪府人。自幼奉教。昭事天主。因其才德並優。遠超羣衆。舉陞鐸德。越數年後。適教宗聖路爵致命。衆共推尊之焉。時值教中多難。聖人晝夜巡行。爲堅固信輩之心。有亞斐利加洲主教。行不合之聖規。命所屬之鐸德。凡裂教者與罪人所付之洗。無論恰當不恰當。一概重行洗

之。蓋主教之錯想。以爲反對裂教人之謬行。聖人聞此。立即屏除。且特諭天下。不拘善惡人等所付洗了的。只要恰當。萬不許重洗。因付祕跡神恩。非擇人之善惡。惟靠耶穌之功勞。昔日惡徒如答斯所付洗之人。未見聖伯多祿重洗之。此理明甚。不待考而知也。聖人在位四年。總王聞聖人爲教中之領袖。差兵捕拿。押至邪廟。勒令跪拜邪神。答云。所該敬者。惟有天地神人之大主。其餘偶像邪魔。萬不可敬拜。語甫畢。地忽大震。像倒成灰。廟堂幾傾。惡黨驚懼而奔。聖人仍回。如常勸顧教衆。彌撒禮畢。差兵復至。將聖人斬首於聖堂內。時天主降生後二百五十七年。

宜行之德 懼罪

最該怕者。惟有罪惡。因罪惡能阻天主之愛。能增天主之仇。能滅天堂之福。

能開地獄之門。故聖人爲離罪惡。情願失財。情願失身以避之。且不止失財失身而已。若其犯罪而阻天主之愛。寧在地獄以息天主之怒。因大罪之苦。比地獄之苦。還更重更深。此言非誠心敬畏天主者。難知真切。

當務之求 爲不畏主者

祝文 全能天主。垂盼吾劣。爲本行重任屈壓。賴爾聖斯德望。致命兼教宗轉達。得厥護翼。爲爾子吾主耶穌基督。亞孟。

◎三日尋獲聖斯德望聖屍

斯德望乃首先致命之聖。被猶太惡黨亂石擊死之後。有聖加瑪列乃聖保祿宗徒及聖巴爾納伯之師。因其爲奉教篤誠份子。將聖斯德望之屍。葬於自己之墓。數年後。聖加瑪列同子亞必朋致命。教友亦俱安葬於此墓。連年

教難不息。久之。竟然失其墓所。至天主降生後四百一十五年。乃卽聖斯德望致命後三百八十年。聖加瑪列顯於耶露撒稜。一鐸德指明墓之所在。令其傳知主教若望。主教率衆往其示處。地忽大震。隨有奇香撲鼻。啟開其棺。果獲四位聖屍。顏色如生。神氣凜然。一聖斯德望。一聖加瑪列。一聖亞必朋。一聖尼各德莫。萬衆趨觀。疾患負魔而立愈者。百有餘人。迨後聖教大行。始奉入城中大殿。越數百年。有一遠方之國。荒旱告急。求得聖骸少許。聖骸始入。旱境驟然大雨傾盆。而且年歲豐熟。又過一百四十年。聖屍改葬於羅瑪聖老楞佐堂內。聖奧斯定所紀。有亞斐利加洲之地。士民出迎聖骸。有瞽婦欲就親之。奈因人衆阻塞。不能近前。旁人取聖骸上之鮮花。置於瞽目之上。瞽目遂明。又近城有一主教。名路濟樂者。患痔甚痛。醫家惟有刀割之法。可

免他患。幸逢聖骸入境。盡力前行敬負。以表仰慕之誠。途中忽覺痔瘡全愈。其餘聖蹟。不暇罄述焉。

宜行之德 恭敬聖匱

首先當敬天主。天主亦命人恭敬聖人聖女。此理人所共知。命人尊敬聖人聖女之屍骸。與所經用之物。人少知之。何以知其然。往往聖骸等。失其所在。天主特指示之。或敢有輕褻之者。罰卽隨之。並因聖骸與所經用之物。賜有許多異恩。如些微之寒骨敝服等。雖歷千百年後。猶能復活死人。驅魔救病。除災免患。天主如此重之。特爲彰揚聖人聖女之功德。以勸後人而已。見聖匱之可敬者如此。

當務之求 爲淺信者

祝文 望祈天主。俾吾輩攸敬之斯德望。首先致命聖人。卽吾輩效法之師。庶幾克愛吾仇。因斯慶日。展敬之誠。爲仇求主。爲我等主耶穌基督督。亞孟。

◎四日聖多明我顯修

聖多明我。是西班牙國之人。父斐理斯。母如亞納。貴而且賢。生有三子。聖人居幼。在胎中時。母夢見犬啣薪火。生後付洗。額顯大星。皆天主預表其德輝也。自幼薄食寡言。避邪就正。學力聰明。每出父師意料之外。稍長。入巴倫府大學中。專心哲學。努力前進。各種神工。常行不倦。奈何濟貧無策。賣書給之。器皿贈之。且願以身代虜。求者驚謝而退。聖人猶以力不能及。心痛泣之。得聞鄰邑主教名賢。前往受業於其門下。數年。衆共奉爲表率。聖人甚惡美譽爲害。避回巴倫。士民多沾化導。越二年。偕同本方主教遊歷法國。皇后乏嗣。

聖人勸其許願濟貧。果然生子。卽類斯聖王也。適當邊界大發異端之患。聖人路經其地。求主顯蹟示之。舌戰異端羣士。請彼將異端來歷。書明紙上。聖人將聖教要理。亦書一紙。同入火中。彼紙立刻成灰。聖人之紙。不獨不能焚燒。反騰空自貼於柱。邪徒怒甚。投火數次。入卽自出。因此竟有中心誠服。稱爲天降之聖者。後居多羅撒府十年。晝夜不遑。加意勸懲。又明知策怠啟蒙。必求聖母爲主保。獻以耶穌救贖功勞。庶幾化神效速。遂召集同志。於護守天神瞻禮前一日。授以玫瑰五十端。期勸各人每日全誦。久而不怠。果蒙聖母俯鑒衆誠。有求必應。統計十年中。此方教友。無不熱心。邪謀無不敗露。被化之人甚多。不但顯於當時。至今虔事聖母者。亦莫不做效其良規。恭誦聖母經。爲求恩獻主之禮物也。又建貞女之院。救養早孤失教。及赤貧之女。內

設女師。外防窺伺。有條有理。各國多宗其法。聖人見化行俗美。旋歸本國。與從前衆神修之團。共議修規。往呈教宗。留中未發。教宗夢見聖殿將傾。聖人以肩而承任之。遂允其請。一日往禱於聖伯多祿聖保祿二宗徒之殿。二宗徒顯形顧慰。一授以權棍。一授以書籍。囑其傳教維勤。主必佑之。聖人凜遵明訓。傳示良朋。分方而往。惟聖人遵天主之命。再入西京。觀念振興。鼓吹甚力。民風大變。矢志精修者百餘人。遂設院以居。周遊西班牙。法蘭西。意大利。波羅尼等國。赤足途行。入城則履。諱其謙也。衣雖簡陋。潔淨惟純。一生未嘗美味。有時無食。就乞於市。貼身常服棕衫。腰間不離鐵茨。就地而眠。每夜鞭笞三次。以爲己。爲人。爲煉獄也。衆欲舉爲主教。力辭不受。以榮爲辱。遊譽如仇。一異端人謀害不果。後竟自鳴。聖人欣然告慰之曰。因我無功。爲逢此幸。

何懼焉。若我爲主而死。情願拔牙剪舌。剜眼剖心。斷肱斬足。碎副凌遲。方滿我心。有一寡婦之子。暴病而亡。其母負屍求救。聖人畫一十字。如睡再醒。一匠因修院倒牆壓死。聖人求主施恩。死匠奮身而起。服務如初。一人名納波戀者。墮馬而殘。骨碎肉裂。聖人聚其散骨。照位安排。大聲呼喊其名。彼卽轉身而起。嗣後人皆匍匐道途。爭先迎送。偶得聖人舊衣寸縷。皆謹藏之。凡遇災病邪魔。奉此以求主佑。屢得非常之效。年五十一。臥病於波羅尼城之修院。耶穌臨示。自知升天在即。召集修團諸友。告以守潔保終要務。囑以謙恭和睦良規。語畢。領聖體終油而逝。時天主降生後一千二百二十一年。至埋葬時。病人撫棺。求之卽愈。過十四年。列入聖品。

宜行之德 勸化人

多明我聖人。甫及壯年。亟思推己及人。傳授玫瑰之經。化人甚多。成立精修之會。救人尤甚。汝果能如此否。當知救人。纔能救己。汝雖沒有才德。難道連自己亦情願棄而不救麼。聖人救人。並無他能。所求者惟天主耳。所恃以轉求者。惟聖母耳。天主猶是天主。聖母猶是聖母。汝與聖人。猶是人類。如有內熱。卽有外光。捨此不爲。意欲何爲。

當務之求 爲聖多明我會修士

祝文 天主。以聖多明我精修功勩及懿訓。輝耀爾聖會。賜允賴其轉達。凡屬形之資不乏。係靈之事日進。爲我等主耶穌基斯督。亞孟。

⊙五日建立聖母雪地殿

天主降生後。三百六十六年。羅瑪京都。有巨宦之家。名若望。娶而不育。夫婦

熱心敬主。行年將老。明知天主未允所求。必爲靈魂有益。願將家產獻於聖母。但不知作何事業。纔合聖母之意。二人齋克哀矜。倍力加工。切求開明指示。聖母鑒其誠切。夢中明示曰。聖子耶穌之意。與我之意。准汝所獻所求。用汝家貲。在斯基林山有雪之地。建一大殿。以便瞻禮。夫婦之夢俱同。往告於教宗。是時理伯略在位。教宗亦得此夢。時雖大暑。不肯少疑。卽差主教鐸德。同伊夫婦。前往此山。歷級而登。果見平原滿雪。形勢壯觀。就在於雪地中。盡其所有家貲。大興土木。運石築基。建立大殿。恭敬聖母。自開工至於告竣。聖母所顯聖蹟甚多。聖會卽立此瞻禮。歲歲舉行。使後世知此殿之來歷。感聖母之特恩。傳諸不朽焉。

宜行之德 恭敬聖母

羣聖流芳 八月 五日

一百一

聖母爲罪人之託。最肯憐救罪人。夫聖母之仁慈無限。則轉求之能力亦無限。故雖極大極重之罪人。倚靠聖母仁慈。無有不可望之恩。無有不可滅之罪。既然如此。可知倚靠聖母。就是常生不死之良方。捨此良方。難逃永死。聖母既能救人。又肯救人。因爲天主之母。卽是萬世萬民之母。罪惡庸愚。狠動聖母之仁慈。故真真實實爲萬民之倚靠者。

當務之求 爲恭敬聖母者

祝文 懇祈吾主天主。使爾僕享神形永安。賴聖且榮。卒世童貞瑪利亞。轉達。脫於現在憂危。並享永遠歡樂。爲爾子耶穌基督。亞孟。

◎ 六日耶穌發顯聖容

慈主耶穌傳教之第二年。預言受難諸苦。見諸宗徒。憂形於色。乃攜伯多祿。

雅各伯。若望三徒。登大波爾山。默用神工。其餘衆徒皆在山下。其山乃納匝肋城附近之地點。是時三徒倦臥而睡。忽睹耶穌聖容。發光如日。衣白如雪。正是天上景象。又見每瑟厄里亞兩先聖。與耶穌互相談話。將行上文所論之事。此指受難救世而言。伯多祿喜告耶穌曰。此間樂矣。若然吾主准許。請製三座帳棚。一居吾主。一居每瑟。一居厄里亞。語未畢。則光雲遶護左右。隨聞空中有聲曰。此乃我愛子。汝輩宜聽之。三徒咸兢兢俯伏。耶穌以手援之。曰。爾起毋懼。三徒仰首。獨見耶穌。不見兩先聖矣。耶穌復與伊輩下山。戒曰。茲所見所聞。未至人子復活時。毋出於口。三徒隱不敢言。然私議不明復活之旨。蓋吾主少露本身之榮光。使三徒親見天上永福之萬一。欲勉勵其望。堅固其意。倍增其力。使彼甘心能當今世之苦。又吾主將受諸般凌辱苦楚。

以至於死。宗徒憂心殷殷。或疑慈主無能無知。故受難前少露榮光。使他們瞭然。其自甘受苦以救世人。又命來一位多年已死者。一位多年活存者。明顯耶穌爲生死之主也。

宜行之德 默想榮光復活

善人肉身復活。有四大妙恩。一、光明。太陽不及。二、無能受傷。雖刀火萬刑不能微傷。三、輕快之速。雖億千萬里。欲至卽至。不費時候。四、透堅不阻。雖堅鋼鐵石。不能阻滯。如此妙恩。長而且永。無窮無盡。但不可因戀今世之暫福而失之。更該多立苦功以得之。此四恩者。不過天堂萬福之影耳。

◎七日聖多納多主教致命

聖多納多。生於羅馬國彼尼弟亞省。方幼年時。所因教難不平。謹隨父母。避

居意大利亞。及其父母爲主致命。聖人潛往一隱修者之處。情願學道苦修。本方主教聖撒弟祿聞知。喜其才德俱全。陞爲鐸德。委之襄辦教務。並任講道解經之職。聖人全心全力。樂行不倦。蒙主特恩。多顯聖蹟。所以爲日無多。盡滅此方之邪妄。聖撒弟祿升天後。教宗聖儒略卽以聖人陞補斯缺。聖額我略紀載云。此時聖爵以玻璃爲之。仇徒橫行擊碎。聖人睹此毀傷。寸心痛裂。求主矜全。頃刻旣碎之玻璃聖爵完好如初。又一稅官因有遠行。將所存之稅銀。交與其妻收藏而去。妻聞賊勢猖獗。埋其銀於地內。鑿穿牆壁而逃。過數日。妻以病亡。臨終時。向旁人云。我夫之銀。俱埋於地。及稅官回來。遍求不獲。求憐於聖人。聖人同至妻墓。望墳明語曰。耶穌基督督我等主。命汝說明埋銀之處。忽有聲從墳中而出。此銀埋於某處。掘地取之。果然全獲。聖人

秉政十六年。以德以行。施於全屬。不幸國君背教。發生風潮之患。本省總督。知其不敬國神。雖然苟免暫時。難容漏網。並將昔時同修之士希納略。一齊拘獲。俱逼令背主全生。二聖堅執不從。希納略立斃於杖下。聖人斬首致命。時天主降生後三百六十一年。

宜行之德 神貧

神貧而形不貧者。以神御形。使其不驕不泰。則貧之德始成。神貧而形亦貧者。以形輔神。使其能安能樂。則貧之功愈顯。德既成。功既顯。則世俗榮名財利。必不在心。故得之無罪。失之亦無憂。處富如貧。救貧猶易。汝今如何。明知愛財謀利。爲萬惡之根。不肯斷絕。明知出力之事。不爲名。卽爲利。少有爲天主。而猶望立德立功。難矣哉。

當務之求 爲貧者

祝文 全能天主。垂盼吾劣。爲本行重任屈壓。賴爾聖多納多致命兼主教轉達。得厥護翼。爲爾子耶穌基斯督。亞孟。

⊗八日聖西理亞歌聖納爾各聖瑟瑪辣多致命

維時羅瑪總王。專與公教爲仇。下令拘拿信輩。以及主教鐸德。約有數千之多。均以苦工苛待。派官督令。搬磚掘土。勒限嚴催。不容休息。給以些微黑麪充飢。日曬雨淋。雖弱病老年。皆弗顧也。惟肯背正從邪者。卽釋之。否則死而後已。時有教中富貴人德辣松。見此艱難。慷慨資助糧食。遂與三位教友密議。一名西理亞歌。一名納爾各。一名瑟瑪辣多。三人情願爲主致命。常往來受難教友中。周旋勸慰。教宗聞此美行。陞西理亞歌爲副祭。適因攜糧食赴

工場督工官知其同教。被拘充役。三聖樂從此苦。更與弱人代勞。監工嘉其勤敏。惡王反將其收監。聽候查辦。三聖在監。賴天主全能。多顯聖蹟。啞者。怪病者。畫一聖號。無患不除。時值總王之女。爲魔所苦。向父云。能救我者。惟天主教之西理亞歌。王因兒女情深。暫停仇恨。竟從監內。召入宮中。聖西理亞歌。以聖號逐之。魔云。強我遠離。必拉汝去。波斯國一往。聖人叱云。此係我與汝爲仇。不用多說。只命汝速離此女。魔卽應聲而遁。此女愈後。奉教最誠。王留三聖居於大宅。感情格外優待。未幾。果然波斯國王之女。亦遭魔害。女言羅瑪。京都有天主教人西理亞歌等。請彼到來。我害卽除。遂差官往求羅瑪。因總王之后是奉教者。王以此行語后。后傳三聖與差官同往。旣至。以耶穌聖名逐之。魔去女安。感此聖恩。女先奉教。上下約四百人。俱是聖人付洗。王

賜以金銀珍寶。絲毫不受。留十五日。三聖同回羅瑪。時值總王他出。太子權理國政。前建宮院。苛待教中爲苦工者。是此太子。今乘此機。切齒仇教。復行拿問。毒刑拷逼。強其背正。三聖不從。卽行斬首立決。時天主降生後三百零三年。

宜行之德 謹小慎微

真心敬愛天主者。敬畏多顯於大事。熱愛多顯於微事。何也。重罪必受永殃。犯罪必求寬宥。誰敢不畏不敬。惟有謹小慎微。出於熱愛之心。因小罪者。招引大罪之端也。微小之罪不防。重大之罪必隨其後。可不慎哉。當知世俗艱難。是天主所賜大恩。爲免汝小罪之罰。因一生凶患。難比煉獄瞬息之苦。旣然難堪煉獄之苦。汝當謹防小過。必無大過。微罪不犯。必無重罪。可免後災。

當務之求 爲有過不改者

祝文 天主爾賜我等。敬憶爾聖致命者。聖西理亞歌。聖納爾各。聖瑟瑪辣。多誕日。望爾彼居永福之域。使我偕樂。爲爾子吾主耶穌基督。亞孟。

◎九日聖羅瑪諾致命

聖羅瑪諾。是羅瑪王之大臣。聖老楞佐受刑時。眼見酷刑最虐。容色怡然。回思骨肉之軀。竟能甘心樂受。則所敬之主必真。方默思裁度時。忽見轉輪傍邊有一美童。以帕拭聖老楞佐之汗血。聖人卽下定決心。信認天主。甚爲滿意。行近於前。與聖老楞佐說明所見之事。卽求付洗。奈聖老楞佐四肢被縛。聖人望主施恩。頃因解縛收監。聖人自攜淨水。隨入監跪求付洗。聖人自領洗後。心滿志堅。直言不諱。王聞其事。拘拿入見。聖人不俟審問。卽大聲明告。

曰。我蒙天主特恩。今爲耶穌基斯督之人。王勃然大怒。立命斬決。時天主降生後二百五十八年。於聖老楞佐致命前一日。

宜行之德 成全基斯當

金口聖人云。大哉吾之貴。至哉吾之福。因天主聖寵而得天主。因得天主而享萬榮萬福之源。請觀此言。可知基斯當如此尊貴。如此榮福。必要名稱其實。非空言也。但已到手。纔算成全。猶如讀書之人。告終卒業。纔算成全。如未得手。正該發憤積極而進。若因未成。亦勿灰心消極而退。退則必將讀書的名壞了。倘汝不隨聖佑而輕世榮。豈特基斯當之真福不得成全。且連名亦壞了。旣不成基斯當。欲成爲何人耶。

當務之求 爲在教者

祝文 懇祈全能天主。吾敬憶爾聖羅瑪諾致命者誕日。賴其轉達。使吾剛健於爾名之愛。爲爾子吾主耶穌基督督。亞孟。

◎十日聖老楞佐致命

聖老楞佐。是西班牙國之人。父母俱賢。聖人稍知文學。卽期進德修業。維時羅瑪教宗西斯篤。仁風遠播。遂負笈從之爲師。教宗鑒其誠心。又嘉其才識。往往用甚難之事。以發展其經濟。惟財政部之長。委任聖人充當。未幾。總王貪酷並行。屠毒教中。紀不勝書。教宗遭此大難之時。巡行勸慰。寤寐無寧。竟以崇正斥邪。知其踪而被捕。聖人決志隨行。教宗力阻之曰。吾非棄却汝也。天主大恩。憐我衰老。賜此輕微小苦耳。汝以青年。具茲仁勇。將承大難。以爲名教之光。且相隔無多。只三日而已。汝惟順天主之命。無庸迫切也。汝當乘

此可爲之時。將公存財物。盡散窮人。萬不可少有疎虞。致填貪壑。聖人急別含淚而歸。聚集窮家。將所積存之財。計戶均分。聖庫爲之一空。天主嘉其樂施聽命之德。賜以開瞽神能。有一寡婦因病盲目。聖人以指按之。目明如舊。一久瞽者。聖人畫十字於目。立愈。次日向其師消差曰。公財盡行施濟。我之手續完矣。在旁黨役。一聞散財之言。即將聖人拘獄。上聞其事。獄中一犯。名路濟祿。積忿失明。幸聞聖訓。神目與形目俱開。一時傳聞甚速。病目之人。求者卽愈。奉命審案之官。禧波里多。心竊異之。察言觀色。悅服非常。遂深悔前非。並勸家庭共二十人。俱歸聖教。王因醉心於財。達至極點。所以親問聖人公財何在。答云。求寬三日。必取齊送主。王甚喜之。仍令禧波里多管押。聖人將受憐貧病之人。計有數百。傳齊而入。口稱此輩。已藏我哀矜之財物。永存

於天。不朽不失。真爲教中之府庫也。舍此不藏。而藏於匱。必遭廢壞。王惡其欺。先施網杖。次備各刑。以漸殘傷。聖人恬然樂受。重笞之後。赤身懸掛。將鐵板燒紅。烙焦臂肋膀胱等處。如此劇刑。面容並無苦狀。王諭役云。此人雖小。必藏魔術。故假粧樂死輕生之狀。我以嚴刑碎裂之。看他何法可逃。聖人曰。我靠天主無限之力。忍此有盡之刑。不足畏也。王命以鉛條遍身重打。碎其骨肉。聖人默然。毫無痛苦。歎息之聲。惟求天主特加神力。克勝歸天。忽聞空中明語云。此時苦難未完。大功未積。稍緩時日。以承主命。刑官共聞此聲。信其果有邪法。遂製一架。形方似榻。頭尾俱有轉輪。網綁聖人手足。一齊推動。強令四肢分開。皮崩肉裂。骨斷筋攣。加以鐵鈎攢傷腰腹。穿入肝腸。增其痛苦。真莫可形容之慘酷。聖人惟仰天謝主。安心順受大恩。天神降來慰勉。併

持白帕。拭乾汗血。傷處盡痊。旁有大臣羅瑪諾。明白見之。靜候聖人解縛。收監。卽行入監領洗。且先聖人而致命者。詳見於昨日聖羅瑪諾本傳。王知諸刑無效。另造鐵牀。鎖聖人於牀上。大火炙之。觀者莫不切齒吞聲。恨其殘虐。獨聖人剛毅倍加。從容婉語曰。所貪之財物。已被貧病人收藏於天庫。無能吞嗜。可食者。惟我身耳。今一傍已經燒熟。請復轉他傍。庶可以供王之大餐。王惟忿怒不言。久之。聖人知終期不遠。謝主大恩正切。聖魂遂離世升天。時天主降生後二百五十八年。門人殮葬於城外。聖教大行後。國王特建殿築墳。各國俱建堂敬奉。有意大利亞國中。爲建聖人之堂。木料俱備。建造時。有一柱獨短尺餘。無從更換。又不便接補。衆皆憂悶。跪求聖人。眼見短木漸長。過於所求之數。匠人取用後。餘剩之木。衆皆爭收之。奉爲至寶。能除百病。此

外顯聖蹟甚多。

宜行之德 愛主

聖老楞佐愛天主之心。能充滿其愛力。火燒遍體。似乎不知不覺者。因所愛專歸於愛天主。不肯分愛於己身。安能分愛於己身之樂。又豈能分愛於暫時之生命。汝之愛主。可能如是否。若不如是。有何可恃。而能保存永遠之生命。聖人不俟苦難及身。自己尋求樂受。他人躲得一刻。便偷一刻之安。聖人爲遲三日。竟不放心三日。及綁土轉輪。鎖土鐵牀。纔滿生平之盼望。雖然萬苦齊加。聲容亦不改其常也。

當務之求 爲亡者

祝文 全能天主。昔爾使聖老楞佐。克受火牀酷刑。懇求賜撲滅我等罪惡。

之火。爲爾子耶穌基督。亞孟。

●十一日 聖女蘇撒納童身致命

聖女蘇撒納。係聖葛彼攝之女。聖嘉約教宗之姪女。總王底阿格肋西亞諾之親戚。聖女自幼失母。父雖棄俗精修。陞爲鐸德。然其慇懃教育。常繫於懷。女年十五。卽矢志守貞。時王之子續配。選及聖女。聖女明知叔與父。乃教中元首股肱。與王至戚相關。所以暫行容忍。王遣官員格樂弟阿。向其父議婚。父竟不辭不允。未有正式表示。推云。容日商量。及向弟兄們計議。俱言成婚後。可息教中之害。誰知天主不用世俗親朋以立教。特堅聖女之心。而立志向父曰。幼承家庭之訓。獻我心於天主。卽或無此夙愿。亦不肯嫁與殺害聖教之人。可力辭之。三日後。格樂弟阿。又向教宗道及前情。併請其父回覆。俱

云。該問蘇撒納自己。隨即見之。聖女並不說婚嫁之言。專以教理攻乎異端。苦勸格樂弟阿歸正棄邪。否則必受天主之重罰。格樂弟阿觸耳驚心。大爲感動。卽求指示。何修而得脫永害。聖女直言提醒曰。該痛悔前非。定心遷改。領洗守十誡。學耶穌之表。此修身立命之大經。最真最穩。格樂弟阿遂率全家領洗。不去消差覆命。王另遣大官瑪是莫慰問。兼詢前事。瑪是莫親至其家。見格樂弟阿身服破衣。眼淚泫泫。忙問其情。格樂弟阿太息再三。悵然告曰。天主大恩。開我之心。幸歸正教。想我從前窮凶極惡。殺了多少聖人之血。因此悔恨。無法可消。瑪是莫見此真情。露於表面。亦領洗入教。二人卽棄絕世緣。無心爵祿。將己厚產。急行變賣。以濟教中受難之人。王見二官俱無消息。聞其所行如是。不勝怒甚。立命鎖拿。及其家屬。勒令背教。違卽斬之。二官

全家俱爲主致命。隨將聖女及其父監禁。至五十五日。請王后傳聖女入宮勸之。豈知王后原是奉教之輩。反堅其守志保貞之言而出。聖女回家後。王知婚事難成。強其叩拜國神。否則殺之。卽擡一邪像到聖女家中。聖女仰天求主。忽然邪像不見。惟餘空座而已。當時有人見此邪像。裂地埋於當街土內。差官大怒。卽將聖女命役重刑鞭笞。王聞知。着令處斬立決。時天主降生後二百九十五年。

宜行之德 貞潔

愛天主在萬有之上。此係天主所命。人人俱不可少。併不可缺。守童貞者得其全。因守貞專爲愛主。故其心全向天主而不分。爲愛耶穌而甘世苦。而斷世榮。此爲真愛。惟童貞者有之。且斷絕五官之娛。甘受克私之苦。終其身如

一日也。正所謂純一之不雜。但不知汝心能如此愛主否。能如此絕俗絕私。而正其歸向否。恐汝惟圖虛榮。有其名而無其實。則謬之甚矣。

當務之求 爲教中人

祝文 天主爾德能靈異之中。不棄弱女輩。賜致命者榮勝。懇祈我等。慶爾聖蘇撒納致命童女誕日。因其遺表。躋爾臺前。爲爾子吾主耶穌基督督。亞孟

● 十二日聖女嘉辣童身

聖女嘉辣。是意大利亞國亞西府人。父以武功興家。富而且貴。母推愛主之心。而及愛人。親朝各處名聖之堂。矜憐道路貧人。受孕之後。常憂產難。一日空中大聲曰。汝將生女。同慶德光。何憂慮焉。及生聖女。預表其奇。呼名爲嘉辣。其名義乃包含光美通明之意也。幼儀端肅。性質純良。不好嬉遊。常居靜

室默思耶穌聖體之精微。學力神工。日增進步。是時五傷方濟各在亞西城。率衆苦修。承訓以操大德之神法。遂稟明父母守貞之志。父母阻之不獲。聚集同志之女。效法聖方濟各之會規。成立之後。修女漸多。院舍日增。聖女慈讓待人。勤勞待己。如洗衣滌垢。灑掃烹調。各般賤役。及慰憂扶病等事。行同婢僕。大小事務。爭先爲之。外來財物。除院中日用之餘。盡施貧乏。不留於次日。有一乞兒求食。僅存衆女共餐之熟麪一包。聖女命分一半與之。用餐之時。明知不能飽衆。將此半包。手畫十字。心乞主恩。眼見麪包驟長。女衆五十人。如常飽飫。一夜燈油用訖。聖女自取空瓶。交與執事人。求濟於鄰家。執事人接瓶到手。油已滿瓶。卽告知聖女。聖女復視之。奇跡果然。不獨惟是。適遇回軍。攻城告急。率衆修女。敬捧所供之聖體。出門伏跪曰。吾至慈至公之天

主。看此衆婢。棄世隱修。守規事主。迄於今日。何忍聽其陷害。祝畢。空際答云。日監在茲。寧弗爾佑。此時敵人。正在登城。頃刻危陷。忽然敵軍。驚散奔逃。越數年。寇患又至。四面包圍。誓取此城。聖女仍入堂求主。不知何故。敵軍拔營夜遁。凡受魔害。或患病者。求聖女畫一十字。或點頭一語。或舉手一摩。無患不除。因此四方悅服。聖女身爲院長。四十二年以來。極其克己。就地而眠。以木爲枕。所用者。鄙陋不堪之器皿。所衣者。駱駝毛以蔽體。用麻索以束腰。所飲食者。麪餅菜羹之外。不聞再嘗他味。每因痛哭已罪。眼至昏花。魔乃現形。誘感阻之。聖女叱云。爲主眼瞎。我之幸也。院務惟靠主恩。無庸慮及。惟爾輩失明已久。無能仰對真光。懷妒何益。魔卽慚退。聖女久病無憂。亦無希望病痊。盡力勤勞。老而不懈。蓋欲借此滅罪增功之良法。自知終期。神樂非常。衆

女悲傷。聖女勉慰多言。至薄暮時。耶穌聖母自天而降。聖靈跟隨上升。時天主降生後一千二百五十三年。葬於本修院之聖堂。聖蹟神恩。迄今不衰。

宜行之德 欽敬耶穌聖體

聖女嘉辣自幼至老。無日不默存耶穌聖體之恩。仰承其德。聖女純心體照。不啻形影相隨也。又如修院用糧。竟無底子物業。每日從哀矜而來。似此神貧。非愛聖體者難得。故能愛聖體者。必容易愛神貧。既知聖體恩從天降。神貧之德。豈由世俗而來乎。離此神貧。容易下地獄。聖奧斯定曰。富哉。聖教神貧。能買天堂。

當務之求 爲聖體會

祝文 救吾者天主。聽受我禱。我樂爾聖童女嘉辣瞻禮。望以誠心得受訓

誨爲爾子吾主耶穌基督督亞孟。

⊙十三日聖禧波里多致命

聖禧波里多卽是奉羅瑪制軍之命。追究聖老楞佐財帛之官。因見聖老楞佐顯無數聖蹟。荷蒙天主特恩。開化其心。率同全家。共二十人俱領洗入教。及聖老楞佐被拿招供。聖人目睹耳聞。倍增神樂。制軍寬限三日。取財之責。又仍交與聖人。此時聖人比先大不相同。其實幫助聖老楞佐同心協力。召集窮人。存養於家。視窮人如寶。期臨送入。王將聖老楞佐嚴刑處治。是晚聖人跪於聖老楞佐足下。懇求明日。說明我是敬天主之人。聖老楞佐曰。此時還早。不久必能遂汝之願。果然聖老楞佐致命後。因聖人收屍殮葬之故。王聞其事。拘拿審問。直認不辭。雖戒勸再三。仍堅執不從。施以毒刑拷打。周身

血流肉飛。惟存呼吸之微氣。尙勉力高聲曰。此刑何用。我已情願受苦。安心致命。以報天主耶穌。王命地方官監守。務然盡法嚴辦。官至聖人家中。將一家大小。同押解法場。以動聖人之心。豈知其志愈壯。其心愈樂。卽將聖人縛於馬尾。亂打狂馬前奔。粉骨碎身而致命。時天主降生後二百五十八年。

宜行之德 輕世

世俗之律。與耶穌之律相反。世俗以好善行德爲名。而實則貪利求榮。不論作何事業。所重者富與貴耳。耶穌曰。輕財自卑。吾必尊之重之。世俗以雪恥報仇爲體面。聖教以受辱愛仇爲尊榮。又專心愛世者。只顧風俗。或有議云。此係惡風壞俗。必強解云。普通公行之事。何必抗逆輿情。因而放心大膽。不管耶穌聖訓。行惡不爲非。拒善不爲罪。似此同乎流俗。合乎汚世。而不肯悛

改死之日哀哉。

當務之求 爲迷於世俗者

祝文 懇祈全能天主。吾敬憶爾聖禧波里多致命者誕日。賴其轉達。使吾剛健於爾名之愛。爲爾子吾主耶穌基督。亞孟。

⊙十四日聖歐瑟伯鐸德致命

聖歐瑟伯是羅馬國之人。爲教中健全份子。因其才德並優。漸歷神階。陞爲鐸德。時遭外患。道大莫容。教中受其影響。凡遇難之教友。聖人巡遊勸勉。扶助其勇。堅固其心。以救靈魂。上聞此事。嚴拿究治。命用緩刑。囚於深獄。遍身拘執。身外無餘之地。在此七月之久。所遭艱苦。難以言狀。寸步不能自由。惟有能自由者。其心與舌而已。所以七月之中。無時不以口舌贊揚天主。無刻

不以誠心感謝耶穌。視苦如飴。雖刀未加其身。血未流地。終以此刑被斬致命。時天主降生後三百五十七年。時有二鐸德。一名額我略。一名阿羅瑟。脫身躲避。官只獲額我略到案。命活埋於坑。阿羅瑟急回。掘土救之。已經氣絕升天矣。

宜行之德 真心愛主

我們的四肢百體。靈魂三司。俱是天主造的。所以思言行爲。亦全是天主的。譬如一根樹焉。若是你的樹上長的枝。發的葉。開的花。結的菓。件件都是爲你所有的。人之五官百骸。靈魂三司。亦如樹上的枝葉花菓一般。明明都是爲天主所有的。宜該全心全靈全力全意。愛天主在萬有之上。今以天主之物。不爲天主之用。不肯歸還天主。反竊取而私用之。罪孰甚焉。

當務之求 爲冷淡者

祝文 伏祈全能天主。吾敬憶爾聖歐瑟伯鐸德致命者。誕日。賴其轉達。加力於吾。愛慕爾名。爲爾子耶穌基斯督。亞孟。

⊙十五日聖母蒙召升天

耶穌升天之後。宗徒團謹遵遺命。布散於環球。傳教於萬邦。聖母依靠聖若望宗徒。聖若望以孝子而事之。十有五年。慈母精修至六十餘歲。親見聖教廣播。耶穌聖名顯揚。每有脫離塵世之思想。而自歎曰。吾世願庶幾足矣。所不滿者。常面吾主。與親吾子耳。觀念時切。精力日衰。禱告無已。於是天主使其天神。報以升天福音。次令宗徒。或遠或近。一時畢聚榻前。不速而至。不約而齊。聖母視之。慶幸不勝。告衆以歸天之期。諸徒聞言。悲號特甚。聖母慰之。

遂見耶穌率無量神聖。降臨迎之曰。申爾福瑪利亞聖母。苦冬已去。福春乃至。茲吾慈母。理宜離此垢地而躋青天。爾居人中。常行神事。惟天國是懷。聖父明鑒之。故諸神亦從我來。迎歸本鄉。以登永定之位也。聖母聞聖子之音。歡感非常。乃端容正體。仰天以掌合十字。言曰。我乃上主卑婢。雖無功德。希惟施及於我。如主之言。遂如寧寐。毫無憂苦。惟愛慕聖子之情。如火益烈。百倍熾然。卽同耶穌騰升於天。時正夏季望日。謹按聖壽。至耶穌升天。四十有七。從耶穌升天至茲。一十有五。雖在世總數。諸史未載。而約之六十三歲云。聖魂甫出時。耶穌接其升天。上下羣神。圍繞護送。述其功德。頌其靈事。且位高乎神聖之上。爲天地之母皇。坐於耶穌之右。聖軀離魂之後。鮮澤馨香。致令遐邇諸聖。發表歡愉。天神降臨朝禮。慶頌奏樂。音韻鏗鏘。三晝連宵不絕。

諸徒咸各快憂感慕。伏地瞻仰而謹殮之。是時遠近流傳聖母升天。高士雲集。籲禱不已。次日平明。諸徒扶柩赴葬於熱色瑪尼山。有一兇人。在中途舉手於棺。正想摧殘而辱之。天主輒顯其罰。手忽自斷。而膠於柩。兇人自驚異。刑痛悔求赦。聖伯多祿宗徒默求聖母慈佑。令兇人自就所斷之手。命之果然完好如故。兇人偕大眾共謝聖母之恩。墓禮既畢。卽以重碑封誌其山。諸徒居墓。三晝夜不離。而悲哀思慕之中。常聞天神贊頌。以歌樂之妙音。聲徹九宵。響遏行雲。一班宗徒亦頌其德。唱而和之。宛轉抑揚。時惟聖多默不在。乃亦不期而來。於葬後三日忽至。必欲瞻望聖屍。聚衆徒啟墓。既啟。不見聖屍。惟存殮服而已。遂驚異而誌之。從此古今聖賢。確信聖母之聖軀僅入死域。卽蒙耶穌光照復活以升天也。蓋此聖軀。終身貞潔。立聖德之表儀。又爲

天主所胎。本不宜久留污泥中。若使朽腐於塚。絕不相稱。天主耶穌復活時。併賜古聖肉身復活升天。何況於聖母者乎。此爲古今聖人篤信之端。無敢有猜疑者。其必待三日復活之意義。一踐聖子之迹。二驗身死之真。三待未至之宗徒。使親視其神澤也。

宜行之德 恭敬聖母

聖母身靈。全在於天。凡我生民。皆有依依。果能堅志向於天國。無求不得其護庇者。蓋天主對於聖母。愛之尊之。達至極點。交以天上地下之權。爲萬民之主保。遂其救世之願。耶穌之恩澤。俱由聖母而下。及於世人。故聖賢稱聖母爲天門。凡賜諸福。必由是而出。諸善士欲登者。必由是而進焉。捨此並無別門能以梯升。

當務之求 爲聖母會

祝文 伏望天主。赦爾僕罪愆。我等心志身行。弗能悅樂於爾。托賴爾子耶穌。吾主之母。因其升天之榮福。轉達俯允。特賜護佑。以致誠實。爲吾主基斯督。亞孟。

⊙十六日聖亞進多顯修

聖亞進多。是波羅尼亞國宦家之子。幼時。父因弟爲主教。在家納各斐城。卽託其弟訓之。聖人本質純良。聰明卓異。加以主佑。不數年。學業大成。連陞鐸德。適主教有去羅瑪之行。聖人跟隨而往。及至。聞聖多明我之盛名。且目睹其復活一世家之死子。聖人卽稟主教。遂進聖多明我會內。是時年方三十四歲。聖多明我教以克己恨己苦己之道德。潔淨靈魂。輕世輕榮。念茲在茲。

仰對耶穌。併敬奉聖母。倚靠其大能大德之力。遵守新規。聖人注意奉行。其思言行爲。皆以熱心愛主愛人爲主義。半年後。主教事畢欲回。聖多明我將聖人送還。向主教云。令姪德修大著。可同回故里。廣揚新會。歸後。主教給一聖堂。聖人立院以居。修士不數月。改良陋習。城中人士。敬領聖體。虔事聖母。非似從前懶惰驕盈之態度。天主又賜能顯聖蹟。有一體面之人。過河淹死。聖人當衆人前。命其復活。如此光榮。愈卑愈遜。刻礪之工。有加無減。身不離苦服。就地而眠。石塊爲枕。習以爲常。誦祈講勸。慰病救窮。日無寧晷。新院旣成。就派學業之士有可觀者。分往奧國。布國。俄國。各方面宣道。隨處建造修院。以聖蹟。以表樣。以德。行。救人甚多。一日聖人在攝別爾河邊行走。偶見對河岸上。有無數人跪於樹下。必是異端。心痛憐憫之甚。但無船可渡。卽從水

面穩步過河。衆見此奇。莫不傾心受教。又居俄地覺未斯基城之靜院。忽被蒙古人破城。虜殺焚燒。聖人正在此城。舉行彌撒。聖體已成。聞變倉猝。卽收聖體於盒。所供聖母之像。重約八九十斤。聖人右手捧盒。左手持像出城。至攝別爾河。又無渡船。仍從水面。直奔彼岸。日行數百里。安返本城院內。聖人一生奇行。不能盡述。年至七十四歲。親見聖母臨示云。爲時不遠。還該勉力加工。升天之期。汝必預知。又一年。天主默示。在聖母蒙召升天瞻禮。卽傳齊本會之人。告曰。汝等當記得天主前。無一事爲小。神貧潔淨。救人靈魂。皆合耶穌聖意等語。隨領聖體終油。甫畢。靈出上升。時天主降生後一千二百五十七年。升天之後。聖蹟更多。

宜行之德 忍耐世苦

天主常用公災。以儆人非。以明主訓。若准賜其災。必因世福害我。特賜苦以禦之。苦卽是恩也。非災也。天主愛人行善立功。必先責人改過。所以病窮卑賤。或因失貨財榮華之害。皆是引人悔悟。戒人毋戀世樂。如火鍊銀。去其潮色也。旣知如此。偶遇艱窘到身。就該認爲寵恩。宜倍加歡感。欣然順受。不可憂愁抱怨。

當務之求 爲享受世福者

祝文 天主。以爾聖亞進多。每年瞻禮。樂我等。懇祈爾。吾旣慶厥誕日。幸師厥功勳。爲爾子吾主耶穌基斯督。亞孟。

◎十七日聖羅閣隱修

羅閣聖人。是法國蒙白里城宦家之子。父母敬主熱心。勤於家庭教育。歷十

餘載。相繼而亡。聖人道德高尚。品格超群。專以事主愛人爲己任。年十九歲。發表慷慨之心。犧牲財帛。將其家產濟貧。遊歷意國。路經羅瑪。適當時疫流行。死亡枕席。觸目皆然。大憐憫之。就入醫院。服事病人。一畫聖號。斯病立痊。所到城鄉街市。病者莫不回春。他因怕人讚頌。故卽潛往意國。後在巴肋桑城。發生癘疫尤甚。欲救羣民之患。遂入醫院。就生大病。痛楚不堪。力疾扶痛出城。強至樹林。在一草蓬待死。此林附近。有一富家名我達爾。他之獵狗。是日到席前。啣麵飽一塊。送與聖人食之。降福此犬而去。次日仍然如是。我達爾跟隨此犬往觀。聖人急止之曰。我乃瘟病之人。不可近前。請公回去。我達爾回家。思想自慚。再謁聖人。堅要服事。奉之爲師。聖人教以棄財濟貧之法。其人果然遵命。不數日。聖人痊愈。告別回國。及抵本城。其叔當本城之官。正

值戒嚴時代。派兵守城盤問。聖人隱諱姓名。見其形迹可疑。誤認以爲奸細。拏之投於黑獄。聖人喜樂非常。甘受苛待。五年於茲。惟默祈不斷。後知臨終在邇。求差役代請神父來監。領聖體終油而逝。神父見其面發大光。知爲聖者。告於其叔。同來觀之。見其身旁木板。有字書曰。凡患疫者。求羅閣轉達必痊。再解衣見其胸上。有十字紅痣爲號。其叔始知親姪。痛哭無已。且恨自己不能認識愛之爲憾。於是殮葬城內經堂。時天主降生後一千三百二十七年。凡求之者。收效繁多。

宜行之德 甘受世苦

聖人羅閣將及青年。已有看破世情之眼光。棄財離俗。喜服事瘟病之人。不遺餘力。甘受虐待如犯人。不生抱怨。無非仰承慈主之訓令。甘負其十字架。

我們多人。見了疫症。不但不肯服事。畏其傳染。而且不肯受苦。將來世末。救世主之十字。發光榮於空際。我們何能逃此審判。

當務之求 爲瘟病者

祝文 請衆同禱。天主。爾允聖羅閣愛切之求。命天神賜之表記。永作瘟病之主保。凡因聖人之名。求其保佑者。不受瘟疫之害。我等懇祈爾。賜我等記念其聖名。以其功勞。及其轉求。免我等神形諸疫。爲我等主基斯督。亞孟。

十八日聖后赫肋納守節

維時羅瑪。分爲東西二國。現今英法之領土。皆屬此範圍之內。西君馬濟密亞諾。舉大將公士當斯爲副君。聖后爲副君之妻。懿德淑賢。原奉公教。自副君駕崩後。聖后之子公斯當定繼位。是時三十餘歲。英雄俠義。氣宇軒昂。雖

其尙未信教。亦用在教之官。國中人士。感情甚洽。行將大有可爲之君。適馬濟密亞諾之子馬三思當羅瑪帝位。爲人暴虐。殺害信群。公斯當定。惟以武力保護公教。憤起義師。下動員令。統率法軍。兵臨羅瑪。所慮軍隊單薄。恐難得佔優勝。忽見天上有大十字發光。書曰。以此旗必勝。又見耶穌顯現。於是遵照形式。製造十字旗幟。不數日。兩軍會戰於疆場。法軍以十字大旗引導而行。臨風飄拂。大壯軍威。衝陷敵營。馬三思陣亡。公斯當定揮兵入城。稱爲羅瑪西君。立母親爲太后。是時東帝李習尼爲君無道。摧殘公教。西君勸阻。置若罔聞。遂起勤王之師。選精兵十三萬。進攻東國。李習尼亦選精兵十七萬。以備迎敵。西軍遠役勞師。東軍兵力雄厚。原佔優勝地位。竟出意料之外。不數日開仗。公斯當定。惟以十字大旗是賴。揮軍衝其左右二翼戰線。交鋒。

未及六小時。已攻破其大本營。殺敵數萬。奪械無算。東軍棄甲拋戈。望風而竄。習尼一敗塗地。獻城投降。遂將兩國併爲統一。是時公斯當定。年略五旬。隨後領洗。從此國勢強盛。聲聞洋溢。公教發達。正道昌明。聖后非常喜樂。帝甚仰承母意。撥出財政。多建聖堂。以榮上主。聖后又生觀念。昔聞救世主之苦架。埋在近墳之地點。決往耶露撒稜尋之。帝派御舟。又委兵將。護送慈駕。既至加爾瓦略之山。卽命掘土。尋起十字三架。牌一塊。牌上有紅字橫書曰。耶穌納匝肋猶太人之王。又有長釘三枚。聖后知此三架。是主與左右二盜之刑者。但未能分辨。協同主教。召衆入堂祈禱。有一婦病危。將架次第置其身上。二架無效。附第三架卽痊。次日又將此架置於屍身。當時復活。顯然分明。詳見於五月三日。聖后沿途多行各種慈善事業。完畢返都。美德日著。越

三戰患病領全聖事。叮嚀詰誠遺囑於帝。自托慈主安和福終。時天主降生後三百二十八年。

宜行之德 維持公教

聖后之德優美。致產賢孝之子。公斯當定爲英明之君。其始非在教之份子。而竟有俠義之精神。專以武力擁護公教。不怕危險。惟靠十字。所以戰無不勝。攻無不克。一統山河。榮膺帝位。棄邪崇正。上行下效。全國奉從。此後凡遇有仇教風潮。我們宜堅持到底。不肯信德。效學賢君。不怕危險。我們寧願犧牲爲主致命。

當務之求 爲劣弱之教友

祝文 救吾者天主。聽受吾禱。吾樂爾聖后赫肋納守節瞻禮。望以誠心。受

其訓誨。爲爾子耶穌基督。亞孟。

◎十九日聖類思主教

聖類思。是納伯里國王之子。此國王原是法國王族份子。聖人雖爲儲君。自幼不同於衆。世俗之榮。無心思想。惟以愛主愛人爲己任。言行端莊。形神肅謹。甫七歲時。乘他人熟寐。私離牀褥。臥地以苦己身。每日到堂誦禱。默存一二時。至十四歲。被西班牙國王。俘虜聖人之父。以歸。聖人以身贖父。旅居七年。調和兩國紛爭之事。竭力疏通。得以冰消瓦解。此七年中。分外熱心。日行告解。因定志守貞。常求聖母保護。爲剋己私。無法不用。苦帶粗衣。多齋薄食。以收潔德。每逢婦女之面。則掩目而過之。以淨觀瞻。每日默想耶穌之大道。最喜憐貧顧病。力行不倦。事平回國。西班牙國王。欲以公主配之。但聖人前

在病中。曾許愿入聖方濟各會精修。故聖人之父。辭婚不允。及聖人定期入會。院長不敢遽從。後因父王稟命於教宗。授爲鐸德。卽陞爲多羅撒府主教。飭令勿辭。不得已。勉遵赴任。蒞事後。將供應之資。扣除自養之外。其餘撥爲濟困修堂之用。每日招待二十五人食餐。親身服役。常在經堂講道。勸慰衆心。但聞有冷淡地點。卽往顧之。用良善之表。恢復衆人熱心。所屬之處。民風大變。年二十四。欲辭主教之任。以酬前愿。天主默示終期。遂卽力疾加工。仰承主命。室中鐸德。連日舉行彌撒。至聖母蒙召升天瞻禮。強起領聖體。誦聖母經。或問之。答曰。因死期已至。聖母助我升天。語畢。瞑目而逝。時天主降生後一千二百九十七年。歿後。口吐玫瑰花一枝。奇香撲鼻。旁人共見。一修士相隔甚遠。仰觀半天中。許多神聖。護送聖靈上升。葬後聖蹟甚多。死而復活。

者十人。其他不能備錄。

宜行之德 端莊

端莊之德。係爲人表面之品。奉教者該預備於身。而發於表面。以動人之觀瞻。因耶穌之像。耶穌之表。俱傳留於奉教人。若然身在教中。而言行在教外。如何繼續效之。且天主無所不在。時時鑒汝。明若觀火。護守天神。須與不離。常常伴汝。若汝舉動不端。如何有顏對越。更有甚者。倘若汝不端莊。朋友親鄰。處處宣揚。子孫僕役。耳目難欺。又何以感發人心。挽回陋習。所以端莊爲教中人要緊之德。

當務之求 爲童穉人

祝文 懇祈全能天主。爾聖類思精修主教。每年瞻禮。加吾心虔而體安。爲

爾子吾主耶穌基督督亞孟。

●二十日聖伯爾納多隱修聖師

聖伯爾納多是法國人。父母事主最誠。產子必獻於聖臺下。共生六子一女。聖人行居第二。自幼孝親敬長。克己律身。學力神工。與年並長。及母去世。年已富強。魔常誘以狡童淫女。不遭其害。且懲責之。嚴寒時。猝逢一美女過目。深悔己非。裸體跳入凍池自責。至二十三歲結伴三十餘人。潛投山院。不畏嚴規。專心精煉。居室兩年。從不仰瞻屋頂。入堂數戰。未知牕戶有無。行不坐騎。飲不知苦。受食難於受罰。守口勝於守城。衣最劣而潔淨非常。眠不熟而鼾聲全無。視己如僕。敬人如師。不因外務。以斷神工。每因萬物。而通性理。交友不知其短。待人必過於寬。自聖人入院後。四方就學。來者如雲。另於僻野。

立院以居。房屋極卑。飲食極薄。衆修士先難後易。視之如父母天神。耶穌常親臨眷顧。院中之當家。是聖人親兄。一次絕糧告急。聖人慰之而去。頃刻一婦獻金。求痊夫病。聖人謝主求恩。諭云。汝歸卽愈。後常舉此爲勸。不必專謀日用。自有慈恩養育也。聖人之父。鰥居年邁。聞山院名。從遊終老。聖人之妹。問候父兄而來。拒而不見。自悟美粧車馬之非。改後纔見。此婦從兄之勸。訓。隨後亦入女院隱修。由此而推。可知聖人上求天主。呼吸相通。下與世人。剛柔並濟也。遇有謗害。受而且感。一人願學未誠。姑令暫歸。其人怒極。掌擊聖人之面。聖人和言悅色送之。院旁房地十所。被人霸佔不還。聖人拱手讓之。倍加親愛。有兩國爲小怨而動兵。聖人力疾往和。惡感全消。卽此數端。已足見其愛仇排難。出於自然也。論其聖蹟。更難歷數。在一鄉村。一日內。開啓

者十一人。起癱續臂二十八人。又至一府。三日內。開瞽十人。跛足能行者十人。二人瘖啞能言者三人。一日講道將完。有人獻麪餅數枚。聖人祝聖畢。語衆曰。爲證聖教之真。病人食此少許。必愈。衆爭取之。無病不痊。一人患病失音。聖人求主。醒而復迷。聖人知其隱非。責云。藏不義之財。誤人大事。豈能安死。病人驚起送還。昏迷卽時復醒。多羅撒地方。一人痿痺將斃。聖人畫十字求主。立起。追隨卒世。米郎府一女負魔。聖人於彌撒中。恭捧聖體。叱曰。吾賴天主聖威。命汝速去。魔卽呼號而遁。巴未納郡。一婦負魔求救。魔曰。古聖西祿。尙不能逐我。况汝之野夫耶。聖人云。西祿未能逐汝。我自然不能。耶穌是造物大主。難道不能逐汝麼。魔卽潛奔。都中兩族失和。適國后以乏嗣請禱。聖人知不和之故。俱由於后。卽云。不傷人和好。可望主恩。后從之。果如所望。聖

人所用之物件。及餘剩食品。皆能治病祛邪。仰惟聖人盛德神能。無可幾及者也。雖有疑難之事。亦能辦到。一千一百三十年間。適教宗駕崩。有數位紅衣大臣。推舉因諾桑繼位。亦有多數反對之徒。另推亞納格接統。又有英意等國爲助。故因諾桑移居法國。法君猶豫不知從誰。因諾桑遂召集各方面主教團。大會議於法蛾色黑城。有總主教十三位。主教二百六十三位。院長無數。聯袂而來。推舉聖人出席。討論明白。一致悅服。皆從其議。承認因諾桑爲正統。拒絕亞納格。聖人奉使。將通過情形。說服各王。擁護教宗。勸化裂教。不遺餘力。又創建修院一百六十間。教養修士。造就人才。不能勝數。著述言論。極其卓絕。義理精深。文詞大雅。迹其一生之德能。惟以聖母爲母。故百無一失。聖人病瘡。遣徒入殿。求聖母未回。忽見二聖隨從聖母而臨。手除其病。

非平日孝思誠切。何有若斯之宏恩耶。年六十四。終期在卽。同志門人。奔來送終。聖人勸勉訖。正容仰目。呼耶穌聖母數聲而逝。時天主降生後一千一百五十三年。墓前救難驅魔。施恩無數。

宜行之德 恭敬聖母

聖伯爾納多。最熱心敬愛聖母。自稱爲聖母之子。處處引人。事事贊美聖母。敬之孝之。以滿人子之本分。當知聖母。非僅一聖人之母。亦爲我們之母。今請問吾人。孝敬何在。果能善繼聖人之志。善述聖人之事。以顯母教之光榮否。果能事事引人贊美聖母否。有此無求不得之母。必該如聖人之敬愛。斯可以謂孝矣。

當務之求 爲亡者

祝文 天主。以爾聖伯爾納多。每年瞻禮。樂我等。懇祈爾。吾既慶厥誕日。幸師厥功勳。爲爾子耶穌基督督。亞孟。

◎二十一日聖婦若翰納守節

聖婦若翰納。是法國世代官家之女。自幼忻勤聖學。穎悟聰敏。甫五歲時。有一官員。親執禮物至家。與其父談話。有裂教之說。聖婦以正道排斥之。隨將所送禮物。投於烈火。直云。裂教之徒。不受聖會之訓。亦將有若斯之受罰矣。其母早亡。聖婦以聖母爲母。闔族誘以世福世榮。聖婦毫無動念。願守潔以終身。奈母已亡。父卽許配名門。嚴命難違。婚禮之後。聖婦謹從夫命。料理家務。教訓兒女。待僕最慈。常訓以緊要之端。居家遵守聖規。竟如修院。施捨濟貧。扶危拯急。盡其所有以救之。天主鑒其樂施。屢顯聖蹟。增其所缺之糧。不

數年。夫與親戚遊獵於外。悞被中鎗身亡。聖婦從此立志守節。不獨恕夫之仇。反爲倍加愛敬。夫仇之子領洗。聖婦會爲代母。更彰其愛仇之德。克己最嚴。衣食極薄。華服首飾。變賣濟貧。時聖婦之父尙存。勸其改嫁。聖婦不從。每日神工之外。或教訓兒女奴僕等。或經營家務。更喜歡服事病人。室內竟如病院。凡殘疾之人。藥食則治之。顧之。衣裳則洗之。補之。勝於慈母之愛子也。蒙聖方濟各指示規則。創立一會。取名曰往顧。猶聖母往顧聖婦依撒伯也。卽求爲本會主保。仰見聖婦終身所爲。及布置本會之原義。實與會名符合。嚴守會規。神貧甘苦。謙卑聽命等德。難以形容。天主默啟其明司。遂著書教訓修女。無不凜遵。新會於是廣行。貞女節婦來從者甚多。爲顧病窮衰老。殘疾孤獨之人。建院共有一百六十餘所。各處又立女學。以教愚蒙婦女。卓有

可觀。民風大變。德全功高。天主默示終期。集衆修女。訓其虔切愛主愛人。祈禱齋克。端莊貞潔等德。語畢。虔領祕跡而終。年六十九歲。時天主降生後一千六百四十一年。

宜行之德 受苦

每見惡人在世。富貴尊榮。貨財逸樂。刻不離身。此非奇事。卽彼以爲天堂故也。天主至公。惡人雖惡。未必事事皆惡。總有一二好處。好處卽報以世福。豈知此福乃永殃之實據也。哀哉惡人。不管身後。強言天堂地獄。就在眼前。果然惡人或享世福。猶如彼之假天堂。原在眼前。善人或遭世苦。猶如彼之假煉獄。亦在眼前。因爲惡人不怕真地獄。故愛眼前福樂。難道汝亦不愛真天堂。反怕此眼前困苦麼。

當務之求 爲愛人

祝文 救吾者天主。聽受吾禱。吾樂爾聖若翰納節婦苦修瞻禮。望以誠心。受其訓誨。爲爾子耶穌基督。亞孟。

● 二十二日聖性福良幼童致命

聖性福良。是法國人。父母熱心敬愛天主。常向子女宣揚天主仁慈。講解古今聖傳。故聖人自幼專心爲主。樂於致命。其聰明熱愛。事主待人之恭敬謙和。儼然有老成難及之態度。諸童之中。無有可與之比較者。一日異端人迎神賽會。人皆跪敬道旁。適聖人相遇於途。衆見其昂然不跪。卽以其輕慢告官。官問何名。聖人答云。我名性福良。是天主教之人。官曰。你怎麼說天主教。你雖是幼童。豈有不知國家之王法麼。聖人云。我知道明白。雖國家之王法。

亦不能強我不敬天主。不能強我跪拜邪神。官怒。鞭責收監。越數日。又提審。勸云。汝若遵國命。背天主。必蒙厚賞。聖人云。國家之賞。不過一時。天主之賞。無盡無窮。官見其堅執不移。定案斬決。解赴法場時。其母聞知。奔城垣上。遠見子來。高聲勉勵曰。我兒我兒。天主無窮之永賞。早預備於天堂。不過頃刻間。就能到手。聖人聞母之言。愈增神樂。行至受刑處。謝主大恩。欣然受斬。時天主降生後二百七十年。

宜行之德 常想暫生

人之生命。猶如石火電光。一瞬而已。日月東西。疾如箭砲。纔說起頭。已經過去。汝若不信生命如此之速。請問汝幼年時之樂。如今何在。問汝從前受過之福。可能回來否。生命不獨短促。福樂不獨速去不來。還離不開苦難憂愁。

有一日生命。卽有一日苦難奉陪。有一分福樂。更有十分憂愁對待。聖奧斯定曰。惡人惟愛生命。該愛者反不識。獨聖人明知該愛之事。故不愛惡人之所愛。

當務之求 爲幼年人

祝文 懇祈全能天主。吾敬憶爾聖性福良致命者誕日。賴其轉達。使吾剛健於爾名之愛。爲爾子吾主耶穌基督。亞孟。

二十三日聖斐理伯伯尼弟顯修

聖斐理伯伯尼弟。是意大利亞國人。自幼承慈母之教育。敬主愛人。端莊謙下。精通文學。後往法國巴黎京城。專攻醫學。去巴都哇府醫科赴考。中式而歸。一日默聽彌撒。聞鐸德誦曰。斐理伯。來近此車同行。聖人凜然心動。猶如

面命耳提。際此沉思靜想之時。忽見曠野石山草柴堆積。驚駭不寧。大聲呼主。空中又明諭曰。斐理伯來近此車。仰目視之。見一輛四輪大車。獅與羔羊各一。駕車而行。聖母端坐車中。頭頂飛鴿。周圍翱翔。諸神羣聖環伏。聖人不解其故。默跪誦經。求至半夜。聖母顯容諭云。四輪車。卽是我新立之會。汝該離家入我新會。天明。聖人卽奔投會院。求爲傭役。不言功名。一年後。院長嘉其才德。差往別院。表率衆人。途遇聖多明。我會中兩位鐸德。見聖人才品不凡。向新會大會長薦之云。爲何不用他爲鐸德。查明來歷。方知謙諱自卑。聖人旣受鐸德。愈顯德能。不數年。舉爲總會長。定意必辭。蒙主默喻。勉順輿情。任事六月。竟力辭之。衆皆不允。親往羅瑪。陳情於教宗。路遇一痲瘋人求濟。聖人脫內衣覆之。斯人立愈。聖人謝主寵恩。并求離開重任。適教宗格肋孟

德第四駕崩。衆紅衣大臣欲推舉其繼位。聖人聞知驚惶無措。同二鐸德潛於野山峒內。常泣常禱。夜則定心默想。此處無水。聖人用杖擊石三次。石開泉湧。至今不斷。土人稱爲斐理伯泉。時聖人食惟野草。飲惟此泉。俟教宗得人後。天主默示同二鐸德遊歷意法德奧等國。宣傳聖母新會。引人愛慕。過數年。仍回本處。德名日彰。自知終期已近。至聖母升天瞻禮。覺有不安。領聖體終油。衆人在旁誦禱。忽然昏迷如死。過一二時。猛醒曰。我心甚難。魔欲誘我失望。發顯我一生所犯之罪。幸耶穌瑪利亞逐退邪魔。保全永福。你們須要仔細。邪魔害人。無法不用。惟有謙淨仁愛。可以逐之。語畢。問自己之書何在。衆皆不知。聖人指明。旁人卽捧送之。乃耶穌苦像也。口親五傷數次而終。時天主降生後一千二百八十五年。未殮之前。奇香滿室。夜間大光如晝。將

葬時。復活二死人。一啞者能言。一痿者卽起。其餘聖蹟。不可勝數。

宜行之德 認己

人人有己。而不能認己者最多。因不查己意。己私。己言。己行故也。所以修身之首務。全在認己。不認己。不知病根。何以治之。聖伯爾納多曰。汝能審己如審人。包管一生。該痛哭悲號者惟己耳。聖奧斯定曰。認得天主之人。還求天主。賜他認得自己。蓋認己者必愛主。認己者必恨己。此係升天之要路。捨此並無捷徑。

當務之求 爲代人祈主

祝文 全能天主。以爾聖斐理伯伯尼弟謙卑之表。治我傲慢。懇祈主。使我藉其大勳。輕視世榮。仰企儀型。追隨芳躅。賴其轉達。賜我遷悔恒心。得獲天

堂永樂。爲爾子吾主耶穌基督。亞孟。

⊙二十四日聖巴爾多祿茂宗徒

聖巴爾多祿茂宗徒。是猶太國人。雖微業營生。而留心道學。幸遇耶穌。收入聖門。絕俗精修。選入宗徒之列。耶穌升天後。諸宗徒傳教各方。聖人往理加阿尼亞國。開教闢邪。施仁顯蹟。信者繁多。又過北印度。抵亞爾默尼亞都城。遂居於此焉。都中有大廟。廟有邪神。能說未來之事。除災病。作禍福。揭陰謀。公行數百年。通國被其昏迷。自聖人入都後。魔像不言不動。人皆異之。往問鄰郡之魔。魔云。都中現有耶穌門人。巴爾多祿茂宗徒在此。故不敢如前舉動。又問。此人何容何服。現居何處。答云。其人好髮美鬚。巨睛貴鼻。高額和顏。白面素衣。周身內外之服。已穿過二十年。還是完整如新。萬國方言。不學而

能。一朝夕中。跪叩天主百次。左右俱有天神。遠近並無阻隔。我今開口。彼必知之。彼若不容見面。無法可求一晤。邪黨聞此神奇。連覓三日。踪影全無。一人久遭魔難。聖人憐而逐之。聲名愈顯。適國王博肋滿之女患病。禱求於廟。魔反入腹殘之。王聞聖人大名。延請入宮。魔去病痊。不勝感甚。遣官謝以厚儀。却之不受。時王閉門獨處。聖人忽至。執王之手。告云。我來不爲財帛。蒙賜厚禮。非滿我意。惟闢除邪妄。宣我真傳爲要務耳。因述天主造成天地。化生人物之全能。降生受難。贖罪救民之仁愛。欲堅王之心。約某日。令魔於衆人前。自陳來歷。言訖不見。次早。王遂傳諭某日。齊到某廟。及期。君民畢集。聖人亦至。命魔像自言。孰正孰邪。使衆周知。魔卽發聲曰。我非人物真主。亦非真主之臣。係真主永罰之鬼魔。來此原無好意。惟圖哄人尊我是實。汝等所聞

耶穌。乃天主真子。爲贖罪救民。故降生受難。迨復活升天後。宗徒敷教萬方。此人正是宗徒之一。不可不遵。言訖。衆皆懼悔不安。卽毀像拆燒。忽於像內。跳出一短黑怪形。面大而長。目黃發火。鼻冲黑烟。腮有亂鬚。腰束火帶。惡狀難言。衆皆戰慄。聖人命奔曠野。魔發巨聲而去。從此君民士庶。俱領洗守規。改邪廟爲聖堂。所屬十二城。爭先悔改。聖人夜以繼日。通國往來奔勞。處處飽受其恩。又選門徒代傳教化。以爲長久之計。正教雖然盛行。絕其邪黨權利。忿恨無已。加之鬼魔煽惑。大生惡感。有國王之弟。名亞斯弟亞日。分封外郡。素習異端。邪黨架詞泣訴。王弟暴怒非常。毫無顧忌。拿獲聖人。問其何故。擅滅我祖先之教。改立異門。聖人多方開導。難以挽回。命鐵條重鞭。剝去皮膚。肉爛骨露。流血成池。聖人怡然樂受。正言訓其門弟。專心求主。佑其神勇。

答後斬首致命。時天主降生後九十九年。葬時國王臣民如喪考妣。哀悼親臨。邪黨刑役。多數附魔殞命。餘黨盜取聖屍。置於沿匣。以沉海底。豈知天主全能。從海浪中飄至意國利巴里島。教中人士。謹殮葬之。

宜行之德 仁愛

天主遣使之入。必盡忠天主之命。以圖報効。惟知有主。不知有己。請看聖人傳教勸化。棄絕便宜。全離世樂。捨生致命。俱是爲天主的榮光。爲盡本分救人靈魂。汝曾如此盡忠天主否。汝曾如此救人否。當知救人之責。必該處之以智。行之以勇。智則無貳無差。有條有理。勇則不避艱難。不知憂懼。汝果具此二德否。嘗見汝爲世俗。爲肉身。狠聰明。狠勤力。多謀多算。敢作敢爲。到了天主的事。總不在心。懵懵然膽怯而畏縮。

當務之求 爲傳教者

祝文 無始無終全能者天主。以爾所賜之今日。慶賀聖巴爾多祿茂宗徒。瞻禮。懇祈天主。保存爾聖教會。所信卽愛。所誨卽傳。爲爾子耶穌基督。偕爾偕聖神。世生世主。亞孟。

二十五日聖類斯國王

聖類斯是法國之王。生而良善。舉動安和。世學相承。遵規領洗。母教甚嚴。嘗云。我所甚喜者。惟喜汝無罪。而速死於棺。不喜汝犯一大過。而羞顏於世。此言銘刻在心。後來作聖之基。卽從此始。年甫十二。父王崩殂。繼承大業。稱雄天下。及二十歲。舉行婚禮。生有數子。卽終身外寢。留心國政。大小咸宜。稍有不合教規。獲罪天主之行。或不近人情。妨害臣民之事。必力除之。自著平治。

修齊之典訓。道德言行之箴規。教訓子女。聖人齋期甚多。飲食最薄。寤多寐少。默想增工。苦衣貼肉。寒暑不更。本神父議其過於嚴克。遵命停止。每主日內散哀矜銀。最少者亦必至四百之金。每瞻禮七。必多加食物以享窮人。每日早晨。集窮人一百二十人。大瞻禮增至二百餘人。另延三老。供奉如尊長。至耶穌受難前。效法耶穌遺意。親濯窮人之足。治下以謙。處己以嚴。察吏安民。興利除弊。俗美風清。民安物盛。人知禮讓。路不拾遺。鄰邦荒亂。而王國獨太平豐熟也。地方遼遠。鞭長莫及。誠恐耳目未周。下情不能上達。定例冤枉告訴。晝夜不禁。曾有數次。薄暮出城。居於樹林中。親理民冤。一官強佔孀婦田地。自書假契。買囑二人爲中證。王能判明真僞。冤情遂白。卽此一端。足見聖人之洞徹奸邪。無微不燭也。當知種種盛德。皆從敬愛天主而來。今就可

見者而言之。耶穌茨冠。被總王當押於希臘國。聖人探知真情。特差兩位鐸德前往贖回。親率諸王大臣。步迎郊外。一見茨冠。俯身跪領。手捧入城。供於堂內。人人聽其瞻仰。此外又得十字架原木一大塊。鎖索與鐵鎗。鞭後所披之紅袍。架上送嘗醋膽之囊。皆珍藏於朝內天主堂中。至今世世守之。萬倍於傳家傳國之寶。溯耶穌升天數百年後。奉教國王。布滿寰區。且屢朝不絕者甚多。各般受難之物。多聚於聖王之國。若聖物之總庫然。可知聖王之敬愛。必有人所不知之內德也。隨後思想耶穌受難之地。被回回竊據。統率大軍征討。雖是英雄無敵。多年竟未得手。滋蔓難圖。返回本國。大修武備。又再出師。最後回王被聖王之嗣君所敗。求和立約。此第二次軍行。於土尼斯國。重病不痊。聖人自知升天不遠。遂召儲君趨赴軍前。囑云。吾兒聽我訓言。不

愛天主。不能升天。平常之愛。亦屬枉然。當盡心竭力。顯真愛於萬有之上。重罪乃人之大仇。寧甘萬死。斷不可犯一重罪。若天主賞爾苦難。不該辭避。只該謙忍樂從。視爲至寶。若天主賞爾安樂。不該驕傲。只該感恩順受。顯主光榮。當擇一位有德有才之鐸德。左右不離。告解維勤。聽命維謹。汝果謙心受教。可保靈魂之明潔。誦經祈主。必以心。以口。以身。併力而敬奉焉。貧病人宜急憐救。獻譽者斥逐之。務俗者疎遠之。再三諄囑。隨請鐸德。領告解聖體。終油。卽於是日崩駕。時天主降生後一千二百七十年。壽五十五歲。在位四十四年。發喪安葬時。聖蹟甚多。未幾。列入聖品。凡聖教流行之處。咸敬奉之。

宜行之德 熱心

聖王類斯。處尊位而能苦己。居高大而能謙恭。享富貴而能神貧。終身忻然。

樂而忘天下。又勝於棄俗離家之修士。克己愛民。萬德咸備。常將耶穌苦難。刻骨銘心。爲此專覓耶穌受苦之物。尊之若至寶。只知此身最卑最賤。而不知此身乃君乃王。惟知耶穌苦難之愛爲愛。惟將耶穌補贖罪人之恩爲恩。竟不知此身外有臣有民。有財有土。靠此大愛大恩。加以無過不改。有善必爲。尊榮不擾其志。所以成聖升天。

當務之求 爲教中帝王

祝文 天主。以爾聖王類斯。不貴世之所貴。保全己之真貴於無窮世。懇求天主。使我追隨聖表。弗顧世榮。惟務己之真貴。爲爾子耶穌基督。亞孟。

二十六日聖熱擲斯致命

聖熱擲斯是羅馬有名之戲子。觀者無不鼓掌喝采。總王欲滅聖教。喜其巧

粧新調。故將聖教事理。命其演戲爲樂。一日在總王前。演付洗病人之戲。派熱搦斯裝臥病求洗之脚色。豈知熱搦斯從前爲弄假。而偷學教中道理。如今爲道理。而明證弄假爲真。臥於臺上。豁然醒悟。大聲語衆云。我如今是真信天主之人。寧死不肯改我之信。僂界各伶人。仍以爲戲言。一裝鐸德。一扮副祭。出場演戲。熱搦斯呼號哀告曰。我實悔前罪。望天主仁慈寬赦。準我領洗。扮鐸德者。卽注水於其首上付洗。洗後。一人假裝官差。將其鎖拿於邪像前審究。旁人猶以爲戲。聖人此時。欲人人知其實情實事。乃正色直言曰。求總王與衆人。細聽吾言。從前乃偷訪教中事理。惟圖巧妙。悅人耳目。及輕賤教規之不合。恥羞衆之捨生。吾亦與衆伶人一樣。獨至今日。與前大不相同。幸蒙天主特恩感動。猛然一念。思想天主要理。最真最正。做戲領洗時。問

我信不信。我答曰。信。聲纔出口。眼見一手從天而降。四面天神環繞。光如太陽。手執大書一本。書中載我從幼時所犯諸罪。一位天神曰。熱搗斯。汝犯如此多重之罪。但領洗後。罪案全消。果然一經領洗。明見書中字迹全無。惟有白紙而已。天神又云。你靈魂如今潔淨非常。可小心守天主聖寵等語。這是我真實之言。王與衆人。當確信無疑。同我恭敬天主。替我感謝主恩。總王大怒。不許再言。交官鎖拿重笞。剝傷愈劇。守志愈堅。官用好言誘之。又以威刑恐嚇。聖人答云。汝輩敬邪神之人。能受人哄騙。怕人利害。我今不然。所信降生之耶穌。是普天下人物之大君。卽此救贖之仁慈。稱頌無盡。莫能比擬。我一下賤戲子。何罪不有。幸遇此恩寬赦。救我升天。應該重苦失身。贖我前罪。官遂據實上聞。奉命立時斬決。時天主降生後二百八十六年。

宜行之德 感謝領洗神恩

領洗時。天主赦爾原罪本罪。汝曾許過不從邪魔。不顧世俗。不順肉身之情。今自領洗以來。可能一一依從否。當知領洗後。卽爲天主之義子。若犯重罪。便是邪魔之孝子。汝今願從耶穌。或願從邪魔。若願從邪魔。請問三釘一鎗。受苦受難。救你贖你者是誰。以無窮無盡眞福。賞你者是誰。凡服事邪魔者。並無希望。若服事耶穌者。無福不備。領洗洪恩。宜感宜謝。更宜小心謹慎。若犯重罪。必當以淚洗而復原。

當務之求 爲新領洗者

祝文 懇祈全能者天主。吾敬憶爾聖熱搗斯致命誕日。賴其轉達。使吾剛健於爾名之愛。爲爾子耶穌基督。亞孟。

◎二十七日聖若瑟加納桑顯修

聖若瑟加納桑。是西班牙國望族之子。孩時。卽顯後來必爲大聖。秉性溫良。愛主愛人之德。早經著於童年。常集貧家之子於市巷。慇懃以訓之。及長。往瓦能濟亞府。攻讀聖教道學與哲學。因其聰敏非常。讀書數年。便成老練。遂陞鐸德。聲名遠布。有數處主教延請。輪爲輔佐。各主教所屬之地。一經聖人治理。莫不俗美風淳。暴戾狠惡者。皆變爲良善。行錯冷淡者。俱回頭熱心。聖人正默想時。天主令往羅瑪。救諸幼孩。聖人聞命卽往。倍加齋克。凡有大赦之堂。每夜往朝。就地而眠。休息片刻。卽起行神工。黎明後。非看顧病窮。卽勸慰困阨。適是年瘟疫飢饉盛行。死者甚多。聖人同聖加彌祿等。詳見七月十八日。於是同心協力。死者葬而安之。貧窮無靠之幼童。多立學校以教之。養

之大展英才。不獨名士多來取法。卽鐸德與神品班者。亦多就正焉。乃創立一新會。蒙教宗准定會規。立聖人爲新會之總長。給聖堂一所。大院一間。此會廣行。惡魔妒甚。百計阻滅而不能。在五十二年之內。所受艱苦。人皆擬其有似於古聖若伯者。至於立德立功。不辭賤役。或啟蒙灑掃。或除穢洗衣。種種神業。刻無寧晷。後回本鄉。天主鑒其功德。賜顯聖蹟甚多。或直透人心之隱密。預知未來之事。屢蒙耶穌聖母降慰。護守天神及諸聖人。亦常現形施訓。年九十二歲。天主默示終期。虔領祕跡而終。時天主降生後一千六百零八年。葬後顯聖蹟更多。

宜行之德 教訓幼童

聖經云。人從幼時。慣習何道何行。雖年至耄耄。少有改易者。故聖教切務。就

是教訓幼童。使其慣習愛天主教救靈魂之道。長成自然。每見教中子女。只曉畫聖號。口念數端經言。若問他天主有幾位。那位降生。怎麼救贖。死後永賞永罰。靈魂肉身之始終。一概不知。更有甚者。連聖號也不曉畫。一句經也不曉念。常見直到三五十歲。或七八十歲者。均有之。問其故。答云。幼時未學。豈不爲之浩歎者歟。

當務之求 爲助慈善者

祝文 天主。以爾聖若瑟加納桑。每年瞻禮。樂我等。懇祈爾。吾既慶厥誕日。幸師厥功勩。爲爾子耶穌基督。亞孟。

◎二十八日聖奧斯定主教聖師

聖奧斯定。是亞斐利加洲人。父名巴弟。母卽聖莫尼加族。俱尊貴。家更富豪。

父迷於異端。母原是正教。勸夫教子。聖德非常。聖人未及青年。智慧極其絕倫。精通文學哲學之書。獨於道學無心留觀。忽染重病。旁人急欲付洗。母慮其病好改變。決辭中止。愈後。邪徒繼續誘之。醉於聲色快樂。果然蒙蔽日深。母竟朝夕悲號。再三懲勸。遇高人長者。必求其督責。後因無益。以不教爲教。譴之逐之。蒙主默示。將來歸正有日。母復容留。年至二十五。念切功名。潛奔羅瑪。越二年。博學有名。召充教育部長之職。在米郎府之時。聖師蓋玻羅削爲此府中主教。幸蒙接洽。往來談論。神目漸開。母特航海至米郎府。痛哭求之。蓋玻羅削聖師慰曰。此涕泣之子。必蒙上主矜全。不必傷痛。一日。有友談聖安當苦修行實。聖人觀念才學。毫無關於德行。大爲歎息。偶往小園。獨遊樹下。忽覺心志不安。頓生悔恨。仰天號泣曰。吾天主。吾恩主。可憐我罪人。自

棄自殘。至於今日。還不該定志改遷麼。忽聞空中大聲明示曰。取書讀。取書讀。聖人驚惶無措。見保祿聖經一部。在旁取讀之。內有勿恣酒色。妒爭。溺愛己身。惟效法耶穌等語。時蒙聖佑。忽然醒悟。決定方針。操行道德。遂往告於聖盎波羅。願受教規。次早領受聖洗。偕同主教。唱和讚頌天主之詞。時年三十。有三母見聖人歸正。東裝還里。未及登舟。向聖人云。主命至矣。可就葬我於此。果然病發而終。聖人葬訖。即歸。遂僻居郊外。克己精修。又著論天主聖三之奧義。一日行至海邊。見一童以手開穴於沙上。堯水注之。聖人問其何意。答云。欲取盡海水。聖人笑曰。難矣哉。童曰。以人之明悟。欲窮究三位一體之道。更難矣。言訖不見。聖人即知此童是天神。感謝天主施教焉。主教聖瓦肋略。聞聖人之名。陞爲鐸德。定於身後接任。聖人接任後。倍加勤慎。衣服

飲食俱極淡薄。濟貧囊盡。卽變賣堂中珍器以給之。屢駁裂教。雄辯無敵。彰明真道。闡發妙言。化異端。正風俗。不遺餘力。保全善類。交接賓朋。從未論人長短。每云毀謗之言。如一利刃。受傷者三。傷己之心。傷人之名。傷聽之耳。可不戒哉。食餐之時。旁派門人誦經。以減口腹之歡。行各神工之外。不使片刻餘閒。必著書立論。以助人之不及。著書甚多。然辭讓謙遜。不肯自信。往往就正於人。或自行修改。稿雖成而常常數易。其敘悔往失。做策猶深。年七十餘歲。奮勉益加。舊著諸書。復行研究。覺從前毫無效力者。又數年。海賊圍城危急。誠心望主施恩。自知終期在卽。惟記幼年罪愆。痛泣悲傷而逝。年七十六歲。秉理教政三十六年。葬於大殿。時天主降生後四百三十年。

宜行之德 盡心改過

痛悔改過。乃人之急務。而不可緩者也。誠恐未及遷改。而定命猝至。則益者速去。而損者無窮。既知如此。汝何故不急忙下手。諺云。有事不要捱明日。平常俗務。尙且勸人攘臂爭先。豈有關係永遠要務。可坐而待斃耶。時不再來。亡無日矣。若汝改過之後。能隨聖佑而行。功業日進。老而彌篤。痛心泣罪。至死不忘可也。

當務之求 爲罪人改過

祝文 望主垂盼。敬憶爾聖人奧斯定。吾之伏禱。弗克倚予本義。惟托翕合爾義者之功勩。得其扶翼。爲我等主基斯督。亞孟。

二十九日聖若翰洗者致命

天主降生之邦。預定於猶太國。故歷代聖賢。繼續相傳。迨降生之年。聖若翰

洗者。先耶穌六月而生。暴君黑落德。因爲包藏禍心。謀弑救世之主。殘殺國中嬰兒。二親襁負聖人。逃奔山中。不久。二親俱亡。天神教養之。稍長。告別天神。獨遊曠野。鳥獸爲羣。野菓草蟲爲食。駝毛遮體。駝帶束腰。近身衣服。卽爲臥地之蓐。酒不沾唇。口不擇味。苦行與年並長。將三十歲。奉主之命。出山傳道。士庶景從。視之如天神古聖。追隨受教者。不可數計。行至若爾當河濱。以水洗人。時耶穌亦受洗焉。經載耶穌受洗時。天門大開。天主第三位聖神。借白鴿之形。降現於耶穌聖首。空中天主聖父大聲呼曰。吾愛子。蓋表聖人此舉。爲後日耶穌升天前。所定洗罪入門之預像也。時司祭長遣人問曰。汝係救世之基斯督否。或係先知之聖。不然。爲何以水洗人。答曰。我非救世者。亦非先知。用水洗人。洗其形耳。現有一人。生於吾後。實在吾先。將以聖神之恩。

洗滌人罪。纔是基斯督救世者。我尙不堪解其鞋帶。何故以此疑我。數年以來。告人之語。大都如此。因聖人本救世主之前驅。故舉口皆宣揚降生恩旨。證明入世真光。不喜一切譽言。惟盡天職而已。其時朝野重之。國君黑落德。以弟婦爲妃。聖人入諫。不獨逢君之惡感。更增姦婦之毒心。合謀洩恨。轉慮聖人爲衆所望。難逃公論。姑囚禁之。聖人雖在監中。而勸衆棄邪。訓徒認主。倍切懇勸。曾遣門弟往問耶穌。使得親見耶穌所顯之聖蹟。跛者行。癱者起。癩者淨。啞者言。瞽者明。聾者聽等。時值國君黑落德誕辰設宴。令姦妃之幼女。席前歌舞。君甚愛之。諭云。隨汝所求。誓必與汝。雖求吾國之半。亦不惜焉。幼女不知所求。入問於母。母命求斬聖人之首。女以要求。君因誓言難改。卽命斬首付之。聖人一聞此命。伏拜天主。感謝自生至今無限大恩。求恕君臣。

刑役之罪。欣然受斬。年三十三歲。幼女將頭送母。母用利錐鑽舌。惡言咒罵。以快其報仇雪恥之心。門徒士庶。謹葬聖屍於淨地。次年。總王盪平其國。暴君同姦婦母女。俱慘死於邊外。顯此明威嚴罰。衆皆驚訝。聖屍火煨爲灰。日諸發郡中。幸獲餘灰大半。敬奉於聖堂。時或苦雨連綿。又或海波泛濫。衆請聖灰之匱。恭迎祈禱。災患悉除。聖首多年未獲。後示一神修界者藏之。數載後。有西南國中。感懷聖德。建殿恭迎。虔誠敬奉。所顯奇恩聖蹟。筆不勝書。

宜行之德 潔淨

聖若翰爲潔身淨志。自孩童時。卽以曠野爲家。苦其肉身。終於致命。汝若知此德光。不該離衆麼。不該避靜麼。不該受致命之苦麼。果能孤身以御衆。靜志以處煩。忍耐以遇難。何必避地離人。纔爲修道。又何必身首異處。纔爲致

命。然難中之難。雖大德行之人。處此亦不得不分外隄防。

當務之求 爲童貞者

祝文 天主爾使聖若翰洗者致命聖日。爲顯榮之日。懇祈爾與爾民神樂之恩。及使諸信者之靈。引於榮福正道。爲爾子耶穌基督。亞孟。

三十日聖女羅撒童身

聖女羅撒。是亞默利加洲秘魯國理瑪京城之人。聖女幼承父母善訓。熱愛非常。五歲卽矢志貞修事主。年甫十二。聞父母有議婚之舉。不便明言反對。故將頭髮一概剪去。示其心堅志決。從此父母再不議及婚姻之事。聖女在花園牆角。造一小房以棲身。雖在家居住。而守規克己。勝於修道者。飲食最粗。衣服最劣。四旬大齋。更不飲食。每日惟吞石榴中之子五個而已。苦衣貼

身。苦帶束腰。寒暑不更。臥不用毡褥布綿。投身於木塊瓦碎之中。頭戴茨冠。以巾遮蓋。不使人知。苦鞭重責。寡言寐少。默想居多。種種神工。與日並增。邪魔妒甚。屢顯驚嚇之形。或肆害毒打。聖女不惟不懼。反笑其虛張聲勢。隨畫十字以退之。聖女患病。疼痛異常。魔誘旁人惡言毀謗。加以不美之名。聖女惟以忍耐勝之。反求天主加其內外諸苦。如此十五年。天主格外賞賜。非常熱愛之德。使焚灼其心。而炎炎不熄。如天神一般。屢蒙耶穌聖母護守。天神聖女加大利納。降臨顧慰。頌其熱愛。示其終期。此時無甚重病。惟熱愛神火。燔炙其心而終。年三十一歲。時天主降生後一千六百一十七年。

宜行之德 愛德

天主之恩。不但無數。還無尊可比。因天主至尊至大。我們至卑至賤。且係無

可再卑之卑。無可再賤之賤。又還有罪。怎敢望天主之恩。然人雖不敢望。而天主必不肯斷人之恩。此恩雖小。亦屬無比之尊。况天主降生救贖。甘受無窮苦難。立聖體大禮。結合此無可再卑再賤之卑賤。拉汝直升天堂。享至尊至大之福。如此重恩。我的心當得起麼。既知道當不起。還不該效法聖女羅撒之熱愛麼。

當務之求 爲劣弱愛德之人

祝文 救吾者天主。聽受吾禱。我樂爾聖童女羅撒瞻禮。望以誠心。得受訓誨。爲爾子吾主耶穌基督督。亞孟。

●三十一日聖賴孟多諾納多顯修

聖賴孟多是西班牙國公侯之裔。在胎七月。母以病亡。父想此胎尙活。與至

親商量。剖開死母之腹。遂得聖人。取名諾納多。譯言未經生產者。有一公爵爲其代父。領洗取名賴孟多。明悟稍開。聞知母親死後。爲其所受慘傷。定志每日祈求聖母。賜母親靈魂。早歸安所。頌揚勸引。倍加慇懃。父見幼年如此。慮其後來必棄家修道。所以讀書數載。卽將聖人送交村內。與牧人爲伴。豈知此行。既可遠離塵俗。又能自立神工。深合聖人之願。其地有一小堂。晝夜進內。跪祈默想。常往各村。贊揚聖母。動人熱愛。魔假裝一牧人。以禮入見。先頌世家。後稱才智。末言賤役必悞神工等語。聖人知爲魔計。默求聖母。魔形遠遁。聖人趨赴小堂。伏禱聖母像前。少頃。心安神樂。同伴窺探聖人所行。適父在村。衆以懶惰稟知。父卽親赴牧場。見一少年。儀容端雅。替管牧羊。心中驚怕。閒步默思。路過小堂。聖人誦經甫畢。父問云。替你看羊者是誰。聖人恐

懼無言。跪求寬恕。父覺此中必有天主之恩。慰之云。汝仍照舊而行。聖人遂回經堂。再求聖母保護。聖母示之曰。我差一天神替你看羊。聖人歡樂無似。口稱如此大恩。如何酬報。聖母云。爲報我恩。該離此處。往巴爾斯羅納府。入贖虜會。聖人惟求聖母扶佑。情願勉力而行。恐父不從。託代父說辭。再三婉轉。始蒙允諾。遂卽往見會長聖伯多祿。諾納格。詳於一月三十一日。聖人在會數年。長上聞教中多人。被回回虜去。命聖人携資往贖。奈資少人多。不敷贖價。自將其身典當於回國。此間之忍辱受欺。難以言喻。聖人甘心樂受。偶或閒暇。不惟密訪教友。周旋勸慰。且能化及回回數人。領洗歸誠。回官聞知。卽擬正法。以圖絕滅。又貪其取贖之貲。從寬責放。豈知放後。講勸更甚於前。官民俱怒。網打遊街。穿通上下嘴唇。以鎖鎖之。不許開言。食時放鎖。聖人忍

受凌辱。惟有一心感謝主恩而已。曾因默想工深。狀若昏迷。過二日後。明明說話。如無鎖者。守役疑爲邪術。拳打脚踢。棍棒齊來。如此八月之久。本會贖虜之費。納完始放。教宗念其勞苦功高。加陞紅衣首相之專位。天主特恩。賜以能行聖蹟。不勝枚舉。有一夜默想中。明見聖母賜之花冠。固辭不受。又見耶穌賞之茨冠。欣然樂受。以後時覺疼痛。復旋本國。欲勉勵家庭之人。奈抵家時。卽得熱病。自覺終期已近。神父相隔甚遠。不能行告解領聖體之神工。一日時時求主曰。此我臨終時莫大之神恩。望主可憐。適值代父衆人。同在聖人房內。忽見天神。好像贖虜會中。鐸德之形者。率領修團。手持燃燭。引導而來。天主耶穌捧聖體盒至房內。大光滿室。有二刻之久。耶穌親送聖體畢。轉身就道。過河走水。如履平地。瞬息之間。無所見矣。代父衆人。皆以目送之。

回見聖人。長跪於地。心目望天。淚下如雨。代父卽問所見之事。聖人答云。善哉。我們恭敬之天主。其恩其仁。無窮無盡。我果然領過聖體是真。少頃息斷而終。時天主降生後一千二百四十年。

宜行之德 贖虜

人雖不能如聖賴孟多之贖虜。然沒有一人不能救煉靈之虜。斯乃分之當然。煉靈不能自救。汝尙在世。爲彼做彌撒。苦工祈禱哀矜等。俱能救彼。且用力不多。成功甚速。何故不爲。因不知煉獄片刻之苦。萬倍於肉身卒世之苦也。愛人之德。雖非父母親朋。還該共施拯濟。汝在世不救煉靈。已犯不愛人之罪。後來天主待汝。亦如汝待別人。免不得受還煉獄之苦。以彰不愛人之罰。主曾示有德行之人。歿後。顯補贖之迹。傳流於世。非徒空言致做也。

當務之求 爲煉處靈魂

祝文 天主。以爾聖賴孟多。贖教中被擄之功。我等賴其轉達。懇祈爾。贖我靈於魔擄。滌我罪以自新。儀型在望。願隨寵佑之洪恩。敢藉勳勞。常作吾人之主保。耶穌基督。亞孟。

羣聖流芳 第九月

◎ 一日聖額日弟阿顯修

聖額日弟阿是希臘國王之宗室。父母欽崇聖教。遵守甚嚴。聖人生而聰明。兼以明師課讀。數年之間。博學多才。但非聖人之所好。惟專心於聖教之經史。所以世福毫無繫戀。只知愛主克私。雖在青年份子。勝於老成之人。且常蒙天主神能。多行聖蹟。一日路遇一貧病者。聖人解衣覆之。病卽痊愈。一人被蛇傷害。腫毒將亡。聖人替他求主。畫一十字。蛇傷立愈。一負魔人在堂喊叫。適聖人在堂誦禱。嚴令叱之。魔退人安。因此德名漸著。大不合謙遜之心。急圖退避。變產濟貧。潛於船上。望見海中一島。泊舟登岸。見有行人足迹。循迹而入。直抵峒中。一老年人在峒苦修。惟以清水草根。保全生命。聖人跪求。

降福。留居三日。因此離家尙近。又土船往法國。奔投瑟撒略主教前。有天主
默啟。明知大德。留居二年。顯聖蹟最多。聲名更甚。遂遁入深山。與一老修士
爲伴。所行聖蹟。皆指老修士爲之。然鄉莊明知出自聖人。復密尋深峒。獨居
數年。克己行工。不見一人。天主特恩。命一鹿母。每日送乳充饑。雖苦狀難言。
自願無聞而終老。乃天主必欲顯揚之。時值國王出獵。偶因口渴。命取鹿乳。
適遇養奶聖人之鹿。奔入聖人峒內。追者放箭射之。誤中聖人。鹿惟哀鳴不
出。國王疑懼而回。次日差人入峒查明。見聖人跪伏誦經。身有箭傷血迹。一
鹿伏侍於旁。國王聞知。就卽親臨顧問。謝罪求恩。厚禮贈之。聖人不受。從此
常常就見。次年立一修院於峒外。主教授爲鐸德。命掌理院務。聖人明知敬
主。必敬其事。愛主必愛其人。故勸勉惟勤。修規惟謹。受業者甚多。國王因有

求主之事。委派欽差往請。聖人在途。多行聖蹟。入都求主。准王所願。果蒙主允。回院時。復活一死人。不久。無大病重傷。安然而福終。時天主降生後五百餘年。

宜行之德、謙卑

耶穌所傳之大道。卽是除傲習謙。自卑自賤。爲何反懼外來之卑賤。外來之侮辱也。爲今之計。該怕者。世俗之光榮。該惡者。尊高之傲念。該離開者。盛名美譽。該斷絕者。得意大言。所有善行神功。宜藏不可露也。更不可想自己果然有善。凡有功自晦者。就是謙德之人。當知此想便非謙德。只該思想多善未行。多功未立。實爲不堪。隨處隨時。抱慚無地。常存此念。尙保不定。實而不虛。純而不雜。久而不還。汝若不會到此地步。連帶這個謙字。還未認明。何德

之有。

當務之求 爲傲慢者

祝文 天主以爾聖額日弟阿。每年瞻禮。樂我等。懇祈爾。吾旣慶厥誕日。幸師厥功勳。爲爾子吾主耶穌基斯督。亞孟。

◎二日聖斯德望國王

翁加里亞國人。大半部分。皆是異端。聖人之父。繼統爲王。信主入教。盡心勸化。大臣俱用奉教之人。然尙有固執不從者。王常求主開恩。一日求主時。天主遣天神告曰。此大事非汝可爲。天主將賞汝大德之子。方能行此大事。時有主教聖亞達爾伯幫助求之。不久。后卽得孕。在聖斯德望首先致命之日。夢示云。汝孕生兒。可名斯德望。後來必能出力。光榮天主。德至聖人。果然生

後。適逢聖亞達爾伯爲之付洗。卽名斯德望。孩時與人迥別。讀書甚易。過目成誦。常在聖亞達爾伯前。講求德行。所以敬主愛人之本分。又無人可比。以誦祈默想爲樂。事事無不真切。每云天主在前。何敢輕忽。雖在幼年之時。力勸臣民認主。至十五歲。父命權朝理事。父王崩後。聖人卽位。首以崇正除邪爲本。內有逆臣。朋比爲奸。助邪倡亂。干戈四起。聖人義勇赫然。發兵征討。將爲首者伏誅。從者分別究懲。餘黨悉降。迨後聖教大行。各處建堂傳教。主教鐸德等。按方林立。此大事告成。頒發條律。永滅惡人之害。至今通行遵守。名爲斯德望聖人之律。國中鰥寡孤獨。困窮無靠者。查明造冊。給貲饘養。聖人至二十七歲。始行大婚之禮。所娶者。乃聖恩理格總王之妹。詳見七月十五日。於是夫婦同心。行信望愛之德。中外咸孚。當是時。上下臣民。無有不沾聖

教之恩者。豈知聖恩理格升天後。接位之總王。欲併吞聖人之國。親統大軍臨境。聖人明知不能取勝。向聖母臺前跪祈曰。童貞聖母瑪利亞。我以涼德。治茲小國。情願獻於聖母。常存聖教之光。今現來仇我之人。若天主義命。勦滅我國。敢不束手謹從。但此大凶。必因我罪。仰求聖母慈恩。懇主收回義怒。只罰於我一身。無傷及於臣庶。求畢。領兵交戰。忽來一騎。傳命收兵回國。總王細詳其事。知有天主大恩。卽日拔營而去。不敢再生野心矣。聖人晝則治民理國。夜則省察默想。加以克己守齋。日增月盛。後得大病。三年不愈。天主欲其德備功全。僅存一子。名厄默利。各年已二十有餘。現命廷臣預備傳位之禮。豈知太子先聖人以升天。聖王延至聖母蒙召升天瞻禮。病勢已危。全領臨終聖事。不數日。崩於寢宮。時天主降生後一千零三十八年。升天以後。

聖蹟繁多。

宜行之德 懷義

耶穌曰。爾之義。如不超過法利叟黨之義。則不能入天國矣。愛人者該以義待人。汝今看自己所爲。都是正言善行。看別人所爲。不是語言差錯。就是舉動不端。何義之有。汝能看人長短。人獨不能看汝是非乎。若汝肯以真義待人。先將看人之心回看自己。再將看己之心轉看別人。更將責人之心責己。恕己之心恕人。纔說得愛人如己。亦說得愛己如人。

當務之求 爲本地官長

祝文 全能天主。因賜聖王斯德望之永福。聖教賴其廣揚。懇祈爾。使爾教會之榮光。永遠罔替。萬世共瞻。凡茲聖教之君民。常蒙得厥護衛。扶之佑之。

迄於終期。可獲天上之永樂。亞孟。

◎三日聖女瑟辣斐亞聖婦撒俾納致命

聖女瑟辣斐亞。生於西里亞安弟阿基城。自幼立愿守貞。及長。聞總王殘酷。聖教。卽存致命之心。父母死後。奔投羅瑪。以隨主命。遇一巨室寡婦。名撒俾納。見聖女儀容端肅。留爲己女。愛之如親生。但未信認天主。聖女因感其愛情。常講聖道之問題。不久。深知邪神之虛妄。專信聖女所言之天主。至真至正。遂領洗守規。從前助邪拜廟。如今斷絕不行。偶變態度。人咸異之。聖婦明言我留一女。是天主教。因此棄邪歸正。官卽拘拿聖女遊街。曰。此巫人用邪法。迷惑向善之寡婦。時聖婦緊隨其女。官云。夫人乃尊貴巨室。爲何從此邪法。女人答曰。旣知我是巨室尊榮。我因愛人情切。收爲育女。得聞正道。不該

遵依麼。官見聖婦之尊。看其體面。將聖女放回。後再有人控之。官派差役。只拘聖女。奈聖婦如前同往。與官大辯。官用巧言。勒令回家。命聖女叩拜邪神。聖女曰。我惟拜造天地萬物之大主。降生救世之耶穌。官見其堅執不從。命發於妓女之院。天主差一天神救護。有青年男子二人入內。卽刻地動。倒仆不起。聖女通夜誦經謝主。次早。官差見二青年臥地如死。報官拘審。問用何邪法。聖女云。敬天主之人。不曉邪法。天主罰此二惡。以警汝等。但天主之恩。極其公義。又極善仁。不願罪人死。惟願罪人改。卽向二少年以足踢之。命起如死復生。口稱我們入室。見一威武天神。眼光直注。我等卽倒地昏迷。官有慚色。將聖女重棍責之。地又大震。刑棍忽斷。由空中傷問官之目。官怒如魔。立將聖女斃於杖下。利刀斬其首級。時天主降生後二百二十一年。聖婦不

惜多金。收屍埋葬。官怒未息。併拘聖婦斬之。均受致命升天。

宜行之德 省察

每日不必用多工夫。於九十六刻中。略以一二刻。查考自己之思言行爲。不獨無妨害於事於工。且因此二刻之工。將餘剩九十四刻。或行或食。或坐或眠。或誦經。或理事。俱可爲天主之工。何以知之。若論肉身之污。狠不雅觀。難見別人。若論靈魂之污。更不雅觀。難見神聖。汝只怕見他人。不怕見天主。神聖人麼。靈魂之罪過難明。一經省察。污穢畢現。若果就潔去污。何難變一日之工爲天主之工。

當務之求 爲孀婦孤兒

祝文 伏望吾主。使吾兢兢不間。敬憶爾聖女瑟辣斐亞。聖婦撒俾納。致命

得勝之榮。吾力弗克以合。宜誠心崇敬。懇祈爾。時時將吾恪恭微忱。爲爾子耶蘇基斯督。亞孟。

◎四日聖瑪瑟祿主教聖瓦肋利亞諾致命

耶蘇升天後。一百五十四年。西國總王。以聖教爲異端。諭令各處地方官禁殺。而法國呂底隆等處更甚。不論男女老幼貴賤人等。若知是天主教。卽拘拿致死。內有聖瑪瑟祿。聖瓦肋利亞諾。二聖首遭捕拿入監。但天主尙有別用。一晚監門大開。二聖知有天主聖意。卽遵命出監。聖瑪瑟祿潛往加俾落府。聖瓦肋利亞諾另往別處。俱以勸勉教友。開導外教人爲己任。聖瑪瑟祿因一富家名納西榮者。好行招待旅人之事。故聖人居住其家。但此人敬信邪神。極誠供奉。聖人入門後。遇說話時。乘機而進。剖解邪神之妄。聲明真主

惟一無二。於萬物則生之存之。於人類則救之贖之。其時天主聖佑。從中相助。不用多言。致納西榮之心。奮然感發。不懼總王禁害。卽毀滅邪像。全家俱領洗入教。彼係此方望族。從旁稍有善根者。莫不爭先追隨。恐後。但怙惡不改之徒。難免挾仇懷恨。聖人明知其故。出城他往。至十里外。正與一惡官相遇。一路同行共語。此官卽有祭神之舉。邀聖人陪行。聖人分別正邪。明言此祭無用。官吏人等。卽知其是天主教份子。有挑撥此官誅戮之言。官不忍行。着送廟內。不拜卽殺之。聖人曰。敬天主者。不拜邪神。因邪神盡屬於魔。害人非淺。我身在此。隨你用刑。靈魂之福。惟此苦耳。官怒。命掘一坑。將聖人埋土半截。守至三日而終。聖瓦肋利亞諾。相繼而至。亦被拿立斬。時天主降生後。一百七十九年。

宜行之德 不靠自己

人皆望升天堂。但真心行此路者少也。因見多人不顧善行。而虛靠妄想。豈不殆哉。世人無一願下地獄。亦無一人不怕地獄者。既然如此。爲何口是心非。常常走地獄的路。豈汝等只知天主仁慈。不知天主公義麼。若汝等自恃善盜升天。不過片言之易。並無難處。我們多年奉教。早晚誦經。齋濟忍苦。無事不行。難道不如善盜片言。右盜得爲聖人。因能動耶穌之心。能隨耶穌聖佑。而倚靠甚力。汝奉教之年雖多。負恩之日更多。故難變罪人而爲聖人。

當務之求 爲身居逆旅者

祝文 天主。爾賜我等。敬憶爾聖致命者。聖瑪瑟祿。聖瓦肋利亞諾。亞孟。爾彼居永福之域。使我偕樂。爲爾子吾主耶穌基督。亞孟。

◎五日聖老楞佐儒斯弟尼亞儀主教

聖老楞佐是意大利亞國貴家之子。自幼言語舉動勝於老成之輩。其母熱心敬主。恐兒爲世俗所害。聖人覺之。卽對母云。不須過慮。自有天主聖意。年至十九。將世俗富貴尊榮。與離俗修身之難苦。比較再三思之。眼前供有耶穌聖像。不覺痛切於心。卽云。我主耶穌。罪人之望。十字架上之艱難。實爲天堂之真路。遂決志離開世俗。不久。往乃叔修院。克己最嚴。飲食最薄。夏不乘涼。冬不向火。一日修士團。邀其同避暑熱。答云。此熱不能受。後來煉獄如何受得。不數年。陞居鐸德。推爲院長。甘充賤役。勤行不倦。誦經默想。熱愛非常。一友勸其出院。友聞回答之言。亦動其心修道。適物納西亞府主教位缺。卽將聖人陞補。急辭不獲。行事依然照舊。主教俸祿。盡爲哀矜。或有勸云。似乎

太過。答曰。你們錯了。窮人是天主的愛臣。我們是天主差來。爲管理窮人者也。他屢屢受人輕賤。被人侮辱。從無怨色。樂施之心。不加勉強。惟望與天主呼吸相通。故誦經時。雜念難容。治病驅魔。多顯聖蹟。更有奇者。聖體瞻禮日。有一間女修院。因無鐸德。差人稟知。答云。我知道了。在經堂做彌撒。成聖體時。聖人肅然不動。一時在於兩處。其神體親去女修院。恭捧聖體。送與熱心修女。修女團中。人皆見之。竟未有知其如何而來者。聖人常說。正式教友。不但絕大罪。還該絕小過。如不禁絕。恐斷聖寵。謙德如小溝。冬乾夏漲。富人如冬而少謙。貧人如夏而多謙。世間的潔淨。似乎燃火。加入俗務。不可滅矣。我們該有者。只一天堂。除了天堂。件件本無。倘或認無爲有。必然終歸於無。又言每日彌撒中。人人可以享天主。若不享之。有何緣故。是明明主不在心也。

年七十四歲。去世升天。時天主降生後一千四百五十五年。

宜行之德 守十誠

耶穌曰。汝若願得常生。該全守十誠。奉教之本。全在信主之聖訓。十誠之守。正是行善之信德也。所以守十誠之人。是有信德之憑據也。自然萬死不敢陷於重罪。豈有故意妄爲。而得下地獄永遠之禍事。以失升天堂無限之福耶。天主爲萬民之父。故天主所命之誠。萬民咸宜遵守。十誠爲登天之梯。遵守者上升。不守者永墮。

當務之求 爲不守誠者

祝文 懇祈全能天主。爾聖老楞佐。儒斯弟。尼亞儀。精修主教。每年瞻禮。加吾心虔而體安。爲爾子吾主耶穌基斯督。亞孟。

◎六日聖弘伯多顯修

聖弘伯多是法國人。原本仕宦之家。聖人自幼恬淡性成。視世俗爲虛假。暫時。惟思身後真誠永遠。年齡稍長。父母欲保全本來之善。將其託付於修院。專讀教中經典。數年後。本處主教。因見聖人才德俱全。授爲鐸德。既受神品。勉力倍加。時時以身立表。變化罪人之惡。父母去世。賣產濟貧。適聖亞茫多。爲去羅瑪路經其地。接洽暢談。卽表同意。決往偕行。行至野山。遇一大熊。傷斃聖人所騎之駱駝。二聖以信德。命熊伏地。將行囊駝縛於熊背。一路如騾如馬。與食則食。命止則止。所過之地。人人見之。莫不稱奇。將近羅瑪。恐因此而驕傲。令熊回山。毋傷人物。二聖至都。辦公務神工畢。仍回本地。立一修院。以居四方來學之人。有一日。與修士團入林伐樹。脫去外衣。掛於樹下。忽見

一鹿被大羣獵狗追迫甚危。鹿以聖人之衣遮身。而羣犬不能近。後有打獵之壯士持刀殺鹿。豈知手軟如癱。鹿命保全。獵人拜服。且獻一庄田地。資助其院。聖人旁築一篷。爲自己苦修之所。克治之工。老而彌篤。邁年謝世。歿有餘慶。

宜行之德 忻勤告解

常見好人。忽然就死。如此暴事。誰能免得。若有重罪在身。必用告解祕跡。此耶蘇聖血所流之恩。只要肯悔肯改。沾恩甚易。靈魂之傷。不難補修。請看身外之物。假如破者復完。斷者復連。必定喜出望外。今靈魂爲重罪所傷。一經告解。諸傷全無。果然自知此行甚好。豈有不樂之理。既然樂在其中。爲何不忻勤告解。

當務之求 爲傳教者

祝文 天主以爾聖弘伯多。每年瞻禮。樂我等。懇祈爾。吾既慶厥誕日。幸師厥功勤。爲爾子耶穌基督督。亞孟。

◎七日聖女肋喜納童貞致命

聖女肋喜納。是法國布爾我尼省富人之女。生於多難之日。產於異端之家。出世之後。母卽病亡。養於乳母處。乳母原是奉教。私爲付洗。父竟不知。至五六歲回家。查其已奉聖教。怒而逐之。不認爲女。乳母樂甚。領回教育。童稚似乎天神。外貌端方。內情謙潔。念念不離天主。時時效法耶穌。堅志恆心。往前無退。年齡十五。情願牧羊。因其餘力。可看書默想。兼務神工也。心內常求致命。蒙主卽從牧羊之事。成其功。適有本省總督。路過牧場。覬覦其青年美色。

淫心勃發。遂命近車問話。聖女卽大聲仰求曰。我身心已獻於天主。不可許世人害我之貞。官知其奉教。命役帶回。以世榮刑法誘之。次日。聖女見官。先畫聖號。倚靠耶穌。官令背教。答云。我是天主耶穌之人。聖母臺前。幸爲婢女。情願受苦。以守我之大光榮大體面。官命投於黑監。再審。遍身纏以鐵索。腰間箍以鐵圈。旁加鐵條。釘於牆上。絕其飲食。數日。官仍提問。好言無用。嚴刑以增其苦。乃愈苦愈堅。以利鐵扒其身。皮破血流。怡然忍受。是夜忽見一十字。在空中發光。十字上有一白鴿。賀之曰。爾真心忍耐。自成一妙冠。戴之在天國。聖女聞之歡樂。傷痛立時痊愈。次日行刑。命坐苦架。以鐵焚烙其肋。又投之於冷水。是時有一白鴿飛來。啣一花冠。戴在其首上。并聞異聲曰。請爾來同潔夫永王於天。今受酷刑之責。有八百人觀此聖蹟。斯時承認天主。官

見多人嚮應。卽將聖女斬首。安然引頸受刑。時天主降生後二百七十五年。

宜行之德 勿虛畏懼

人多畏後來之事者。但該畏後來靈魂永苦。不該畏後來肉身暫苦。凡爲免兩苦者。若不隨天主聖佑。必不能逃。今汝眼前之苦尙多。還要畏慮明日未來之事。明年未來之時。明日明年。身且不保。所畏所慮。毫無關係。爲何不移此念。畏慮事功未立。德行未修耶。貧窮災患忽來。汝雖有才能。可能防之否。旣然無法可防。何必先事而憂。事至而畏。若不望天主扶佑。豈因汝多憂多畏。就能免除災患麼。

當務之求 爲一家之人

祝文 天主。爾德能靈異之中。不棄弱女輩。賜致命者榮勝。懇祈我等。慶爾

聖肋喜納致命童女誕日。因其遺表。躋爾臺前。爲爾子吾主耶穌基督。孟亞

● 八日聖母聖誕

納匝肋是猶太國之名郡也。郡中有達味聖王之裔。名若亞敬。妻名安納。夫婦幼習公教。精修甚嚴。以其家貧。均分爲三。一資聖殿。一施窮乏。一留自給。由是恩惠廣行。爲衆瞻仰。但居室多年。享諸順境。獨患無嗣。夫婦更加勤修。惟祈天主寵賜後嗣。幸而得之。必獻聖殿。奉事天主。不敢背愿。未幾。一天神降來。示若亞敬云。天主大發仁慈憫爾。已允爾願。期年之內。爾妻當受妊娠。產一淑女。名瑪利亞。此女自母腹。已全備聖德。爾宜慎保之。言訖。復告安納。更叮嚀勿慮勿疑。惟篤堅其望。將必不負。天神辭去。夫婦信感相兼。時冬至後十有餘日。安納既受孕。九月後。於納匝肋誕生。不但父母之樂。實萬世之

普慶也。蓋聖母之生。與他聖有天壤之別。不虞分娩之患。因始胎時。既免原罪。則原罪所遺之痛與汚。當然蠲免。誠自空前絕後。獨一純粹之貞女。方堪爲聖子之母親。亦爲天地之皇后。是故知二親之慶樂。達至無極之點。非他人可比也。因伊平生懇祈切望。所以蒙主許一淑女。今始親身見之。何得不喜。至滿三歲。慶酬前愿。遂送獻之於主殿。雖然聖母之誕。非但私室之榮。於天上神品。於全球人士。大有關係。有公幸公樂焉。後聖賢稱頌曰。夫聖母之生也。虜者獲歸。病者獲治。罪者獲赦。憂者獲慰。於善人加寵福。於天神加慶幸。於天主大顯其榮。及無窮之功績。是故普天無不同慶。薄海無不歡騰。又謂聖母爲童貞之表率。正教之楨幹。登天之階梯。善人之表儀。罪人圖改之廕庇。疾病冀痊之藥房。爲天神之所樂。鬼魔之所驚也。聖母一生之偉功懋。

德。豈筆舌所能傳述耶。以約萬言爲一言。曰。難言矣。

宜行之德 靠望聖母

人生斯世。三仇環攻。四面包圍。晝夜不間。死而後已。若非聖母之護庇。萬難克勝也。經曰。義士一朝猶七仆。况其非義之甚者乎。夫罪猶瘟疫也。如不速治。必就斃焉。人力俱弱。不能自救。去罪改惡。歸於正道。俱惟有靠望聖母而已。故曰。靠望聖母者。是天主所選之記號。從未見恆靠聖母而下地獄。亦未見不事聖母而升天堂也。聖母爲上天之門。若不由門而進。豈不是難矣哉。

當務之求 爲父母家屬等

祝文 仁慈天主。賜我特寵之大恩。旣聖母之產。爲我等蒙眞福之慶。聖母聖誕瞻禮。托賴保護神形潔淨。幸致和平之益。爲吾主耶穌偕聖父。偕聖神。

乃生乃王亞孟。

◎九日聖多羅德阿聖我爾我尼致命

天主降生後三百零二年。羅馬國之總王弟阿格肋斯在位十九年。正值耶穌受難瞻禮日。傳令各邦禁天主教。拆殿燬經。鎖拿傳教奉教之人。如不改者。酷刑處死。總王都城在尼各默弟亞。有一巨家教友名若望。心中不忍。直言總王錯謬。卽定死刑。隨有世家教友名伯多祿。自行投案。命拜邪神。堅執不從。懸掛毒笞。血流將盡。以苦醋苦鹽醃之。綑綁於鐵牀上。慢火燒炙。有極品官僚多羅德阿。我爾我尼。俱是教友。勸化朝臣士庶甚多。今因見伯多祿。爲義捨生之善表。目擊心傷。不覺奮興感發。奏諫於王曰。他們欽崇天主。並未有犯國法。遽用酷烈之刑。非治國之經濟也。王欲久安長治。該勸臣民同

事天主。因是天主所造之天地。所立之君民。如果通國欽崇。必然免災集福。誠爲有道之邦。如此淺見。濫用非刑。妄誅良善。倒行逆施。邪正不明。臣等抱疚自慚。莫此爲甚。王如蒙蔽愈深。不肯收回成命。臣二人奉教已久。斷不能阿順曲從。情願一同受刑。王竟不知朝內大臣。亦有奉教者。初聞二聖之言。忽然驚駭。繼卽忿怒如獅。拘拿處治。仍用鞭笞。注以醋鹽。鐵牀火炙。二聖甘受樂從。喜形於色。終以絞決。致命升天。

宜行之德 默想永遠

永樂永苦。人人必有其一。俱無窮盡。高天厚地。日月星辰。山川河海。皆有變易。只有永樂永苦。雖過千萬年。又是千萬年起頭。過萬萬年。又是萬萬年起頭。故云永遠無窮。但永樂永苦。不得由人自主。永遠是苦樂。在世隨人改遷。

死後其苦樂。無能增減。因此永遠之事。一是聖人光榮。一是罪人刑罰。關係無比之大。何不深長思之。

當務之求 爲悔改過惡者

祝文 天主。爾賜我等敬憶爾聖致命者。聖多羅德阿。聖我爾我尼誕日。望爾彼居永福之域。使吾偕樂。爲爾子吾主耶穌基斯督。亞孟。

⊙十日聖尼各老多郎定顯修

聖尼各老多郎定。是意大利亞國民之子。父母乏嗣。同往修院。求主賜生後嗣。許長成後。獻主精修。是夜。天神降諭曰。可往聖尼各老墓上。發愿求之。次早。如命往求。因誦經力倦。伏臥於祭臺前。夢見聖尼各老明示曰。我替汝二人求主。蒙恩已允產兒。付洗卽取吾名。幼能敬主。長卽精修。後爲鐸德。准行

天主之全能。二人得意而歸。果然受孕。而生聖人。自幼不似孩童。遇婦女則避之遠之。遇修士則敬之親之。樂於聽講。誠於誦經。見之者俱贊美不已。議其後來必成大聖。年甫七歲。每主日守三個大齋。至十一歲。決志精修。離家入院。在聖奧斯定會中。樂辦苦差。久而不惡。甘居卑賤。愛而不嫌。從無昏志。汚情。若天神然。後有畫聖人之像。手持白巾者。表其純潔無瑕。年及十五。苦衣苦帶。臥地枕磚。無被無褥。每主日守四個大齋。一言一行。必合聖規。加其精密。大不同於神修之團。院長命其表率別院。此院名爲多郎定。迨陞神品。苦克倍嚴。晝則勤勞教務。勸善懲惡。訓誨童蒙。夜則專心默想。擴充靈性之光。邪魔妒甚。或現惡形恐嚇。或發怪聲擾亂。或出火焰滿空。或弄住房搖動。聖人知爲魔計。倚賴主佑。毫無畏懼。至老不衰。終身如一日。未辭世前一年。

天主默示升天之期。至期前數日。臥牀不能轉動。手持苦像。流淚求恩。亦顯樂容。告一生之罪。領聖體終油。越三日。去世升天。年七十歲。時天主降生後一千三百零六年。

宜行之德 隨天主旨各守本分

人生在世。士農工商。各有本業。此本業。卽是本人之本分。此本分。卽天主所命本人之諭旨也。如人受命於良好政府。不論何差。皆樂從爭先恐後。所以人人俱該守之。又若人之才能。各自不同。此又本人之本分。若捨此本分之才能。妄想未有之才能。不獨靈魂受害。肉身亦難保平安。因器小易滿。船重必覆也。惟有全隨主旨。愚拙以終。併受天福。汝若不隨天主之旨。惟求天主隨汝之心。難矣。

當務之求 爲憂患者

祝文 天主以爾聖尼各老多郎定。每年瞻禮。樂我等懇祈爾。吾旣慶厥誕日。幸師厥功勳。爲爾子吾主耶穌基督督。亞孟。

十一日聖伯樂德聖夏新多聖女歐日尼亞致命

聖女歐日尼亞。是羅瑪巨族。父名斐理伯。雖未領洗。甚愛公教。總王因其才智。命總理厄日多。攜眷主任。撥二太監。一名伯樂德。一名夏新多。陪侍聖女。延請明師。教以文章格物窮理之學。聖女明悟超羣。不數年。遂成博才。一日。觀看聖保祿宗徒之書。極言貞德之美。大爲感動其心。遂定方針守貞。時值總王嚴禁聖教。城中教友團。多避居城外。聖女偶聞教友人家。誦達味聖王聖詠。曰。敬拜人物爲神。不過邪魔耳。造成天地人物之大神。纔爲真主。聖女

觸耳驚心。向二太監曰。果然真實。我們奉事邪魔。不獨枉費敬心。且大得罪。造天地萬物之真主。從此查明正道。同二太監。求主教付洗。後留居修院。熱心敬主。克己誦經。辭讓謙和。爭先受苦。辦事優美。成績昭彰。過兩年。院長去世。衆共推尊接理。聖女任事後。天主賜之能顯聖蹟。凡瘡啞瞽。目負魔者。畫一聖號。卽愈。聖女之父。見其表儀善德。措置咸宜。查明教理。蒙主聖佑。全家領洗入教。總王聞知。革其官職。問成死罪。爲主致命。家眷盡回羅瑪。聖女立會於家。婦女多蒙感化。一貴家之婦。名巴西辣者。係總王宗室。懼禁嚴密。聖女差二太監。講明要理。請教宗付洗。後因教宗常往聖女家中。女會被人首告。官拘二太監。送於邪廟。勒命禮拜。堅執不從。重笞斬決。次日。聖女亦致命升天。時天主降生後二百六十六年。

宜行之德 痛告

眞痛告者。必先痛發於心。勝於夾棍杖笞。火燒刀割之慘傷。然後告發於口。勝於陳情乞命。瀝血悲號之諄切。有此痛告。則自羞自賤。自悔自刑。必相繼而至。斷絕小過暫樂。猶爲不足。必尋苦以克身。且求苦以端心志。所以古聖。苦衣茨帶。廢寢減餐。種種苦工。嚴行無間。而不足之心。愈覺歉而又歉也。豈汝還高出聖人之上耶。天堂之路。在聖人視之甚窄。一步難於一步。在汝視之反寬平易走麼。汝無苦自己。就哄騙自己。倘不定心痛告。悔恨遷改。萬難升天矣。

當務之求 爲罪改過者

祝文 天主。爾賜我等。敬憶爾聖伯樂德。聖夏新多。聖女歐日尼亞。誕日。望

爾彼居榮福之域。使吾爲同侶欣樂。爲爾子耶穌基督督。亞孟。

● 十二日聖基童貧人

聖基童是法國極貧苦之人。但受世間窮苦。大有益於靈魂。亦無害於身命。倘能從此窮苦。成聖升天。則永福無窮。欲知其效。何不取此聖人遺行而略觀之。聖人於孩提時。卽善承父母之訓。舉動不似羣童。每早必赴堂誦禱。良久而後出。事非有理由不行。亦不妄發於言。人人咸稱頌之。聖母堂之鐸德。憐其貧苦。欲留住堂中。聖人欣然樂就。灑掃服役。事事慇懃。因工價不敷所用。衆常相助以安其身。聖人節儉自裁。不過定限。留其餘剩。轉濟貧人。長守嚴齋。寤多寐少。自視平生。罪大惡極。多負主恩。默想極其真切。往往流淚不乾。邪魔妬甚。用一客商引誘曰。在此有何生計。不如做一買賣。未及數年。可

以度日無虞。聖人如其言而行。不久。天主開恩提醒。貨船誤行淺灘。水斷手傷。始悔所行之錯。回向聖母前痛泣求憐。手傷立愈。自揣負恩罪大。罰身補贖。先往羅瑪。後往耶露撒稜。朝拜耶穌苦迹。乞食七年。終於本處。臨終室發大光。光中顯一白鴿之形。空中呼名大聲曰。因汝小心敬我。今來天上受酬受福。時天主降生後一千一百一十二年。

宜行之德 輕財

人皆以富爲福。不知少福而多禍。因富人之富。其始也。慘淡經營。不啻千辛萬苦以聚之。其繼也。勞心積慮。又不啻廢寢忘餐以積之。患得患失。除死方休。此富人必然之情態也。然在生時。富貴善用其財。死後亦能富貴。但少有善用者。爲此貨財。必犯多多罪惡。因此罪惡。纔得若干貨財。乃非義之甚矣。

貨財到手。無罪不犯。若說到濟貧等事。用一文錢。如割本身之肉。或因情面分上。忍痛勉行。如此用財。何以升天。汝慎不可踵此輩之迹。到天堂地獄。財不能隨之。惟功罪是從。

當務之求 爲傳教者

祝文 天主。以爾聖基童。每年瞻禮。樂我等。懇祈爾。吾旣慶厥誕日。幸師厥功勩。爲爾子耶穌基督督。亞孟。

⊙十三日聖亞瑪多苦修

聖亞瑪多是法國人。父名特阿多羅。善齊其家者。不容家人虛度寸陰。聖人稍長。命赴修院。求教名師。先習文章格物之學。繼以神形始末之學。不數年。貫通哲學之理。年亦富強時代。但視院如家。遂留此以圖後進。至三十歲。自

思世俗虛浮。矢志貞修。惟以院規太寬。不滿其意。登神品後。避於山野苦剋。院長差人訪尋三日。在於山洞獲之。強請不從。只求每三日送些微麪餅。一瓶清水。院長知有天主聖意。准其所求。歲以爲常。魔甚妒之。一日將其餅水偷去。聖人向主叩謝曰。使我六日不食。深感我主大恩。增我克修之益。一年後。不忍人遠送。用棍擊開洞石。卽發水泉。洞外墾土種麥。求得一磨。磨麥作餅。從此不送餅水矣。一日在地耕種。忽見洞頂高山之上。有一塊大石崩墜。勢必壓壞所居之峒。急呼耶穌。命石停止。石卽懸住半中。數百年後。有人目睹懸空之石還在。而以筆紀之於書者。有一富人。餽送多金。爲濟貧乏。聖人辭云。我與世財無干。富人密置祭臺下而去。聖人見之。拋於野地。曰。我不肯留此害我之仇。若能離自己。亦情願棄之。四十日大齋。餅水不用。每日惟食

核桃四五個而已。居數年。似覺此洞太寬。過於安樂。另尋一洞。只可容身。每逢主日。必出洞勸人。遍身無肉。僅存皮骨而已。一年前。預知終期。至期。遂集隱修之團。宣佈自己罪狀。求葬於聖母堂之旁。銘刻墓上。凡入堂者。望爾爲我轉祈。語畢。領聖體傅終油。而去世升天。時天主降生後六百一十七年。

宜行之德 遠離小罪

小罪能引重罪。若不遠離。必招凶禍。每見肉身之病。雖小亦必治之。恐成大患。靈魂之病。爲何置之不問。微罪雖輕。所關實重。因罪無論大小。俱傷天主之尊榮。大罪大傷。小罪小傷。苟無傷害。亦不爲罪矣。以天主之尊榮。敢於傷害。尚云所關不重耶。如害耶穌者。雖不釘之殺之。只有擊以一鞭。辱以一掌。似亦無妨。汝敢出此狂言乎。旣不敢以一鞭一掌爲無妨。而以小罪小傷爲

無害。豈不荒唐孰甚哉。

當務之求 爲朋友恩人

祝文 天主。以爾聖亞瑪多。每年瞻禮。樂我等。懇祈爾。吾旣慶厥誕日。幸師厥功勩。爲爾子耶穌基督。亞孟。

十四日十字聖架之榮

維時羅瑪總王赫辣格略。被波斯國王葛斯羅娃。興兵侵犯。數次交鋒。總王屢敗。葛斯羅娃乘其銳氣。進攻西里亞。直破耶露撒稜。搶虜燒城。強拿撒加里亞主教。從前公斯當定之母。聖后赫肋納。所留此地之原十字聖架。被其奪去。但此聖架。雖被搶於外教之王。亦知起敬起畏。奉爲鎮國之寶。不許持出殿外。總王聞此消息。引咎呼號。寢食不安。萬倍於國破家亡之慘切。卽下

動員令。親統大軍。東行征伐。出發之先。倚靠天主全能。趨赴聖堂。伏於臺下。懇求天主矜憐。求聖母爲主保。情願失我之身。奪我之命。決不肯令我主耶穌親身受卸之寶木。落於外教之手。此行許願負回。奉於原地。惟望天主仁慈。允我所求。誓畢。鼓勵衆軍。俱皆勇往。對壘開仗。敵軍大敗。追奔逐北。逼近波斯王所居之地。適葛斯羅娃患病將終。廢長立幼。長兄不服。起兵弑父。併殺其弟。自立爲王。驚聞總王大軍。勢如破竹。一路臣民。望風而靡。立即遣使求和。情願歸順總王。投誠納貢。總王首命送還聖架。併撒加里亞主教。於是耶露撒稜各方面。主教鐸德團。及奉教者。聞總王凱旋。執燭叩迎。從者如市。總王感謝主恩。不令臣民幫助。親身肩負聖架。欲仍安置於加爾瓦略山。是時王所穿者。係本來尊榮之章服。負至山前。半步不能前進。撒加里亞主教

在旁。王問其故。答云。誠恐君王盛服在身。不合耶穌當日負行之像。王卽更換道旁窮人之衣。果然肩負不難。土山至於原地。如前供奉。是日以聖架復活一死人。瘖啞能言者一十一人。開瞽者十五人。瘋癱能行者四人。痲瘋得潔者十人。負魔與平常患病的人。不計其數。皆全愈而去。故定此日爲聖架光榮瞻禮。聖會咸遵守之。時天主降生後六百二十九年。又前清嘉慶二十一年。蜀中鑾牧徐加俾厄爾。致命於今日。雖未登聖品。而蜀演黔之信輩。宜私禱祝慶頌焉。

宜行之德

愛十字聖架

有人肯愛十字聖架者。必是愛苦之人。若是愛苦之情不真。此人必不愛聖架也。但此愛苦之情。必該超過自己心身。及萬事萬物之上。世間禍福吉凶。

如富貴榮華。子孫天壽。疾病死亡。俱不能動其所愛。惟愛歡迎受苦。斯可謂愛聖架之人也。然愛聖架者。私欲不可隨也。情願不可聽也。耳目口鼻之歡娛。四肢百體之安逸。不可任情而適性也。所存私欲。惟有苦耳。所顯情願。亦惟苦耳。所喜平安佚樂。惟時時常在苦中耳。只愁不苦。不愁多苦。又何苦之有哉。

當務之求 爲亡者煉靈

祝文 恭向敬拜聖十字架。爾爲罪人之切望。憂苦之太平。山林中。奇美異香之樹。險海內。乘風破浪之舟。敗邪魔。勝世俗。敵肉身之神鎗利劍。開天門。閉地獄。拔煉靈之寶鑰高梯。爾根爾幹。爾枝爾葉。爾花爾菓。從古以來。何樹有爾之嘉。何木比爾之尊。爾自天地大君。鈔死在上之後。爾榮無極。爾能無

窮。爾德無比。我今念吾主耶穌莫大恩功。虔恭敬爾。專心向爾。信爾係救吾之器械。愛爾是贖我之價值。望爾得我罪之赦。我需之資。我病之醫。我願之滿。我求之允。我苦之安。更仗庇爾。扶我善行。今世之危途。一如扶老之杖。至死不離。扶至天堂。息我永安之所。亞孟。

⊙十五日聖尼各默德致命

聖尼各默德。是羅馬國西里西亞省人。因其才德隆盛。本方主教授爲鐸德。令管致命人之義務。時總王嚴禁甚力。各國各省。傳旨通查。勒令改變。敬拜國神。否則酷刑致死。嗣後有貞修女福理居納。被地方官拿獲。堅執不移。殞首致命。棄屍於野。聖人遣人尋獲。敬殮葬之。事聞於總王。差役捕拿。交官嚴處。官訊明聖人之本職。又係公教中之主祭。押至邪廟。命拜國神。聖人反對。

云。朝廷所敬之神。若非鬼魔。卽是已死之古人。大都皆惡。暴殘無道。皆非正式之神。何敬禮之有耶。當敬而當奉者。惟造天地神人之大主。常保存掌管。一總君民所用之恩。咸倚賴之焉。語畢。隨叱魔像。盡皆傾毀。官發大怒。立斃聖人於杖下。拋屍於河。欲滅其迹。天主默示聖人之副祭。覓獲聖屍。敬葬於聖所。時天主降生後二百九十七年。

宜行之德 盡心敬主

行善立功。恆見其進。不怠不停。此敬主盡心之本分。若不前進。必然退後。無有不進不退之理。因人性易於就下。魔又助之。似乎進而實退也。此爲常慣之病。犯者甚多。常用提心弔膽之方以除之。每每自言曰。我何故至今不專心事主。不爲主立功。去時難悔。該從今日起頭。斷不敢如前怠廢。更當自問。

曰。果然起頭否。立何功德。克何情欲。查一查。每日奮勉前進。退後之病。可望除根不發。

當務之求 爲新進教者

祝文 懇祈全能天主。吾敬憶爾聖尼各默德。致命者誕日。賴其轉達。使吾剛健於爾名之愛。爲爾子耶穌基督。亞孟。

⊙十六聖閣肋里教宗聖西貝盎主教致命

聖閣肋里。是羅馬人。既登教宗位後。有一司鐸名諾法相。謀爭其位。流言毀謗。竟有數位主教推之。又有多數教友附之。幸有總鑒牧西貝盎。集請主教團七十位。大開談判。論此問題。立時解決。一致贊成。遂將閣肋里之諭通過。認爲正式教宗。又將諾法相之文打消。認爲假冒教宗。從此公教稍安。聖人

乘此機會。將聖伯多祿宗徒之堂。重新補修。以壯觀瞻。又在城外。創建聖保祿宗徒一堂。以便誦禱。事聞於總王。將聖人充流。數月後。復回京都。士民聆其講勸。仰其德輝。改惡遷善者。不計其數。歸正棄邪者甚多。適因瘟疫盛行。死者極多。惡徒以爲聖教所致。惹國神怒。遂捏詞上控。於是嚴禁倍常。聖人被獲。押廟拜神。不從。向衆人云。所該敬者。惟一天主。吉凶禍福之權。操其掌握。若欲消除瘟疫。必該向天主求救等語。惡衆惡聞其說。立時斬於廟內。在位二年。時天主降生後二百五十二年。

聖西貝盎。是亞斐利加洲巨族之子。在外教時。才學超衆。教書數年。遇一鐸德同學。日相交談。得親聆之益。受內照之恩。偶聞聖經所載。旣取覽之。甚爲驚服。遂歸正領洗。後賣產濟貧。離俗苦修。越二年。卽陞鐸德。旋陞主教。或講

解道理。或立論著書。民風大變。棄邪歸誠者甚多。是時新教宗閣肋里被諾法相爭位。聖人大出其力。擁護閣肋里爲宗座。此後內擾平息。未幾。外難又作。聖人遁迹於城外。委任鐸德代理篆務。自行致書勸勉被難之人。形靈莫不受其拯濟。但拿獲赴案者。不可勝數。其中捨生爲義。受刑受辱。以身證主者雖多。亦有偷生求榮。苟全性命者。聖人嚴加懲勸。必先從重補贖。然後纔許同衆共禱。領受祕跡。此時補贖神工。又重又嚴。或五年七年。或十年八年。多有涼血寡德之人。議其太過。故請爲主服刑之義士。功高德盛之善人。代求稍寬。滅其定罰。聖人不但允。反更囑其遵守。又越二年。國禁頓息。聖人復回。將前所議規條。呈明教宗。准如所請。召集所屬主教。會定此例。以垂不朽。僅六年後。教難大起。聖人被獲。因係世家顯族。不敢任意加害。先充發一

年。後定斬決。赴法場時。通城士民。不拘教內教外。莫不爭先哀送。聖人求主。賞賜聖教大行。異端歸正。國祚綿長。以二十金錢。謝掌刑之役。言畢。延頸受刑。時天主降生後二百五十八年。教中人敬葬聖屍。以巾拭血。藏爲至寶。

宜行之德 避罪罰

世人少有不懼王法。不獨斬絞凌遲之大罪。小心畏避。卽流徒笞杖之律條。亦不肯輕試。偶然干犯。必百計千方。希圖脫免。因懼疼痛。臉面羞慚。獨不想夾打雖兇。不過片時之久。殘傷雖狠。不過尺寸之膚。又非殺身害命。尙云痛苦難熬。巴不得終身不遭牢獄。不犯刑傷。豈有遍體全燒於烈焰中。萬苦齊集。反視爲尋常。放心輕試。煉苦永苦。只差暫永。不易輕重。汝畏輕而不畏重。懼世刑而不懼天主之刑。誠不能爲汝解也。

當務之求 爲苦難者

祝文 全能天主。垂盼吾劣。爲本行重任屈壓。賴爾聖閣助理致命。兼教皇轉達。又賴爾聖西貝益致命。兼主教轉達。得厥護翼。爲爾子吾主耶穌基督。督亞孟。

十七日聖方濟各印五傷

方濟各聖人。其言行事迹。詳載於十月四日。今日祇論其受五傷之恩。伊將去世之前二年。避靜於高山絕徑。嚴齋四十日。爲敬聖彌厄爾天神。已守二十餘日。在光榮十字聖架瞻禮後幾天。在半山默用神工。切思慈主耶穌無限之愛。及受苦受難。默想正到全神之處。忽見一瑟辣。卽極品大天神。從天而降。至聖人之前。其形如人。身有六翅。首上兩翅。以備捍衛。兩旁兩翅。以資

飛翔。下具兩翅。以護身體。明威赫曜。凜凜驚人。紅光四布。太陽不及遠矣。隨顯有被釘十字架之形。聖人睹此神異。驚喜交作。熱愛遠出尋常。心內如焚。見被釘之五傷。發光如日。色紅如血。恍然之間。將聖人肋旁手足。印有五傷之迹。聖人疼痛如死。有天主恩佑。不妨猶生。不獨印有五傷而已。且顯釘孔之形。肋旁之傷。常流血染於衣。平素佩之苦像。亦深印於肌膚。聖人緊藏。不使外知。然欲隱而愈彰。所以天主之不掩大德也。似此恩外之恩。自古及今。從未睹未聞有此異寵也。聖人以所印之五傷。顯聖蹟甚多。有許多聖人。及數位教宗。共睹聖身之五傷。故名之曰。五傷聖。方濟各。以此而別他聖也。時天主降生後。一千二百二十四年。

宜行之德 愛耶穌五傷

羣聖流芳 九月 十七日

三四七

耶穌三釘一鎗之五傷。爲救普世之人。流盡聖血。如此至恩。敢不以愛還愛。何以忝立於人間耶。當知真心默想耶穌五傷者。無論甚麼引誘。不久卽散。遇有艱難諸苦者。速避於聖傷之內。無患不除。該將此五傷深刻於心中。時發感謝愛慕之情。但愛五傷者。必愛受世上之苦。必愛默想耶穌苦難。必能輕賤世俗之尊榮也。

當務之求 爲甘心受苦者

祝文 天主。因聖方濟各功勳。以新衆子。廣爾教會。祈俾吾師其行者。輕世物而獲天上之恩。賜享恒樂。爲爾子耶穌基督。亞孟。

◎ 十八日聖多瑪斯由味辣諾瓦主教

聖多瑪斯。是西班牙國人。家本素豐。父母德名素著。糧食不賣。留濟貧人。牲

畜雖多。亦留供窮乏。聖人幼承家庭教育。習知愛主愛人之務。救羣濟世。慈善爲風。童年時。每日必聽彌撒。凡灑掃聖堂。鋪設祭臺等事。樂從恐後。常集諸童。講論所聞之道。七八歲。卽能留食。食飢。解衣贈人。一日母與新式衣服。出外見一襤褸的人。相換而歸。向母云。彼此有益。母甚嘉之。八歲後。貼肉有茨衣。苦工必流血。室內誦祈。每日二時。十二歲讀書。不數年。貫通哲學。畢業旣成。將及廿歲。來就學者。爭先恐後。天主開恩。默喻棄俗潔修。入聖奧斯定會。克苦倍深。越二年。授爲鐸德。乘此壯年。慇懃訓勉。嘗云。教友少不得四件。一、誦禱。必誠心對越。二、默想。不宜間斷。能收斂其心。補增神力。三、效法耶穌。廣愛。全心爲主。勿夾入魔鬼世俗肉身之念。四、萬罪多由懶惰。須寶時光不停。藉此神訓。感化多人。歷久望隆。衆舉爲瓦能西亞主教。雖不合聖人謙德。

因輿情難逆。強勉從之。然服食起居。不矜高位。愈發謙光。愈加仁愛。每日就食者。五百餘人。聖人每年應得俸銀一萬八千兩。還不足用。難滿愛情。然求憐者。不許人禁阻。人有贊譽。卽云。汝謬獎矣。救人苦難。我分之急務也。有一世家人。日用艱難。聖人每月給銀十五兩。尙有難處。增至二十兩。又至四十兩。若此者。不可數計。更小心救人的靈魂。每日悲哀求主。在聖堂講道。慰病人。行告解。送聖體。傳終油。常常不斷。一日行神工而回。臥病不起。知終期已近。三日前。將存庫銀五千兩。命當家散給窮人。次日。尙剩銀一千三百兩。復命再查。有無財政。後知散盡。歡忻謝主。向當家云。如今手中無世俗之財。以此臥榻送汝。尙求借用至死。若不借我。卽臥地以終。遂自備淨心見主之工。總告一生之罪。內求聖體。外請聖油。俱全美而逝。年六十七歲。時天主降生。

後一千五百五十五年。

宜行之德 望主仁慈

天主至善。所以至仁至慈。四海雖遙。古今雖遠。無一人不在仁慈之內。養人百十年竄流之肉身。猶爲不足。復救人億萬年永罰之靈魂。而無所不用其極。爲救普世之靈魂。從天入世。降生爲人。自聖誕迄於聖終。自馬槽迄於十字架。此三十三年之內。將古今前後。南北東西。人人該受之。暫苦永苦。盡歸於吾主之一身。而代爲補贖。不拘何等重罪。只要罪人肯告肯悔。則天主仁慈。必然肯解肯赦。倘汝負恩自棄。有一日斷仁慈而施公義。無地可逃。無人可代。哀哉。

當務之求 爲天下太平

羣聖流芳

九月

十八日

二百五十二

祝文 天主。以爾聖多瑪斯主教。荷真光之特寵。施仁愛於貧窮。伏祈吾主。賜我等呼名籲禱之人。咸蒙博愛寬仁之惠。爲我等主耶穌基斯督。亞孟。

● 十九日聖讓魯亞略主教致命

聖讓魯亞略。是意大利亞之主教。聖德非凡。名聲遠播。是時邪黨橫行。聖人盡力勸衆。增益堅心。聞彌瑟納城中。被殘更甚。前往顧之。首被拘獲。勒令背教。禮拜邪神。卽行釋放。不然。舉火焚之。時聖人心中之火。更熱於外來之火。語言猛於烈焰。官怒。命役集火成窰。置聖人於窰內。聖人安坐火中。不焦一髮。官以爲邪術。重笞收監。次日驅入獅棧。聖人畫聖號而入。獅熊諸獸。俱搖頭擺尾。向前跪伏。如家犬依戀主人之態度。衆睹此奇。莫不感動於心。官懼衆變。卽命斬之。聖人欲顯天主全能。求主盲此惡官之目。使知不認天主之

故。官卽兩目失明。始動心向聖人云。請你求天主救我。聖人曰。你旣知天主全能。豈無天主仁慈。轉身求主。目卽復明。因此聖蹟。棄邪領洗者有五千餘人。官懼總王之害。竟敢忘主之恩。仍命斬之。路遇教中老者。求賜片衣爲聖物。聖人曰。我只有汗巾在手。但此刻不能與汝。因斬首時。尙有用處。到致命後。必然送汝。雖死。決不食言。聖人被斬之後。刑役將此汗巾丟於血內。以足踐之。而毀謗曰。汝許此巾與人。我看汝能送去否。豈知聖人致命後。將此手巾親付老叟。刑役不見其送。如今進城。目睹此巾。在老者之手。時天主降生後。三百零五年。旁有教中賢婦。以玻璃瓶敬收聖血。又有教友。謹藏聖首而歸。至今瓶血猶存。聖首現供於祭臺。若將瓶血與聖首相近。血卽在瓶融化而湧。如同新鮮之流血。若離開聖首。血卽依然凝結。歷一千五百餘年之久。

不少不乾。且有求必應。受恩之人。世世相承。未能殫述。

宜行之德 默想地獄之苦

地獄之中。萬苦畢集。想汝此言。早已知道。但地獄之苦。必大不同於世苦也。該想地獄之神火。最猛最兇。不光不熄。故名火海。入此海中者。內外煎燒。無休無盡。猶不僅火燒而已。歷來致命人之劇苦。與萬世罪人之刑罰。各病人之災害。各地方之極穢。大兇大毒。無不包藏於獄中各罪人之身。如此之苦。請聚古今萬國之苦。可比其絲毫否。既知不能可比。爲何還不改悔而守誠規。區區戀此暫樂。而罹此永殃也。

當務之求 爲已亡諸信者

祝文 全能天主。垂盼吾劣。爲本行重任屈壓。賴爾聖讓魯亞略。致命兼主

教轉達。得厥護翼。爲爾子吾主耶穌基督。亞孟。

●二十日聖歐大覺與妻子致命

聖歐大覺原名巴拉濟多。是羅瑪之將軍。素有德名。武功最著。辭官歸里。妻竇比氏。生有二子。一名亞加。一名德阿。俱未進教。歐大覺性好田獵。獨追一鹿。將近趕至。忽見角上聳立耶穌釘十字架之容。且呼名嚴責曰。何逼我以圖肆害耶。聖人惶懼良久。下馬伏叩曰。爾是何神。命我何事。耶穌諭云。吾乃爾主耶穌。向爲爾受難者。爾今回城。覓我鐸德。受訓領洗。併引妻兒進教。再赴此間。示爾後命。語畢。耶穌與鹿。俱無影響。聖人歸告妻兒。訪求鐸德。教訓闔家領洗。又至山中伏叩。耶穌顯容獎勉云。德成於苦。忠著於艱。爾惟靠我提佑。篤志守規。雖遭魔妒。百計爲仇。必能克勝成功。毋疑毋懼。聖人謝主回

家。同妻子靜候艱難。不數年。婢僕俱亡於疫。牛羊盡死於瘟。富人忽變爲窮人。積德亦傳爲積惡。聖人神訓在心。操持更勇。密攜一妻二子。棄家夜遁。潛往厄日多國。爲息鄉鄰之毀辱也。一入海舟。舟主見聖人之妻美色。頓起不良。登岸之時。搶回船中。開行出海。幸蒙天主保全。後來此人之奸謀。未達到目的而死。但聖人在海濱遙視無法。只携二子而行。次日行至河邊。無舟可渡。先負一子涉水過河。置之岸上。回至河中。忽見未過河之子。被獅啣去。自思無法救援。急速轉身。又見已過河之子。亦爲大狼啣去。轉瞬之間。家敗人亡。妻離子散。他人處此。未有不動情者。聖人惟伏地槌胸。叩謝天主大恩而已。從此孤身流落。備力度生。歷十五年。潛德旣深。大勳將集。是時國家治安長久。忽遭蠻夷。大兵臨境。將帥乏人。素知聖人精於軍事。遣使訪求。偶然幸

遇。急命還朝。聖人輾轉尋思。知有天主聖意。隨使而同。王甚禮之。授以統軍破敵之任。未及一月。敵敗事平。班師奏凱。行至小村。憐念軍士困乏。令紮營三日以休息。各人聚談消遣。內有一人。自言吾父。原爲名將。閒居無事。挈眷外遊。不知因何失去我母。尙有一弟。連我三人。行至河濱。父先負弟渡河。及轉來負我。狼掠弟而去。我亦被獅擒入林中。幸遇數牧人奪回留養。言未畢。一人應聲赴曰。汝係我兄。我係汝弟。被狼掠後。一農望見。奮力前追。狼卽棄我而奔。農遂收養於家。衆聞此異。鬩傳甚速。母自離散後。留落此村。同於婢役。忽聞此言。疑爲己子。往探聽之。情投事合。母子弟兄。恍若重生。但大軍旣滿三日。而弟兄欲奉母回。遂據實陳明。聖人一聞此訴。感泣從前主訓。復思今日奇恩。必有非常大故。適舊君去世。新君嗣立。亞弟與嗣位。知聖人報捷。

回都親迎優待。惟其素信僞神。將功歸於邪廟。率衆祭神。聖人不從。王勃然大怒。忘其功績。革職鎖拿。抄沒家財。監禁妻子。投聖人於獅圈。獅皆伏地斂容。搖首舐足。馴如家犬。見之者皆手舞足蹈。羣稱聖人之德。獨王惡感愈增。命造銅牛。入聖人夫妻二子於牛腹。以烈火煨之。聖人神色怡然。求主大恩。準其得見天主。聞空中有聲慰諭曰。主已允爾所求。毋庸驚慮。念爾夫妻二子。歷盡艱難。應賜之天福。聖人忻然。率妻偕子。致命於銅牛腹內。時天主降生後一百二十年。越三日。開看各聖屍。毫髮不傷。容顏皮肉。並無焦灼之形。衆因愈出愈奇。感化者甚多。

宣行之德 神樂

讀聖歐大覺之傳。明顯奉教。不爲世樂。惟求神樂也。形樂而樂不增。形不樂

而樂不減。豈惟不減。更覺平安容易。因所樂者善也。善在樂在。善去樂消。無善而能樂。必邪樂也。有神樂者。惟恐苦難不來。只怕苦難速去。還求苦中加苦。苦愈多。樂愈盛。幸逢苦難神樂。神樂必由心中而發。萬萬倍於富貴功名之樂也。汝缺神樂。非汝罪根去之而未淨。善德爲之而不力耶。爲何只嫌少得形樂。不嫌己身多失神樂。

當務之求 爲苦難者

祝文 天主。爾賜我等。敬憶爾聖致命者。聖歐大覺誕日。望爾彼居永福之域。使吾偕樂。爲爾子吾主耶穌基督。亞孟。

二十一日聖瑪竇宗徒兼聖史

聖瑪竇。是猶太國加理肋省人。居葛法農。職當稅吏。人皆惡之。幸有領受聖

召之資格。適耶穌過其地呼之曰。從予。應聲趨赴。盡棄俗情。毫無留戀。後備筵席。敬請耶穌。而且介紹親鄰。同歸正道。耶穌升天後。聖人決志敷教四方。傳道於猶太。厄日多等國。大顯神蹟。八年中。歸化者億萬之多。稍有閒暇。恭紀耶穌言行。述其親見親聞者。垂之不朽。迄今咸誦焉。後至厄弟阿比亞國之納大伯府。遇一奉教宦官。名斐理伯。同理教務。被化亦多。城有二巫。憑魔惑衆。聖人仰賴主恩。當衆排斥其邪。二巫深恨。故召最毒之大蛇肆害。聖人向空畫十字。命往曠野。蛇卽聽命遠奔。衆皆悅服。棄邪歸正。不勝其數。尤有最奇者。國王厄日波只生一子。患病而死。二巫盡法莫靈。王求聖人入宮驗視。氣絕屍寒已久。聖人憐念此方。愚蒙難化。賜他復活。教必易行。遂跪求甚切。頃刻。死者轉身復活。強健倍常。君臣卽日信從領洗。士民莫不爭先恐後。

聖人晝夜勤勞。創業垂統。乘機建堂。陞立神品。過二十三年。王因衰老駕崩。嗣君新立。逆叔異兒大各乘機篡位。有先王之親女意斐日尼。早已領洗。矢志守貞。宮內及大臣諸女。效法貞修。以卒世者。二百餘人。設修女院。公主掌之。是時奸王希圖與公主爲婚。知受聖人之訓。遂命聖人勸其成此好逑。豈知聖人不但不從。而且在於講道時。極言貞潔美如天神。心樂如天堂。意斐日尼在旁聞之。極表同情。無任欣躍。不遂奸王之私。而遷怒於聖人。正值聖人舉行彌撒。惡黨忽入殿中。挺鎗刺死。聖人歿後。異兒大各強娶不從。將意斐日尼閉於室內。舉火焚燒。火方大起。衆見聖人乘空撲滅。併罰異兒大各。陡發穢瘡。滿臉遍身。痛苦倍於刑裂肢體。遂自縊身亡。主顯此威。人人驚畏。聖人之聖屍。存於撒肋諾府。至今遠近士民。咸感戴之。

宜行之德 順命

聖瑪竇聞耶穌一呼。卽離稅關。惟順主命。今汝多蒙耶穌無數之呼。爲何置若不聞。當日聖人偶聞聖聲而已。今則屢蒙聖佑也。聖人不敢辜負耶穌舉口之勞。汝竟身承聖佑而不知。可乎不可乎。况聖佑常常不斷。出自主恩。但呼汝多年。還如前冷淡。如前謀利圖榮。則聖佑恐過去了。汝不隨聖佑之呼。必隨魔誘之呼矣。哀哉。

當務之求 爲聖教廣揚

祝文 伏望吾主。托聖瑪竇宗徒兼聖史之所禱。幸蒙扶佑。凡本力弗克者。賴其轉達。亞孟。

◎二十二日聖貌理爵等致命

天主降生後二百八十六年。羅瑪總王馬濟密亞諾。因邊境不寧。調兵征剿。大軍既集。總帥擇一平原曠地。令公同祭祀本國之神。如有一人不行此禮。必按軍法處斬。內有一軍。是厄日多國調來之兵。共六千六百六十六人。皆從正教。聖貌理爵爲軍長。厄蘇伯落甘弟大等爲副長。聞祭神軍令。卽率兵離隊。總帥差官密諭。聖人答云。我等俱奉天主教。按照教中規矩。國王之物獻國王。天主之物獻天主。故我等出兵前進。捨生報國。分所應當。若要祭祀邪神。獲罪天主。萬萬不能。總帥據此陳明於王。王曰。不敬保佑國家之神。明明滅理玩法。應加重罰。以示國威。令每十人之中。梟斬一兵。使衆懼而悔改。總帥宣佈王令。斬去十份之一。豈知衆兵堅逾金石。人人情願鐵血犧牲。以報耶穌。聖人勉勵衆曰。我看汝等信德剛強。人人勇敢。非人力所能。實係耶

耶穌愛。充滿汝衆之心。我是以感謝主恩。猛如烈火。倘汝等怕死惜生。何難片言叛主。但領洗時。曾許永遠欽崇之愿。誰肯或忘。天上無窮無盡之榮。誰能捨棄。今同友數百人。已蒙天主大恩。有誰不肯追隨。該齊聲贊成曰。情願爲主失命。一定不拜邪神。厄蘇伯落又勸衆曰。兵弁該爲國家出力。今此號令大反對天主之意。何敢偷生。獲罪於天主。手中兵器。於今無用。急當棄之。以示甘心。軍中團體。皆從其語。各丟器械。斂手待斃。總帥知此軍隊。敢死同心。無法挽回。命異教軍。一併殺之。殺畢。有一別營退伍老兵。適到。名味多爾。衆兵驚訝問故。伊大呼曰。我多年未逢此幸。早來片時。必隨衆升天。刑役惡其言。亦殺之。

宜行之德 忍避罪惡

歷來聖人。明知性同於天神。故矢志守貞保潔。雖不能離去本身。亦必離開犯罪之機會。及縱性動情之事物。然後加以克勵之工。庶免犯罪之端。或有人輕笑辱罵。甚而謀害。汝雖理長力勝。不如讓他避他。好像怕他。不敢回言。如此靈魂。亦可免犯罪。本身得蒙利益。若說甚難忍耐。當知難忍而忍之。纔成愛人忍德。耶穌當日。受人辱罵訕言。無所不至。惟默而不答。汝之難忍。能比耶穌之難忍否。汝不學耶穌之忍。又不肯避罪離開。意欲何爲。將以辱罵報復耶。

當務之求 爲受累者

祝文 天主。爾賜我等。敬憶爾聖致命者。聖貌理爵等誕日。望爾彼居永福之域。使吾偕樂。爲爾子。吾主耶穌基斯督。亞孟。

◎二十三日聖李律士教宗聖女德加辣童身致命

聖李律士是意大利亞國人。乃聖伯多祿宗徒之門弟。德名並隆。經濟宏偉。選入神品。陞爲鑿牧。襄助教政。其師致命後。聖人卽教宗大位。德行更爲昭著。所顯聖蹟甚多。驅魔治病。復活死人。以此感化。入教受洗者。不可數計。暇時則紀其師之言行。又因聖會初興。規條嚴謹。以肅教風。令入堂誦禱之婦女。必須戴巾遮首。斂容。以慎廉潔。端莊等德。在位十一年。被斬首升天。時天主降生後七十六年。葬於其師之旁。

聖女德加辣。是羅馬國西里西亞省人。有德有才。母已許聘名門。適值聖保祿宗徒傳教是區。聖女幸聞大道。矢志貞修。無能勸阻。男家告之於官。望他畏刑必改。官知聖女修名素著。萬不能移。卽議死案。用火焚燒。聖女畫十字。

安坐火中。向官云。我本劣女。賴主智能。蹈火如登衽席。爾係抗逆之徒。自恃己權。害人無忌。孰知世榮最短。不日就墮永殃。天正清明。忽然重雲暴雨。火滅衆奔。聖女之鎖禁自開。道路亦無阻擋。緩步而歸。居數月。神業日增。邪黨妒之。架詞陷害。官復拘訊。坐飼惡獸。虎豹俱跪迎舐足。羣皆呼頌。多歸向焉。官將歸向者。拿禁獄中。次日又投聖女於獅熊圈內。各獸敬服如前。惟官不服。命推入毒蛇坑中。忽降火雲。盡滅其毒蛇。官猶不悟。用二牯牛。將聖女分繫於牛角。火錐攢刺牛身。使牛畏痛前奔。則聖女必肢裂而死。豈知二牛忍痛不奔。衆皆觀感。崇正棄邪。不可數計。官懼士民生變。遂釋放之。聖女脫身。暫寓鄰家。鄰女亦傾心信服。未幾。往瑟滿濟亞府。聞者感化甚多。迨後德備功高。年九十歲。無病而終。聖蓋玻羅削贊云。榮哉聖女。爲保童身。力辭婚配。

持其正志。不懼敵仇。雖置之非刑中。猶安堵無虞也。榮哉貞女。具茲中保。主即佑之。獸且必敬必恭。何靈人不如頑物耶。從此聖會以聖女之名可貴。所以信輩顧臨終經有曰。吾主救爾僕靈魂。如救童貞致命聖女德加辣。於三刑之苦。亞孟。

宜行之德 禦敵靈仇

人有無形之仇。即是邪魔。有形之仇。即是親友。更有不死不離之仇。即是肉身。人與魔尙有間斷。惟此身須與不離。時常攻擊。凶莫甚焉。親友非善即惡。然親友善少惡多。因百善難消一惡。一惡可消百善。且一時拂意。懷恨終身。貨財佚樂各般。可搖動我心者。時刻營謀陷害。非天主聖佑保存。難免縱敵事仇之禍。

當務之求 爲守貞者

祝文 天主爾賜我等。敬憶爾聖致命者。李律士教宗。及聖女德加辣童身。誕日。望爾彼居榮福之域。使吾爲同侶欣樂。爲爾子耶穌基督。亞孟。

二十四日聖母立贖虜會

天主降生後。一千二百餘年。西班牙國。被回子竊據四百餘年。回子之兇殘。天下莫不知之。所以被虜去之教友。不能勝數。時加酷烈。百計圖謀。法外施法。苦中增苦。苟存其性命者。非天主格外之恩耶。且迫令背教以全生命。以安世福者。豈可坐視不救脫之乎。於是教中團體。哀求聖母。幸蒙垂允。聖母卽顯示於聖伯多祿諾納格。聖賴孟多。西班牙國王雅各伯。併示其名。集議倡辦。協同創立一會。專爲贖取被虜之人。詳見於一月廿三卅一等日。此會

是聖母親立者。故名之曰。聖母贖虜會。聖母之施恩於此會也。可謂之重焉。既蒙垂鑒於前。又蒙矜全於後。時加護佑。必使新會廣行而後已。常常默引盛德之士入會。捨生救衆。濟困扶危。各盡其愛人如己之道。會中嚴規。凡進會者。立愿以身贖虜。或做當押。故贖回之人甚多。教宗額我略第九位。準定會規。立此瞻禮。慶賀聖母大恩。而使感謝不忘焉。

宜行之德 贖虜

有死罪者。爲罪之奴。邪魔之僕。萬倍於肉身之奴。最爲可哀者也。我們該設善法。盡心勸引。指其迷途。助其悔改。令速離魔鬼之手。免爲罪之奴。魔之僕。則功亦萬倍於贖身之虜也。其次救煉靈之虜。亦係汝之本分。恐汝父母親友恩人。還在煉獄。生時尙思圖報。爲何死後。反把前情置之腦後。倘汝此時

在煉獄中。不望別人救汝麼。善人尙不能免。誰敢說一生一世。美玉無瑕。不遭煉苦。而一直升天麼。

當務之求 爲罪人及煉靈

祝文 仁慈天主。祈護我儕。俾凡記憶主聖母者。賴其轉達之弘祐。脫離諸橫逆。幸獲復活。爲是吾主耶穌基督督爾子者。其偕爾偕聖神。爲一天主。乃生乃王。世世亞孟。

二十五日聖斐爾明主教致命

耶穌升天後。二百四十五年。有斐爾莫。是邦波羅納府中巨室。未知正教。往拜邪神。路遇鐸德何肋斯多。向衆宣道。頗入其耳。邀請至家詳問。答云。我是天主教。奉多羅撒府主教撒都爾尼諾之命。來此勸人。改邪歸正。方得永遠

常生。斐爾莫欲求主教臨家。鐸德允其轉求。請來講勸。晝夜靡寧。爲日無多。進教者已四百餘人。斐爾莫同福斯多、福爾都納多三人。俱是此方顯族者。遂建堂以爲衆人瞻禮。規條既定。主教仍回本署。留鐸德管理教務。聖斐爾明卽斐爾莫之子也。父命其在堂幫助。專心受業。聖人好學深思。博聞善記。凡敬愛神工。經書奧理。世俗文章。無不貫通。年方十八。卽代講道之任。語出驚人。聽之感泣。推陞鐸德旋陞主教。居邦波羅納府。勤勉盡職。事事精明。發顯熱心。時時謹慎。周遊法國等處。被化者甚多。官吏鎖拿復釋。不啻再三。後至俾加爾弟亞省城。三日前。以天主三位一體之名。多顯聖蹟。付洗人數已達三千。被官拿禁。聖人分別正邪。語猶源泉。流之不竭。官欲飾己非。拒絕而不能。默然良久。將其放回。聖人講勸如前。官復鎖拿入監。懼衆喧譁。次早斬

決。時天主降生後三百零三年。

宜行之德 化邪

聖奧斯定曰。忍心不愛天主者。因不認天主故也。認之必愛之。可見愛主之德。從認主而生。愛人之功。從愛主而發。汝果知道救人靈魂。不辭辛苦。是爲天主的榮光。爲本身之功德。請看聖斐爾明。自幼勞心勤學。並不爲己。專爲救人。雖逢惡官汚吏。不避其鋒。似此實行之力。從何而來。總因認得天主。眞故愛主之愛。狠切。汝不能學聖人之化人。難道不能誦禱麼。因化人之力。俱由天主而來。或有舌敝唇焦。無人信服。亦有三言兩語。能救多人。非天主聖佑恩光耶。

當務之求 爲傳教者

祝文 全能天主。垂盼吾劣。爲本行重任屈壓。賴爾聖斐爾明。致命兼主教轉達。得厥護翼。爲爾子耶穌基斯督。亞孟。

● 二十六日聖女儒斯弟納童身聖西彼廉致命

聖女儒斯弟納之父母。是羅瑪國安弟阿基省人。迷信異端。惟聖女獨遵聖教。目睹二親行事。往往槌心泣血。向主哀求。幾諫婉言。俱蒙領洗。如此盡誠盡孝。超越尋常。論其克己修身。謹隨先聖之行。世福虛榮。毫不動心。晝夜苦工祈禱。旁人並不知覺。此其自治之嚴。未易幾及者也。有一少年。名亞熱納。依德係富貴之家。偶見聖女美容。遂以權勢求婚。計窮無效。遂求大邪法之人。名西彼廉。許其必得。使魔以慾情煽動。或以美男蠱惑。聖女惟畫聖號以退之。魔回覆云。此女不能引誘。因常畫十守聖號。是我們所最怕者。西彼廉

自忖曰。十字聖號之大能如此。爲何謀害敬十字之人。從此真心訪道。燒燬邪書。主教知其素行。屢求而後允之。領洗後。每日謹隨聖佑。講道勸人。不辭危險。惟悔恨從前之罪。遷改之遲。感謝聖女拒魔之德。聖女聞其棄邪歸正。愛主熱心。更倍於前。地方官聞知。拘拿二聖。重笞無數。皮破肉飛。收監數日。預備大火。如不悔改。投入火中。聖人答云。情願敬我天主。受此世間一燒。卽死之火。不願拜汝邪神。永受地獄常燒不死之火。二聖端坐火中。荷蒙天主大恩。遍體毫無損傷。有一少年。名亞大納爵。以二聖爲邪法。自誇奇術更靈。向衆跳入火中。頃刻肉枯骨燬。二聖仍是安妥無虞。官竟解送總王。陳明前事。立命斬決。

宜行之德 痛悔改過

改過之心。當悔而又悔。不宜改而復退。天主命曰。肯悔卽赦。未會有說悔心退後者亦赦之。明明悔卽赦。不悔卽不赦也。若說待至臨終。悔之未晚。請看人死之時候。各不相同。有猝不及防者。有精神昏亂者。汝能保得無這樣態度麼。當平安無事之時。明知該悔該改。汝竟不悔不改。反云臨終未晚。自己阻攔自己。直到噬臍無及。雖然好友至親。聖師神父。此時亦難救汝。只付一歎而已。如此可傷之事。汝爲何不思患而預防之。

當務之求 爲罪人改過

祝文 天主。爾賜我等。敬憶爾聖致命者。聖西彼廉。及聖女儒斯弟納。誕日。望爾彼居永福之域。使吾偕樂。爲爾子耶穌基督。亞孟。

二十七 日 聖葛斯默 聖達彌益 昆仲 致命

亞辣彼亞國厄日亞府。有正教巨家弟兄五人。二聖居幼。一名葛斯默。一名達彌盎。其父早亡。母勤教育。又聘名師。教以文章格物各科。二聖兼精醫學。道德聲名並著。天主助以聖蹟。跛行瞽視。癩淨病痊。因此感化。朝野聞名。致命之恩。實由於此。今略言之。差官名利西亞。往厄日亞府。查拿正教。聞二聖之名。拘問曰。汝二人何族何名。敢借醫傳教。若不背耶穌。不遵國命。嚴刑處治。二聖說了某族某名。官先用甜言誘改。繼將夾棍重懲。聖人笑云。爲何用此小刑。我們不覺其重。希望多受艱難。以獻耶穌。官役見其腿脛無傷。心竊異之。命網沉海。天神開其繩索。送於岸上。俱是活人。官視爲邪法。轉怒爲歡。求傳此術。聖人云。非係法術。乃是神權。惟倚靠天主耶穌保佑而來。若汝肯真實信從。亦得蒙天主之恩。官曰。倚靠吾神保佑。我亦能顯靈奇。語未畢。忽

有二魔將官亂打。皮破血流。越喊越打。旁人並無救法。聖人以耶穌聖名逐之。向官曰。汝敬之神。不能去打汝之魔。我以天主大能。禁其肆害。可見我敬之主爲真爲正。還不信服麼。官竟默無一言。收監再議。次日。以大火燒之。二聖端坐火中。平安無恙。而在旁刑役。多被飛火所傷。如此聖蹟。亦不能感動官心。命縛於十字架上。隨衆亂石打死。石反從空回打。傷死多人。改爲箭射。箭亦自回。死者更多。終以斬決致命。時天主降生後二百九十五年。

宜行之德 奉事真主

人人俱想絕藝出名。少有盡心出名於聖教者。正經事業。雖爲俗藝。既在我身。卽我之本分。每日宜盡心力。完全本分以獻天主。不避繁難辛苦。宜自慰曰。蒙主賞此本分。不敢分內缺工。亦不敢分外妄爲。惟仰承天主之意而已。

此人人共有共能者。爲何將立功之具。反用爲犯罪之端。此何異庸醫殺人。參茸變爲鴆毒也。又何藝之足云。所以不拘何藝。務俗者用之。便爲俗藝。學聖者用之。卽成聖藝。俗藝爲身。與身同滅。聖藝爲主。與靈併臻。欲爲聖業。宜自圖之。

當務之求 爲貪人

祝文 天主。爾賜我等。敬憶爾聖致命者。聖葛斯默。聖達彌盎。誕日。望爾彼居永福之域。使吾偕樂。爲爾子耶穌基督。亞孟。

◎二十八日聖文思老國王致命

聖文思老。是奧國屬波赫彌亞國王之子。父王與祖母路彌辣。俱奉聖教。惟母后特納阿彌辣。深迷異教。祖母恐壞其孫。親自教養。選一才德絕倫之保

祿爲師。凡敬主愛人之道。治民克己之工。莫不引之導之。父王早崩。生有二子。長卽聖文思老。次名波肋思老。母后強立次子繼位。爭奪政權。同惡相濟。遂禁止聖教。不許聖教之師教習聖人。朝中有奉教者。俱斥逐之。太后見此大變。痛切於心。力助聖人。未幾。歸回國柄。聖教仍然大行。聖人修身惟謹。治國惟勤。愛人之事。不顧人言。屢送貧民之喪。凡有死囚。聖人一二日前。含悲泣下。無關國家大逆不道者。必釋放之。恭敬耶穌聖體。更比衆不同。親自耕田種麥。磨麪作餅。親手選擇葡萄。取汁成酒。以爲祭品之用。且親身服事。鐸德做彌撒。每日除國政外。惟以祈主訓人。默想爲務。隨有鄰國之王辣弟斯老。舉兵犯境。聖人慮其傷害衆人。不如親身對敵。彼卽飛騎突衝聖人。相隔不遠。見二天神護守聖人左右。明威赫曜。辣弟斯老慌忙下馬。跪於聖人前。

求寬冒犯動兵之罪。和好如初。又有一次德國之帝。號召各小王議事。獨有文思老遲到。帝不悅。先囑各王勿以禮貌而輕藐之。豈知文思老入殿。有二位天神同行。帝卽驚訝。離座而起。降階歡迎。可知聖人大有天主之佑。惟其母后妒忿日深。使兇弑姑。遣子弑兄。聖婦路彌辣蒙主默示。預知所謀。行告解。領聖體。所有貲財。盡散窮乏。專心領受致命之榮。果然神工甫畢。被兇絞死於堂。惡后又借次兒生子爲名。延請聖人赴席。以便乘機謀害。滿望此行如意。旣可以滅天主教。又可令次兒爲王。聖人明知母弟之惡。情願爲主致命。先行告解領聖體。然後赴席。席畢。往主堂跪誦。其母催令動手。弟卽拔劍進堂。親殺聖人兩劍。立時氣絕。時天主降生後九百三十六年。墓前顯聖蹟甚多。不久。惡后忽見地裂吞陷而死。

宜行之德

盡心預備領聖體

重大罪中。無有可比冒領聖體之罪者。因重大之罪。是反對天主之法律。惟冒領之罪。是辱慢天主之本身。輕棄免死救災之寶命。阻塞愛人之善路。斷絕施恩之充滿。還有何罪可比其重大耶。而且冒領之罪。難動天主之仁慈。難沾天主之恩赦。聖保祿曰。耶穌身代犧牲。以息聖父之怒。故普世人皆靠此獻。以蒙罪赦。被冒領之人獲罪。潑其血而毀其祭。竟使罪人失其所靠矣。若無中保耶穌。而望息聖父之怒。望得本身赦罪之恩。難矣難矣。以一人之冒領。而若是其阻攔也。

當務之求

爲冒領聖體者

祝文 懇祈全能天主。吾敬憶爾聖文思老致命者誕日。賴其轉達。使吾剛

健於爾名之愛。爲爾子吾主耶穌基督。亞孟。

◎二十九日聖彌額爾總領天神及諸天神

天主造成萬有之初。卽造有一種無形之體質者。極其靈明。有始無終。而能借氣成形。以現於人。以傳主命。非人死能變爲者。故稱之曰天神。若論其尊高。則宇內無尊高可比。其真福全備。恆視天主貴容。時刻不離。其德純粹。無虧無缺。其能無等。或運動諸天而不困倦。或震撼全球而不費力。其智甚靈。大超世傑。不苦思慮。而物之所以然。理之所當然。一照卽徹。毫髮不爽。其衆之數。無人能解焉。按經典分其數。有上中下三大部份。每部份分三品。故謂之爲九品。其品益高。其福益深。其德益精。其能益大。其智益明。其數益廣。論上部上品之神。以熾爲名。其愛天主。比諸天神更切。故比之爲火。此最上九

品之神。其愛常騰。至天主前。卽安而止。又且熱且照。下品之神。令愛天主。令知其旨而傳於人也。上部中品之神。以智爲名。斯神愈近真主。愈精其智。知識旣滿。諭下品之神。使知當知之事情也。上部下品之神。以座爲名。天主安居斯神。若皇安於御座。又如皇將宣令以示國民。坐御座乃發。天主時有大事。先示斯神。命示世人也。中部上品之神。以權爲名。天主將決世上急事。常用斯神。其權廣大。下品與世人。皆順而不逆也。中部中品之神。以主爲名。斯神掌管下品之神。使從其命。聽之若主。又引導示諭世上國王。亦爲其本職也。中部下品之神。以能爲名。天主欲伏抑魔之猛。常用斯神之強。魔驚而伏。若悍奴驚懼嚴主之威也。下部上品之神。以力爲名。下部神力雖大。亦不及斯神之力遠矣。天主欲行異事。顯大聖蹟。大變世物。彰罰世人。常用斯神之

力。守國守省守王。亦斯神之職也。下部中品之神。以遣使之首者爲名。斯神若首。主治下品之神。天主欲默佑聖人。賜知前事。常遣斯神。若使之首使者然。守府守縣守城。守鳥獸草木之類。亦斯神之職也。下部下品之神。以遣使者爲名。天主欲示世人。命知常事。常用斯神。另亦以守人爲職也。以上九品之神。皆爲天主之管轄。統率各品。各支。各部。各隊。俱是聖彌額爾天神。統領如帥。因聖賢廣述其奇。曰。宇內時有緊急大事。天主委之就平。其始有大神。心傲背主。名路濟弗爾。抗拒不服。引誘多神。共同叛逆。聖彌額爾挺然出征。得勝。天主罰叛神於地獄。變爲魔鬼。世末之時。假基斯督出世。憑魔之能。殘害聖教。謀僭主位。聖彌額爾臨討。殺投地獄。昔天神護守古教諸人。卽此神也。伊當顯無數靈異。古教衆人被虜甚苦。聖彌額爾發現於聖每瑟。命往慰

救。虐王迷固。屢次反覆。無心釋之。聖彌額爾率領屬神。刑罰王民。一晚盡滅。全國長子。勒令放出俘虜。衆出遊曠野四十年。聖彌額爾引導。日降糧味以養之。晝備密雲以蔭之。夜備火炬以照之。親銘十誡。付與每瑟。命布於衆。異國惡王。舉兵侵地。聖彌額爾一夜殺寇兵十八萬。大救國人。今護守聖會者。皆此巨神之功勳也。

宜行之德 效學天神

天神常順主命。所命之事。不拘大小尊卑。精粗遲速。常常平和。因一心只知全遵天主之意而行。不管己之得意不得意。故從無一事一時失去平和也。若汝能如此。或幸得所願。或不得所願。亦不可強求。惟知有天主之意。心內自然平和。爲何將多少不如意之事。擾亂於心。當知道這不如意之事。斷不

合天主之意。怎奈汝心不肯順從天主。而反欲順從自己。恐怕事事不得平安。時時不得和美。

當務之求 爲服從主命

祝文 天地大主。三軍之帥。善神之首。聖彌額爾。保守聖教會。昔日抑禁邪魔驕傲。使認天主至尊。大能無偶。轉求天主。賜教中諸品級。聰明剛毅。以能醒悟異端。解明大惑。加之神力誠意。以能體懷仁義。整肅萬民。爾依主命。世人終時。携靈魂置之主前。聽斷其行。辨定善惡。或因善。受賞上升。或因惡。受罰下墮。我亦忝入聖教。敬謝爾。真切望爾。佑我平生痛悔前非。以至死後。求主赦我重罪。亞孟。

◎三十日聖熱羅尼莫顯修聖師

聖熱羅尼莫。是羅馬國達爾瑪西亞省之人。族稱通顯。父母俱有良善之名。生有二子。聖人居其一也。幼年專攻文學。稍長。擇居羅馬。勤求神業。領洗後。晝夜不暇。瞻禮日。亦不肯隨衆息遊。如此數年。自知學業可以問世。遊歷意大利亞所屬之名郡。及法國希臘國等處。往朝耶穌降生之地。密訪隱修。更加精進。魔妒日深。明鎗暗箭。百計謀攻。外像內情。穢淫煽誘。聖人苦身泣血。甚至以石槌胸。臥土減餐。常想世末公判。在此四年。魔計盡退。主恩時加。專習猶太國土音。以備註解天主聖經之用。時安弟阿基亞主教保里諾。留入京都。陸之鐸德。同朝教宗。保里諾事畢辭回。教宗不準聖人同返。留居羅馬。翻譯古經。註釋新經。增定大祭禮儀。傳述歷聖舊著之書。聖事神工。勉力不

違。既因教宗去世。始獲辭歸。再往猶太國。潛奔厄日多山內。從遊於隱修諸院。如初學者然。久而不倦。後居白零縣。創立修院。四方來朝聖地者。多就教焉。遠客初到。必親爲之濯足。請餐設床。教其不知。助其不及。形神並濟。有異端人妖言惑衆。聖人著書明辯。幾被兇殘。幸蒙主恩。未遭其害。忽聞強寇自東而來。鄰國已被虜掠。聖地士民。皆欲他徙以避其鋒。聖人求主保全。寇竟別途遠遁。聖人年至八十。雖力疲氣弱。而神靈凜凜。雖死猶生。歿葬於此地之淨區。時天主降生後四百二十年。未幾。遷葬於羅瑪京之聖殿。

宣行之德 默想公審判

公審判時。驚懼之極。善惡分開。善在右。惡在左。觀念在主右手之人。他不貪世上的福樂。縱或身居福樂場中。亦與他毫無干涉。所有之干涉。不過苦耳。

因他在生一時之苦。得享無窮無盡之樂。你願不願。再看。在主左手之人。所貪。世上功名富貴之尊榮。驕奢淫佚之歡樂。去而不留。所留者。尊榮歡樂之罪罰耳。榮惟頃刻。罪惡無窮。樂只片時。刑罰無盡。汝怕不怕。

當務之求 爲無知幼童

祝文 天主。於爾教會。解明諸經。聖熱羅尼莫大聖師。懇爾賴厥德義。法行則言。祈爾賜恩扶佑。誠心克踐。爲我等主耶穌基督。亞孟。

24

LCU1025